

11° 1064
e/

15. 1. 2.

SCS #1267

Thomas F. Torrance

SCS #1267









ANALYSIS LOGICA
IN - EPISTOLAM
PAVLI APOSTOLI
AD GALATAS.

Authore

D. ROBERTO ROLLOCO

Scoto, Ministro Iesu Christi, &
Rectore Academix Edin-
burgensis.



EXCVDEBAT
IACOBVS STOER,

M. DCIII.



EXIMIO VIRO

ET AMICO SVO SVM-

ME DILIGENDO ET OB-

seruando *Gulielmo Scoto* ab Elie,

S. & G. per Christum.

Iesum Christum vnicum salutis humanæ fundamentum esse, in quo nos in peccatis & offensis mortui iustitiam & vitam recuperamus, luculenter testatur Apostolus, dum prædicat eum factum esse nobis à Deo sapientiam, iustitiam, sanctificationem & redemptionem; eoque profitetur se inter Corinthios nihil scire decreuisse nisi Iesum Christum, eumque crucifixum; & alibi eminentiam cognitionis ipsius tanti facit vt eius causa omnibus seipsum multauerit, eaque vt Christum lucrifaceret pro stercorebus duxerit. Hoc fundamentum Satanas, vetus ille & astutus salutis nostræ hostis, omni ratione semper conuellere conatus est: primum quidem per obstinatos illos & contumaces Iudæos, contra quos disputat Paulus in celeberrima illa ad Romanos epistola, qui nescientes per lapsum

deperditam esse omnem naturæ sanctitatem & bonitatem, nulloque miseriæ suæ sensu affecti, pro Christo ipsiusque merito substituerunt bona & iusta naturæ opera, quibus solis eam vim tribuerunt ut nos coram Deo iustificent & salutem mereantur. Deinde cum hac ratione (utpote apertiore quàm ut clarescente iam Euangelij luce regno Christi multùm incommodare posset) minùs proficeret, alia, & ea quidem occultiore via, grassatus est per eos Iudeorum qui fidem Christianam in speciem amplexi, legis se zelo teneri simulabant. Hi solo Christo non contenti cum eo legem & naturæ opera, in negotio salutis & iustificationis humanæ, cōiunxerunt. Quorum veltigiis etiamnum insistentes Pontificij, pro natura ex parte bona & sancta pugnant aduersus Christum solum; & partiuntur quasi iustificationem & salutem humanam inter Christum gratiamque Dei, & naturæ vires & opera. Aduersus hoc hominum genus ex professo videtur Apostolus disputare in hac ad Galatas epistola, in qua semper inculcat nullo modo simul consistere posse in opere salutis humanæ gratiam & naturam, Christi mortem siue merita & opera legis; & eum qui naturam, vel naturæ partem aliquam, associat gratiæ, gratiam planè destruere, quæ vel sola est vel nulla: ut cū dicit; Ex fide Christi nos iustificari & non ex operibus legis: Si per legem est iustitia Christum sine causa mortuum

tuum esse: & Dei gratiam (quæ tota est in Christo, eiûsque passione) abrogari: eos qui legis opera cum Christo coniungunt fascinosos esse vt veritati non obsequantur: legem non esse ex fide (hoc est, legi cum fide, vtpote cum ea planè pugnante, conuenire nullo modo posse) hereditatem si ex lege est non iam esse ex promissione: conclusisse Scripturam omnia sub peccatum vt promissio ex fide Iesu Christi daretur credentibus: filium Dei factum esse legi obnoxium, vt eos, qui legi erant obnoxij, redimeret: inanes factos esse Christi quicumque per legem iustificantur, & à gratia excidisse: in sola cruce Domini nostri Iesu Christi gloriandum esse, & huius generis alia permulta, quæ hanc epistolam legenti passim occurrunt, quibus clariora & illustriora testimonia aduersus blasphemiam Pontificiorum de iustificatione hominis coram Deo sententiam quis desideret? Itaque hanc epistolam cum vidisset fælicis memoriæ *D. Rollocus* inprimis vtilem ad vnicum illud salutis fundamentum stabiliendum, veram de hominis iustificatione doctrinam confirmandam, & discipulorum suorum animos aduersus nefandum illum aduersariorum de summo illo & inprimis necessario religionis capite errorem muniendos, suscepit, non tam prælegendam, quàm Analyti logica in Scholis nostris Edinburgæ illustrandam; quæ, etsi brevis sit & succincta, aded tamen plana

est ac perspicua, Apostoli mentem ubique tam
clare aperiens, ut non oscitanti lectori iusti
commentarii vicem supplere possit. Hanc
ego Analysin, licet seriùs fortasse quàm o-
portuit absolutam, pro multitudine tamen
occupationum mearum inaturatam, offero
nunc tibi, vir eximie, non meo, sed *Rolloci*
nomine, qui properantem iam desideratissi-
mam illam *ἐνάλυσιν* expectans, tibi consecra-
ri, & sub tuis auspiciis prodire voluit omnia
opuscula, quibus ipse in summa corporis æ-
gritudine extremam manum imponere, &
lucis vsuram impendere non potuit. Cùm
enim ingentem beneficiorum cumulum in
eum conguessisses, parem tantis meritis gra-
tiam rependere se non posse professus; quod
solùm potuit, animi gratitudinem testatus
est, beneficentiâ tuâ omnium seculorum me-
moriæ commendatâ. Itaque nominatim sin-
gulis hisce opusculis solennia hæc dedicatio-
nis verba Testamento præscribi mandavit,
GVILIELMO SCOTO IN PERPE-
TVVM TESTIMONIUM AMICI-
TIÆ NOSTRÆ DEDICO CONSE-
CRO QVE. Hoc autem munusculum etsi
tuis in *Rollocum* meritis haudquaquam respon-
deat, scio tamen tibi fore gratissimum, ut qui
omnia à tam eximio Dei organo profecta ma-
gni facere & in summo pretio habere solitus
sis, & nunquam destiteris operum *Rolloci* edi-
tionem

EPISTOLA DEDICATORIA.

tionem (tum viuo, tum vita functo authore)
virgere, vt si quid vtilitatis ad Ecclesiam Dei
ex *Relloci* laboribus, præsertim autem his-
ce postremis, peruenerit, illud tibi
magna ex parte acceptum sit
ferendum. Vale: Edinbur-
gi, Idibus Iulij

1602.

HENRICVS CHARTERIS,



Doctrina partim est de iustificatione hominis siue iustificationis modo, partim paranetica est & moralis. Ad doctrinam de modo iustificationis transit capitis secundi vers. 15. & priori parte vers. 16. In altera parte v. 16. propositio est instituta doctrina, Non iustificari hominem ex operibus legis: ubi intelligenda est affirmatiua propositio negatiua huic contraria, iustificari hominem per Christum, siue per fidem Iesu Christi, cuius bis mentio facta est eodem illo versu. Ad huius propositionis confirmationem accedit vers. 21. capitis secundi, & vicissim pluribus argumentis, ad versum 15. capitis tertij, nunc quidem confirmat iustitiam per fidem, nunc verò refutat iustitiam ex operibus. Nam versu 21. capitis secundi refutat iustitiam ex operibus. vers. 6. capitis tertij & deinceps vsque ad vers. 10. duobus argumentis confirmat iustitiam ex fide. vers. 10. & deinceps refutat rursus iustitiam ex operibus.

Hanc disputationem duabus digressionibus interrumpit, quarum priore occupat argumentum aduersariorum contra propositionem iustitiam, ei-que respondet, à vers. 17. capitis secundi ad vers. 21. Posteriore autem ex indignitate egreditur in vehementem reprehensionem defectionis Galatarum, à versu 1. capitis tertij ad vers. 6. A vers. autem 15. capitis tertij ad vers. 7. capitis quinti demonstrat duas propositiones, principali illi propositioni de iustificatione per fidem, affines: prima est legem non abrogare promissionem, quam pertrahat à vers. 15.

capitis tertij ad vers. 23. capitis eiusdem : secunda est veniente fide legem non amplius esse pedagogum, vel, quod idem est, nos non amplius esse sub lege: sed legem nobis quodammodò esse abrogatam.

Hanc propositionem fusè ostendit à versu 23. capitis tertij ad vers. 7. capitis quinti. Ostendit autem eam dissimili conditione Iudæorum ante Christi aduentum & post eius aduentum, sub finem capitis tertij. Hanc dissimilem conditionem primum illustrat similitudine conditionis hæredis, à 1. versu capitis quarti ad vers. 8. Deinde eandem illam dissimilem conditionem docet per figuram quandam ex ipsa lege desumptâ: inde concludens nos non esse sub lege, sed sub gratia, à vers. 19. capit. quarti ad caput quintum.

Capite quinto ex doctrina illa de legis abrogatione infert exhortationem ad perseverantiam in libertate, in qua exhortatione immoratur ad vers. 7. Et hæc quoque tractatio digressionibus aliquot est interrupta: prima est in reprehensionem Apostasie Galatarum, qualis fuit etiam cap. 1. vers. 6. & deinceps, & cap. 3. vers. 1. & deinceps: qualis etiam habetur capite quinto, à versu 7. ad 13. (nam in hac epistola tam frequens est in reprehensionibus, ut incertum videri possit magisne ex instituto doceat an reprehendat) hæc digressio est à vers. 3. capitis quarti ad vers. 12. Altera est qua hortatur Galatas ad mutuum erga se amorem, à vers. 12. eiusdem capitis ad vers. 19.

Doctrinâ hanc de modo iustificationis sequitur do-

*Elrina parænetica de Christianis moribus, quæ pri-
mum generalis est à vers. 13. capitis quinti ad vers.
26. capitis eiusdem: deinde specialis à versu 26. capi-
tis quinti ad vers. 11. capiti sexti: quo loco conclu-
sio est epistola, in qua ad detegendum pseudoaposto-
lorum fucum & Galatarum animos à falsa ipso-
rum doctrina auocandos, instituta comparatione de-
pingit ante oculos Galatarum pseudoapostolo-
rum ingenium & suum, ad finem ca-
pitis simul & epistola
huius.*

ANALY-





ANALYSIS LOGICA IN EPISTOLAM

Pauli ad Galatas.

ANALYSIS CAP. I.

ARGUMENTVM.

Huius capituli tres sunt partes.

I. In prima parte est salutatio ad Versum sextum.

II. In secunda parte assertionem Apostolatus sui aggreditur, reprehendendo Galatarum inconstantiam,

eiusque authores pseudopostolos execrando ad Versum 13.

III. In tertia parte ad Apostolatuum suum assertionem historiam Vita sua antea acta contexxit, in qua persistit ad Versum 15. ca. 2.

CAP. I.

1 Paulus Apostolus (non ab hominibus, neque per hominem, sed per Iesum Christum, ac Deum Patrem qui suscitavit eum ex mortuis)

2 Quique mecum sunt omnes fratres, Ecclesis Galatia:

3 Gratia vobis & pax à Deo Patre & Domino nostro Iesu Christo:

4 Qui dedit semetipsum pro peccatis nostris, &c

aximeret nos ex presenti seculo malo, secundum voluntatem Dei & Patris nostri:

5 Cui sit gloria in secula seculorum. Amen.

Paulus] Salutatio, in qua consideramus *primùm* personas salutantes, *deinde* personas salutatas, *postremò* bona quæ à personis salutantibus optantur salutatis. *Persona salutans* prima est Paulus: cuius nomini adiectum est epitheton officij Apostolatus.

Non ab hominibus] Egreditur in descriptionem quandam Apostolatus sui in eum finem ut ipsum vindicet à contumelia aduersariorum qui Apostolatū Pauli in quæstionem vocârunt. Descriptio est Apostolatus ipsius à causis suis; causæ sunt Iesus Christus, & Deus pater. Explicantur causæ Apostolatus Pauli veræ à causis diuersis, & iis quæ causæ non sunt: siue quod idem est, explicantur causæ veræ κατ' ἀρ-
σιν & remotionem eorum quæ non sunt causæ. Sunt autem eæ homines nimirum ψιλοι & nudi: nam Iesus Christus etiam homo est, sed homo non tantum. Hominem arcet ab Apostolatu suo duplici respectu. *primùm* arcet eum ab Apostolatu suo, ut *primum* efficientem & authorem. *Non ab hominibus*, inquit, nempe ut primis authoribus Apostolatus mei.

Primi authores Apostolatus, & omninò vocationis cuiusque sunt, qui primi mittunt aliquem

quem in vocationem, & segregant quasi hominem mittendum ab aliorum hominum numero, eumque instruunt mandatis, ac reddunt functioni aptum. verbi gratia, Deus non tantum Apostolorum, sed & omnium in Ecclesia sua verè ministrorum primus autor est, quia ipse est qui solus segregat eos è reliquorum hominum numero, & satis instructos donis mittit ad officium quoduis obeundum in Ecclesia sua. Estque hæc prima pars vocationis nempe missio à primo autore profecta. De hac prima parte vide Rom. 12. 6. 7. *Habentes, inquit, diuersa dona pro gratia quæ vobis data est, siue Prophetiam, siue ministerium, &c.* Ergo prima pars vocationis consistit in dono & mensura gratiæ, quæ data est vnicuique. De hac quoque prima vocationis parte vide 1. Cor. 12. 28. *Et alios quidem constituit Deus in Ecclesia, primum Apostolos, deinde Prophetas, tertio Doctores.* Vide etiam de hac prima parte vocationis, Eph. 4. 11. *Dedit alios quidem Apostolos, alios Prophetas, alios Euangelistas, alios autem Pastores & Doctores.* De hac quoque vocationis parte prima vide Act. 1. 24. *Et preces dixerunt, tu Domine, qui corda omnium nosti, ostende vtrum ex his duobus elegeris.* Act. 6. 3. *Difficite ergo fratres ex vobis, &c.* vide quoque 1. Tim. 3. 2. *Oportet Episcopum irreprehensum esse.* & Tit. 1. 7. *Oportet Episcopum inculpatum esse, &c.* Prima enim pars vocationis, & prima quasi missio Dei, consistit in donis quibus instructum hominem se

gregat quodammodo è numero reliquorum ad functionem aliquam in Ecclesia sua obeundam. Donis istis ordinariè concessis non secus etiam hodierno die segregat homines ad ministerium suum, quàm olim in primitiua ecclesia datis donis extraordinariis, clara voce Apostolos suos segregauit, vt de Pauli, & Barnabæ segregatione legimus Act. 13.2. *Segregate mihi Barnabam & Saulum operi, ad quod eos aduocaui.* Est igitur prima hæc vocationis pars communis omnibus ministris in Ecclesia Dei.

Neque per hominem] Arcet deinde hominem ab Apostolatu suo, tanquam Apostolatus & vocationis ministerium, vel causam administram. Estque hoc prærogatiua muneris Apostolici, quòd cùm ordinarij in Ecclesia Pastores vocationem habeant suam aliqua ex parte per homines, hominūque ministerium; Apostoli non fuerunt ad functionem suam per hominum ministerium admissi, siue ordinati, sed per eundem illum Christum qui vocationis ipsorum autor primus extiterat. Quare Apostolorum vocatio tota fuit à Deo, neque subiecta fuit ordinariæ & receptæ consuetudini in instruendis Ecclesiæ ministris.

Sed per Iesum Christum] In descriptione Apostolatus sui designat potissimum causam quasi ministram, quia de ea controuersia fuit maximè. Nam hoc peculiare fuit Christi Apostolis, non quidem quòd à Deo tanquam primo

mo vocationis autore fuerint, hoc enim Apostolis commune est cum omnibus in Ecclesia verè ministris sed quòd per Deum fuerint, hoc est, quòd ordinatio quasi eorum & vt loquuntur, inauguratio, siue ad vocationem admissio per ipsum Deum, à quo primùm fuerunt missi, extiterit. Neque enim alium habuerunt missionis suæ authorem, aliumve ordinationis suæ ministrum: verum ordinatio eorum, vt sic dicam, extraordinaria fuit & à Deo immediatè: vnde dicuntur Apostoli, & ante eos Prophetæ, à Deo & ἀμείνω & immediatè vocati esse: quia nimirum per Deum tanquam ministrum vocationis suæ, non per hominem vocati sunt. In vocatione igitur Apostolorum, idem fuit autor & efficiens prima & causa administra. In vocationibus verò in Ecclesia ordinariis, alia est causa efficiens & principalis, nempe Deus, alia administra, nempe homo. *Iesum Christum* primùm nominat, deinde *Deum patrem*, non sine causa aliqua, vt videtur. Innuitur enim hoc ordine personam vocantem proximè fuisse filium Dei, verùm non vocatum Paulum à filio sine voluntate patris, à quo primùm profecta est Pauli vocatio & Apostolatus. Vnde in vtraque ad Corinth. epist. cap. I.V.I. dicit se *Apostolum Iesu Christi per voluntatem Dei*: nam Iesus Christus per spiritum suum proximè dat omnia dona hominibus, dat Apostolos, dat Prophetas, &c. vno verbo, dat spiritum

sanctum, & omnia spiritus sancti dona: verum dat ea, vt loquitur Christus Ioh. 15. 26. à patre suo tanquam spiritus & omnium donorum ipsius primo fonte. *Cum venerit, inquit, consolator, ille, quem ego mittam vobis, à patre, &c.*

Qui suscitauit eum] Breui hac Dei patris descriptione, non tantum innuitur Dei potentia quæ tum maximè apparuit quum suscitauit filium suum ex mortuis, Ephes. 1. 20. Rom. 1. 4. sed etiam gloria ipsius Christi, qua eum ipse deus pater affecit: nam tum primùm post mortem cœpit pater glorificare filium cum eum ex mortuis suscitauit. Atque hæc est illa gloria quam precatur, dari sibi à patre Ioh. 17. 1. *Pater, venit hora illa, glorifica filium tuum.*

2. *Quique mecum*] Secunda persona salutans, in genere comprehensa fratrum omnium nomine, qui vnà cum ipso Romæ erant.

Ecclesiæ Galatiæ] Personæ sunt salutatæ, nimirum particulares omnes Ecclesiæ Galatiæ, quæ fuit regio Asiæ minoris, quam Galli olim incolebant, quæ & Gallo-Græcia dicta est.

3. *Gratia vobis*] Hæc sunt bona quæ personæ salutantes optant salutatis, optant quidem ea ab Authoribus suis & fontibus, ex quibus solis promanant, *Deo patre* tanquam primo fonte omnium bonorum, vt qui sit prima illa gloriosæ trinitatis persona: & *Deo filio* tanquam secundo fonte omnium bonorum, vt
est

est secunda illa trinitatis persona. *Gratia* nomine intelligo per metonymiam, gratiæ Dei effectum, quam Paulus Rom. 5. 2. *gratiam* vocat *in qua stamus*. Est autem gratia reconciliationis cum Deo, & iustificationis, ex qua deducit Apostolus ibidem pacem erga Deum, hoc est, tranquillitatem & bonæ conscientiæ lætitiā. Hæc enim est illa *pax*, quam potissimum hoc loco optat Galatis, etsi hoc nomine prospera omnia alioqui significentur in vulgari illa Hebræorum salutatione.

4. *Qui dedit semetipsum*] Christi quædam descriptio subiecta est, ad hoc ut videant Galatæ eum quoque authorem ac fontem esse gratiæ ac pacis. Est autem descriptio Christi ex effecto illo tam voluntariæ donationis sui, ac traditionis in mortem pro peccatis nostris. Pater quidem tradidit pro nobis filium suum, Rom. 8. 32. verum ipse quoque filius voluntate sua se tradidit. Nisi enim voluntate sua pro nobis mortuus fuisset, profectò mors ipsius pro peccatis nostris iustitiæ patris non satisfecisset. Neque enim, nisi voluntaria fuisset mors Christi, obedientiæ nomine dici potuisset: nam obedientiam omnem oportet voluntariam esse. Ergo mors Christi pro nobis non tantum nobis expendenda est ac ponderanda ex eo quod Christus extrema omnia passus sit nostra causa; verum ex eo quod summa voluntate omnia passus sit, & sua sponte se exinanierit,

& obediens factus sit Patri ad mortem usque, mortem autem crucis, Philip. 2. 7. 8. &c. Neque tantum placet mors Christi Deo patri suo, ideo quod ex voluntate Christi hominis fuit (nam etiam Christus qua homo, summa voluntate mortuus est) sed multo magis quod ex voluntate λόγος & filij Dei fuit. Obedientia enim Christi maxime pedit ex voluntate ipsius, qua Deus est in persona filij, ut & inanitio illa deitatis in persona filij, & obscuratio quasi quædam diuinæ gloriæ in persona filij, quæ tunc temporis fuit, cum assumpta illa natura hominis passa est omnia, illa (inquam) inanitio deitatis in persona filij pro satisfactione, qua satisficit iustitiæ diuinæ, vel in primis habenda est.

Hinc igitur est quod mors Christi usque adeo placeat Deo patri, & pater in ea tanta quasi cum voluptate conquiescat. Hinc (inquam) est vel in primis, quod filius ut patrem glorificaret se exinanierit. Primum assumpta forma serui, &c. Deinde quod summa cum voluntate se exinanierit. Inde vulgo dicimus valorem sacrificij Christi tantum, tantumque ipsius meritum pendere ex dignitate personæ filij Dei, quæ σωματικῶς habitat in humana & assumpta natura. Satisfactionis enim & meriti ratio petenda est primum ex deitate in persona filij, ex voluntate deitatis illius, & ex exinanitione deitatis illius in persona filij submittentis se propter Patris sui gloriam.

Vt eximeret nos] Finis est facti Christi in tradendo se in mortem, est autē exemptio nostri, hoc est, electorum ex præsenti sæculo malo. In eundem hunc sensum dicitur, Act. 2. 40. *Servamini ex natione ista prava.* Hinc duo sequuntur, primū id quod habet Apostolus Ephes. 2. 3. *Nos olim versatos esse in offensis ac peccatis, Vt & reliquum mundum, nos omnes conuersatos esse in cupiditatibus carnis. Denique fuisse nos naturā filios iræ Vt etiam reliquos.* De hoc quoque vide Tit. cap. 3. 3. *Nam eramus quondam amentes, rebelles, &c.*

Deinde ex hoc loco apparet mortis Christi non hunc esse finem, vt omnes sine exceptione seruentur, etn̄ mors Christi alioqui in se sufficiens sit ad seruandos omnes citra exceptionem. Vnde ipse apud Iohannem cap. 12. 47. *Non Veni (inquit) Vt condemnem mundum, sed Vt seruem mundum,* etiam, si fieri possit, ipsos reprobos. Non enim stat per sufficientiam mortis Christi, quin omnes reprobi seruentur; verū si consilium Dei, & efficaciam mortis Christi, hoc est, ipsum effectum, quem reipsa in hominibus habet, spectes, finis mortis Christi magis propriè est vt eximat quos ab æterno elegit per vocationem efficacem in tempore, eximat (inquam) è reliquo mundo iam olim descripto ad damnationem, & exemptos iustificet, ac seruet.

Erga aliquo pacto duplicem mortis Chri-

si finem statuere possumus: *priorem*, vt omnes sine exceptione seruentur, vnde Deus dicitur *seruator omnium maximè fidelium*: Seruator, inquam, est omnium, si diuinæ voluntatis approbationem simpliciter spectes, & mortis Christi sufficientiam. *Posteriorem* dicere possumus finem, qui magis propriè finis est, id quod conspici potest, ex illis ipsis Apostoli verbis, eum dicit seruatore[m] esse maximè fidelium. Posterior ergo & proprius finis est, vt exemptos aliquot è reliquo mundo iustificet, & seruet. Hic finis pendet non ex approbatione Dei simpliciter, sed ex decreto efficaci, neque ex sufficientia tantum mortis Christi, sed ex efficacia. Quod ad mundum attinet testis est Apostolus 1. Cor. 11. 32. Mundum, hoc est, maiorem mundi partem & hominum multitudinem condemnatum iri. *A Domino*, inquit, *erudimur, ne cum mundo condemnemur*. Ergo mundus condemnabitur.

Secundum voluntatem] Exceptionem hanc & cōseruationem electorum etiam Patri tribuit, tanquam fonti primo omnium bonorum, quæ ad nos per Filium Iesum Christum perueniunt. Voluntas hæc Patris non est approbationis simpliciter, sed decreti, alioqui enim vult omnes saluos fieri, etiam ipsos reprobos, 1. Tim. 2. 4.

5. *Cui sit gloria.*] *ἵνα*, qua bene precatur Galatis, desinit in glorificationem Dei Patris: vt enim illis optat gratiam & pacem à Deo, ita Deo optat suam gloriam, & eam quidem æternam.

Gratia

Gratia enim Dei in homines, vt à Deo est, ita in Dei gloriam debet redundare. *Ex eo, & per eum, & in ipso sunt omnia, ipsi sit gloria in secula*, Rom. 12.36. Ex hac Apostoli optationis siue precationis formula, discimus concludendas esse preces nostras & petitiones omnes cum glorificatione nominis Dei, ac Dei illius à quo omnia petimus, vt vel ea re significemus nos non tam respicere bonum aliquod creaturæ, quàm creatoris & seruatoris gloriam, quam respicientes preces pro creatura fundimus, & ipsi bona à Deo exoptamus.

6 *Miror vos ita citò, deserto eo qui vocarat vos in gratiam Christi, transferri in aliud Euangelium.*

7 *Quod non est aliud: sed nonnulli vos turbant, & volunt inuertere Euangelium Christi.*

8 *Sed etiam si nos, aut Angelus è cælo euangelizet vobis præter id quod vobis euangelizauimus. anathema esto.*

9 *Vt antè diximus, etiam nunc iterum dico, si quis vobis euangelizauerit præter id quod accepistis, anathema esto.*

10 *Non enim vtrum homines an Deum suadeo? aut quæro hominibus placere? Enimuerò si adhuc hominibus placerem, Christi seruus non essem.*

11 *Notum autem vobis facio, fratres, Euangelium prædicatum à me, non esse secundum hominem.*

12 *Neque enim ego ab homine id accepi, neque edoctus sum, sed illud patefaciente mihi Iesu Christo.*

6. **M***iror vos ita*] Secunda pars epistolæ pariter & capitis, in qua agitur apologia & defensio Apostolatus sui. Orditur autem eam à reprehensione inconstantia, ac vanitatis Galatarum. Reprehensio aperta non est, qualis est postea cap. 3. 1. sed subobscura, & per admirationem (quæ est exclamationis quædam species) tractata. Ergo admiratur potius eorum inconstantiam in doctrina Euangelij à se prædicati, quàm reprehendit eam. Atque hæc mitigatio seueritatis illius qua meritò agere potuisset cum Galatis; admonet non temerè initium sermonis faciendum ab obiurgationibus & reprehensionibus, sed paulatim prima facie mouendos hominum animos, & silectendos, imò informandos ac instituendos in rei ipsius veritate: tum deinde veniendum esse ad seueriorem agendi rationem.

Non tamen hoc loco, ita sedato animo est Apostolus ac quieto, quin aliquam certè, & non mediocrem quidem eam, commotionem animi, & affectionem admiratione hac sua præ se ferat. Admiratio enim omnis, vt & exclamatio, existit ex vehementiori aliquò affectu: sententia admirationis est: *miror vos traductos esse à me in aliud Euangelium*, idque tam citò.

citò. Ergo admirationis causæ sunt, primum factum eorum, deinde facti celeritas: admiratur enim traductos ac translatos eos tam citò. Pro nomine suo habet circumscriptionem.

Deserto eo qui vocauerat vos] Atque id modestiam Apostoli commendat: neque dicit simpliciter translatos à se vocante, sed à se vocante *ad tantam gratiam*, quo significat non tam defectionem à se factam, quàm à gratia Christi, atque ita aggrauat eorum inconstantiam & ὑποστασίαν. Est igitur terminus vt loquuntur, à quo translationis & mutationis huius, Paulus, sed non simpliciter, verùm Paulus vocans ad gratiam Christi. Nam deficere à Paulo per se nihil est, at deficere à Paulo vocante ad gratiam Christi, graue est: id enim est non tam deficere à Paulo, quàm deficere ab ipsius Christi gratia. Vnde notandum, defectiones istas hominum in Ecclesia Dei non tam ponderandas esse ex ipsis hominibus, siue pastoribus siue aliis Ecclesiæ membris, quàm ex gratia hac ad quam vocant pastores, & quæ est in Ecclesia Dei.

Terminus autem ad quem, vt vocant, est *Euangelium aliud*. Notandum etiam hoc, quòd non tam dicat eos transfugisse actiuè loquendo, quàm translatos esse, passiuè loquendo, ea re inconstantiam eorum ac defectionem non tam imputans ipsis, quàm impostoribus pseu-

do apostolis, ideoque affectionem totam, quæ hoc versu duntaxat inchoata est, effundit postea in pseudoapostolos denunciato aduersus eos anathemate v.8.& 9.

7 *Quod non est aliud &c.*] Corrigit quod dixit proximè, in aliud Euangelium translatos ipsos, interpretatione quadam alius Euangelii: aliud enim quod dixit Euangelium non tam planè aliud & diuersum interpretatur, quàm vnum idemque Christi Euangelium, sed peruersum, & vt vim verbi sequamur, transuersum, hoc est, transuersum à sinceritate sua, in Euangelium quoddam mixtum, adiecta circumfusione, adeoque tota lege Mosaica. Vide Galat. 2.3. & Act. 15.1. & deinceps.

Notandum quòd pro eadem sumat hoc loco, hæc duo. *Nonnulli vos turbant, & volunt inuertere Euangelium Christi.* Nam ex his, posterius est prioris quædam definitio. Reuera enim turbantur homines, & cruciantur eorum conscientia. Denique impelluntur atque agitantur cum transferuntur à sinceritate Euangelii Christi, & ab illa pace ac tranquillitate animi, quæ est ex puro sinceròque Euangelio, vnde postea cap. 5. vers. 12. de impostoribus qui Euangelium inuertunt, ait, *utinam abscindantur qui vos inquietant:* hoc est, mutant animos vestros, neque sinunt quiescere in gratia sola, ac sinceritate Euangelii Christi. Neque enim stabiliri potest anima hominis, aut conquiescere,
nisi

nisi in sola Dei per Christum gratia.

Inuertere] Hoc idem videtur significare cum eo verbo quod habet 2. Cor. 2. 17. *cauponari*, & quod habet 2. Corinth. 4. 2. *falsare*. Nam inuertere Euangelium, quod dicitur hoc loco, nihil aliud est, quàm cauponari, vel falsare sermonem Dei, quod est, vt apparet 2. Cor. 2. 17. Non ex sinceritate de Christo loqui, hoc est, non proponere Euangelium Christi sincerum ac impermixtum, sed alia re aduentitia, & aduersaria admixtum, vt lege Mosaica, sapientia & philosophia humana. Atque hæcenus reprehendit, siue admiratus est potiùs Galatarum inconstantiam ac vanitatem. Ex qua illud semel discimus admirabilem esse hominum vanitatem in iis præsertim quæ sunt Spiritus Dei, & rebus religionis, quam tantam dicit esse Apostolus Ephes. 4. 14. Vt circumferantur homines quouis vento doctrinæ. Remedium huic malo vnum eodem ad Ephes. capite affert, perpetuum in Ecclesia Dei ministerium: apertè enim dicit: Ideò datos Apostolos, Prophetas, Euangelistas, Pastores & Doctores in hunc finem, ne simus ampliùs pueri, qui fluctuemus, & circumferamur quouis vento doctrinæ.

8 *Sedetiam si nos*] Totus hic locus patheticus est, & quidem variorum affectuum. Principio enim orationis suæ affectus fuit admirationis; nunc verò affectus est imprecationis,

vel execrationis. Execratio hæc, vt & superior illa admiratio, exclamationis quædam species est. Quare dicendum est, Apostolum persistere in incepta illa exclamatione, neque persistere modò, sed etiam exclamando altius allurgere. Nam imprecatio hæc siue execratio, sublimior est ac vehementior admiratione illa. Sed ad rem, vt priùs miratus est inconstantiam, ac vanitatem Galatarum, ita nunc execratur inconstantia illius ac defectionis auctores.

Execrationis sententia hæc est: *Si quis euangelizauerit vobis prater id quod nos euangelizamus, anathema est.* Verùm primùm est execratio specialis, & denunciatio in certas quasdam personas, sed hypothetica, vt sic loquar, non autem simplex: denunciat enim anathema in se, & in Angelum, non simpliciter, sed conditionaliter, *Si, inquit, nos aut Angelus è cælo, &c.* hypothetica hæc & conditionali denunciatione, etiam in Angelum subobscurè innuit quantum anathema, quanta execratio maneat homunciones Pseudoapostolos. Solet enim Paulus docendo, vel admonendo, vel etiam execrando, vt hoc loco, suam ipsius personam vel digniorem aliquam aliam substituere, ad hoc vt magis moueat, vel aliud quod minus est subinnuat: ita enim ipse profitetur 1. Cor. 4. 6. *Hæc autem, fratres, figurâ quadam transfuli ad meipsum & Apollo propter vos, vt in vobis dicatis supra id quod scriptum*

Scriptum est non sapere.

Anathema hoc, & execratio facilè perspicitur ex zelo Christi, & Euangelii ipsius existere. Nam qui zelo Dei eiusque gloriæ ducitur, animus eius accenditur, atque exacerbatur in diuinæ gloriæ aduersarium quemcunque, adeò vt & ipsum damnet & excretur, & ne sibi ipsi quidem parcat, si suppositione, & fictione animi pro aduersario reputetur. Imò verò qui zelo Dei gloriæ ducitur lubenter exitio sui ipsius, etiam non vt aduersarij, Dei gloriam vult redemptam. Id quod discimus exemplo Pauli, Rom. 9.3. quo loco imprecatur sibi propter Dei gloriam non autem tanquam aduersario: hoc verò loco sibi imprecatur vt aduersario quidem, sed ex hypothesi & fictione. Zeli enim in animo accensi hæc natura est: nihil est aliud quàm studium quoddam ardens, quo quis ducitur ad hoc vt seruet Deum ipsiusque gloriam sanctam ac inuiolatam. Vnde coniunctum est hoc studium cum ira in eum quicumque demum is sit, qui velit Deum ipsiusque gloriam violare. Coniunctum quoque est studium hoc cum contemptu, & neglectu omnium rerum, etiam sui ipsius, si comparatio fiat cum Deo eiusque gloria. Hæc duo coniuncta esse cum zelo & studio diuinæ gloriæ satis conspici potest, primum ex illo ad Roman. quem citauimus: deinde ex hoc ad Galatas loco.

Oritur igitur (vt verbo dicam) execratio hæc Pauli, ex ardenti illo studio Christi & Euangelij ipsius, quem zelum dicimus: Oritur quoque ex ardenti ira in aduersarios quoscunque, etiam Angelos ipsos, si fingas eos sinceritati Euangelij Christi aduersarios. Oritur igitur, vt in summa dicam, ex animo planè accenso, & corde exardesciente partim feruore zeli, & amoris Christi, partim feruore iræ in aduersarios Christi.

9. *Vt antè diximus*] Prout augefcit ardor animi, & duplicatur quasi affectus: ita repetitur execratio, & denunciatio anathematis. Differt autem anathema repetitum à superiore, quod cùm superius & speciale fuerit, & conditionale siue hypotheticum; posterius hoc, & generaliter, & simpliciter, hoc est, citra hypothesein propositum est. Ait enim in genere, *Siquis vobis euangelizauerit*, quasi dicat, Quicumque vobis euangelizauerit, ergo in anathemate hoc repetito comprehendit pseudoapostolos, & ipsum in pseudoapostolos apertius denunciatum est. Strauit autem sibi viam ad secundum hoc anathema, quod generalius est & simplicius, per prius illud & specius & hypotheticum, substituta nimirum personâ suâ & Angeli, vt videatur etiam pseudoapostolis ipsis denunciatio hæc non esse profecta ex odio vel ira in ipsos simpliciter, verùm ex Christizelo, cùm apertè illud significet in
superiori

superiori anathemate, sinceritatem Euangelij præferre se, etiam sibi, etiam Angelo, aduersus quem alioqui nefas est denunciare anathema. Vides igitur vel ex hoc ordine in denunciando obseruato, non ita affectu abreptum Apostolum vt locum aliquem prudentiæ non reliquerit.

• *Anathema*] De hoc verbo sæpius dictum est: significat autem quiddam separatum, ac sepositum à communi aliquo vsu ad vsum aliquem peculiarem & sacrum, vnde deuotum aliquid vel Deo vel etiam Diabolo & exitio, anathema dictum est. Paulus Roman. cap. 9. vers. 3. separationem hanc innuit, dum dicit anathema $\alpha \nu \theta \epsilon \mu \alpha \chi \rho \iota \varsigma \tau \omega$, quasi dicas anathema separatum à Christo.

10. *Nunc enim vtrum homines*] Affectus Apostoli ad summum perueniens in proxima execratione, nunc interrogatione hac paulatim quasi remittitur. Est enim etiam in hac interrogatione affectus aliquis, verum non ita intensus, sed paulò remissior. Per occupationem autem reddit rationem anathematis denunciati in quemcunque qui euangelizet præter id quod à se iam euangelizatum sit. Est autem ratio à fine sibi inter euangelizandum proposito; quasi dicat, Euangelizando hunc mihi finem propositum habeo, vt Deo, non autem hominibus, placeam. Ergo non absre & immeritò denuncio anathema in eos qui euan-

gelizant præter id quod ego euangelizauì.

Ex fine hoc subinnuit sinceritatem Euangelii à se prædicati, & vt loquitur 2. Corinth. 2. vers. 17. ex sinceritate se de Christo loquutum. Nam qui in agendo gloriam Dei inprimis ante oculos habet, is sincerè agit, qui verò gratiam hominum captat, is non agit aut loquitur sincerè. Ergo ex studio gloriæ diuinæ innuit sinceritatem Euangelii à se prædicati. Simul autem dum asserit Euangelium à se prædicatum, taxat pseudoapostolos, qui in euangelizando quærebant potiùs hominibus placere quàm Deo, id quod apertè significat Apostolus Gal. 6. 12. dum dicit doctores circumcisionis id spectare, ne ob crucem Christi persecutionem patiantur, hoc est, vt gratificarentur Iudæis atque ita effugerent persecutionem: sensus enim horum verborum videtur esse quasi dicat, Numquid in Euangelizando capto gratiam hominum, vt faciunt assentatores isti pseudoapostoli qui in gratiam Iudæorum, à quibus metuunt persecutionem, adulterant Euangelium Christi, eique circumcisionem, adeoque totam legem Mosaicam permiscant.

Ex hoc illud perspicitur, nihil tam sanctum esse quod non violabunt qui ad gratiam hominum omnia facere apud se decreuerunt. Porro *πειθεῖν ἀνθρώπους* nihil aliud videtur esse, quàm quod sequentia verba explanant, *placere*, vel *satisfacere hominibus*: phrasis hæc, vel in bo-

nam

nam vel in malam partem capitur: In bonam quidem 2. Corinth. 5. 11. *Scientes, inquit, terrorem illum Domini ἀνθρώπους πείθομεν*, id est, *homines ad fidem adducimus*: hoc verò loco in malam partem capitur, & est seruire humano affectui & ad gratiam loqui.

Enimverò si adhuc hominibus] Intelligenda hîc est tacita negatio, qua Apostolus negat se quærere vt placeat hominibus. Nam ratio per Dialogismum & communicationem tractatur: Similem reticentiam negationis, vide Rom. 4. 1. 9. Ratio autem tacitæ responsionis, quæ est quod non quærat hominibus placere: ratio (inquam) eius est, ab incommodo consequente contrarij, hoc est, quod consequeretur ex eo, si quæreret hominibus placere, est autem incommodum quòd Christi seruus non esset, sed potius seruus hominum, & hostis crucis Christi, vt loquitur Philip. 3. 18. Nota igitur, non posse consistere hæc duo, vt nimirum quis faciat aliquid ad gratiam hominum simul & gloriam Dei.

II. *Notum autem facio*] Altera ratio est execrationis quam confidenter, & μὴ παρρησίας proponit, aitenim γινώσκω ὑμῖν, quæ formula est loquendi ad eos propriè pertinens, qui cum authoritate aliqua & fiducia loquuntur. Est autem ratio à forma & modo prædicati à se Evangelij: non est, inquit, κατ' ἀνθρώπου, hoc est, humano more, vel humano spiritu à me præ-

dicatum Euangelium, verum diuino more ac diuino spiritu. Similem loquutionem vide Rō. 5.5. κατ' ἀνθρώπον λέγω. 2. Cor. 10.3. eodem sensu videtur dicere se non κτ' σάρκα bellum gere, sed arma militiæ suæ diuinitus valida esse. Ergo sententia argumenti est, quod Euangelium à se prædicatum non sit humanum quiddam, aut sapiat spiritum humanum, hoc est, quod in prædicando Euangelio non sit ipse loquutus ex humano sensu ac spiritu. Hinc sequitur non immerito denunciatum esse anathema aduersus eos qui euangelizent, præter id quod ipse euangelizauit.

12. *Neque enim ego*] Ratio est cur euangelium à se prædicatum non sit secundum hominem, ab extraordinaria reuelatione Euangelij à se prædicati. Tractatur autem ratio à diuersa traditione, & doctrina humana ac ordinaria. Non (inquit) accepi illud ab homine, hoc est, docente ac erudiente me tanquam discipulum, vt verba sequentia exegeticè exponunt, quibus dicit, neque edoctus sum de ordinaria hac docendi ac discendi ratione, vide 2. Tim. 3.14. At tu (inquit) permane in iis quæ didicisti, &c.

Sed patefaciente] Apocalypsin hanc siue reuelationem intelligit extraordinariam, quæ fit immediatè per Christum ipsum: ordinaria etiam reuelatio per Christum fit, eiusque Spiritum, sed mediatè per ministerium humanum, & media à Deo ordinata, vt lectionem, auditionem, &c.

&c. Nota igitur vt vocatio Apostolorum extraordinaria fuit, per Christum ipsum immediatè, ita cognitionem eorum, & dona ad vocationem pertinentia, eamque confirmantia extraordinaria fuisse, & per Christum ipsum immediatè subministrata.

13 *Audiuistis enim quomodo versatus sim olim in Iudaismo, me videlicet summè persequutum esse Ecclesiam Dei & eam vastasse:*

14 *Et profecisse in Iudaismo super multos aequales meos in genere meo, cum vehementiore studio tenerer traditionum quas à patribus meis acceperam.*

15 *Sed quando placuit Deo, qui separauit me ab utero matris meae, & vocauit per gratiam suam,*

16 *Retegere Filium suum in me, vt euangelizarem ipsum inter Gentes, non statim contuli cum carne & sanguine:*

17 *Neque redij Hierosolymam ad eos qui ante me fuerant Apostoli, sed abij in Arabiam, ac denuò reuersus sum Damascum.*

18 *Deinde tribus post annis redij Hierosolymam, vt viserem Petrum: & mansi apud eum dies quindecim.*

19 *Alium autem ex Apostolis non vidi quenquam, nisi Iacobum fratrem Domini.*

20 *In iis porrò quae scribo vobis, ecce coram Deo non mentior.*

21 *Deinde Veni in regiones Syriae & Ciliciae.*

22 *Eram autem ignotus facie ecclesiis Iudaea*

qua erant in Christo:

23 *Sed solum audierant*, qui dicerent, *Qui persequabatur nos aliquando, nunc annuntiat fidem quam olim vastabat:*

24 *Et glorificabant Deum de me.*

13. **A** *Udiuistis enim*] Vt ostendat quod dixit proximè, non accepisse se Euangelium suum ab homine, neque edoctum esse, sed per reuelationem Iesu Christi, historiam vitæ suæ antea ctæ contexit, cuius in genere duæ sunt partes. *Prima* est de vita, ac conuersatione Pauli in Iudaismo, ad versum 15. huius capitis. *Secunda* est de vita & conuersatione Pauli in Christianismo, ad versum 15. cap. sequentis. Quod ad historiam conuersationis in Iudaismo, primum hoc versu est eius propositio generalis confirmata ipsorum Galatarum testimonio, quasi dicat, nam hæc fuit mea olim in Iudaismo conuersatio, cuius & vos testes estis saltem auriti: famâ enim & sermonibus hominum ad vos delata est.

Me videlicet] Propositam in genere conuersationem suam in Iudaismo explicat per partes, quarum hæc est prima, quod summè persecutus sit Ecclesiam Dei. De persecutione Pauli lege Act. 8. 3. & 9. 1. & c. & 22. 4. 5. & 26. 9. & c. itè 1. Cor. 15. 9. 1. Tim. 1. 13. Philip. 3. 6.

Et eam vastasse] Secunda pars conuersationis Pauli quæ est superioris quædam amplificatio:
nam

nā ad vastationem processit persecutio, hoc est, ad subuersionē Ecclesię. De vastatione hac vide Act. 8. 3. quo loco eam definit ex effectis: *Saulus*, inquit, *vastabat Ecclesiam, intrans in singulas domos, & trahens viros ac mulieres, tradebat eos carceri*; & Act. 22. 4. vastationem significat per persecutionem vsque ad mortem, hoc est, extremam persecutionem. Notādum autem ex hoc candore in scribendo, quod ne sibi quidem parcat: Paulum in scribendo non à spiritu humano actum, sed à Spiritu Dei sancto, vt loquitur Petrus 2. Epist. 1. 21. de Prophetis Dei veteribus, ac proinde scripturam hanc ex imperio Dei esse, vt ait Paulus Rom. 16. 26. adeoque ipsum Dei verbum. De nemine enim legimus qui à spiritu tantum humano actus est, quin in scribendo sibi ipsi pepercerit, & vitia sua celauerit.

14. *Et profecisse*] Tertia pars conuersationis, progressus omnino quem fecit in Iudaismo: proponitur per comparisonem minorum, factam nimirum cum multis ex æqualibus, & cōtaneis in genere suo, hoc est, in secta Pharisæica: erat enim religione Phariseus, Philip. 3. 5. Act. 23. 6.

Quum vehementiore studio] Profectum suum ac progressum quem fecit in Iudaismo explicat à causa sua, affectu nimirum zeli quo tenebatur traditionum patriarum: zelum hunc quoque proponit per comparisonem mino-

rum factam cum coactaneis in genere suo: nam quo ardentiori zelo tenebatur eo maiores quàm coactanei progressus fecit in Iudaismo. De zelo Pauli vide Act. 22.3. & Phil. 3.6. zelum hunc in Iudaismo, iam conuersus, furorem quendam appellat Act. 26. 11. *Supra modum*, inquit, *furens aduersus eos, persecutus sum in exteras usque ciuitates*: ex ignorantia dicit fuisse ac infidelitate 1. Tim. 1.3. quemadmodum & obstinatorum Iudæorum zelum, zelo illi suo similem, dicit non fuisse ex notitia, Rom. 10.2.

Traditionum quos à patribus] Act. 22.3. vocat patriam legem, quas hîc vocat traditiones à patribus acceptas, hoc est, traditiones Pharisaicas. Non enim ipse solùm Phariseus erat, sed etiam Phariseo patre natus, Act. 23.6. *Ego Phariseus sum, filius Pharisei*. Nota ex hac tertia parte conuersationis Paulinæ: causam cur quis proficiat in quacunque religione esse zelum Dei, siue is ex notitia sit, siue ex ignorâtia, Profectum autem hunc in religione non metimur tantùm ex cognitione, sed multò magis ex vita, & defensione religionis quam profitemur, & oppugnatione aduersariorum. Hunc profectum Pauli intelligimus fuisse: nam hunc affectum zeli sui ipse testatur fuisse Philip. 3.6. *Quod ad zelum attinet, persequens Ecclesiam*. Atque hætenus fuit prima pars historiæ vitæ Pauli antea actæ in Iudaismo, qua viam sibi strauit ad sequentem historiam vitæ in Christianismo,

quæ

quæ maximè huius instituti est, pertinetq; ad id ostendendū quod propositū fuit suprà vers. 12.

15. *Sed quando placuit Deo*] Hic incipit secunda pars historiæ vitæ Pauli transactæ in Christianismo, cuius rursus varia sunt membra. Primum est ab hoc versu, ad versum 18. in quo istud in summa narratur: post reuelationem illam Christi extraordinariam, non communicasse se rem illam cum vlllo hominum, hoc est, non accepisse se hominum approbationem & consensum antequam iret prædicatum Euangelium. Reuelationem Christi ascribit bene placito, & *ἐκ δυνάμει* Dei. *Quando*, inquit, *placuit Deo reuelare filium suum*: qua quidem re excludit omnem causam huius beneficii & reuelationis quæ in seipso sit, & beneficium Deo tantum acceptum refert. Nam omnium beneficiorum Dei, siue ea ab æterno collata sint, siue in tempore conferantur, causa est in ipso Deo tantum, & ipsius Dei *ἐκ δυνάμει*. vide Eph. 1. 5. & deinceps, non etiam in nobis operibus vel meritis nostris: atque hac re voluit commendare nobis gloriam gratiæ suæ vel inprimis: vnde Eph. 1. 16. postquàm dixisset, Deum nos prædestinasse in sese, hoc est, pro *ἐκ δυνάμει* sua, statim subiecit, *ad laudē gloriæ gratiæ suæ*, quo significare voluit vel ideo inprimis commendari gloriam gratiæ Dei, quòd nos in sese & pro *ἐκ δυνάμει* sua, sine respectu alicuius causæ in nobis, prædestinauerit ad vitam æternam.

Qui separauit] Obiter quasi altiora reuelationis huius fundamenta iacit, idque ad maiorem beneficij amplificationem, & commendationem. *Primum* fundamentum reuelationis Christi, est separatio Pauli iam inde ab æterno: quo significatur electio ipsius ab æterno. Simile quid lege de Ieremia Propheta, Ierem. i. 5. *Secundum* fundamentum est vocatio in tempore, quæ nihil aliud est, quam complementum & executio separationis, & electionis illius ab æterno. Primum enim Deus decreto suo separat, eligit, & vocat nos ab æterno: deinde in tempore decretum illud vocationis exequitur, nosque re ipsa vocat.

Vide hoc loco vt Apostolus dum instituit mentionem vnius beneficij, nempe beneficij reuelationis Christi, abripiatur quasi in considerationem beneficiorum antecedentium iam inde ab æterno; quo quidem admonemur beneficium aliquod Dei quod in præsens confertur, altiora perpetuò habere fundamenta, adeoque à gratia Dei quæ ab æterno fuit, pendere, atque ideò debere nos non duntaxat oculos figere in præsentis aliquo beneficio, sed ferri altius in considerationem, & si opus sit, commemorationem beneficiorum illorum ex quibus præsens illud beneficium dependet, vt & Deo sit maior gloria in beneficiis suis, & in nobis ipsis sit maior lætitia.

16. *Retegere filium suum in me*] Reuelatio hæc

hæc extraordinaria est, id quod indicant verba illa *in me*, quibus significatur reuelationem hanc intus, & in animo ipsius, per Christum, immediatè factam, non autem extrà per hominem aliquem, vel per ministerium humanum, atque hoc est quod dixit versu primo, se Apostolum non per hominem. Nota hîc discrimen inter Apostolos, qui extra ordinem vocati sunt, & ordinarios in Ecclesia pastores. Apostoli tantùm *θεοδιδασκῆται* erant, hoc est, docti à Deo tantùm, pastores verò non solùm *θεοδιδασκῆται* sunt, & docentur intrinsecus per spiritum Deum sanctum, sed etiam extrinsecus hominum opera erudiuntur, & ordinariis mediis (vt doctrina, vt scripturarum lectione) ad cognitionem perueniunt. Deus enim & in veteri Ecclesia, & in noua, voluit primùm extraordinariam reuelationem esse, deinde ordinariã. Prima enim reuelatio in veteri Ecclesia extraordinaria est, secūda ordinaria, qua docetur homines, & discunt deinde ea quæ aliis hominib. à Deo extra ordinẽ, & immediatè reuelata sūt.

De hoc intereà admonemur, non ampliùs fore reuelationem aliquam extraordinariam, neque à nobis expectandam esse ad Christi secundum aduentum vsque, in quo erit plena illa patefactio & reuelatio: voluntas enim Dei, quantum nostrâ interest scire, plenè perfectèque reuelata est in veteri & noua scriptura, idque extra ordinem, primùm

Prophetis & Apostolis, adeò vt nobis tantùm reliquum sit quod faciamus in hac vita, vt per ordinaria media proficiamus in iis quæ iam reuelata & patefacta sunt.

¶ Teuangelizarem] Finis est extraordinariæ reuelationis factæ Paulo, vt nimirùm gentes per ipsius ministerium, & ordinariè id acciperent atque discerent, quod ipse extraordinariè & per Christum immediatè accepit atque didicit. Gratiam Dei extra ordinem sibi in gratiam Gentium datam esse ipse profitetur Ephes. 3.2. Nota igitur: Etsi non visum sit Deo se Ecclesiæ suæ, & omnibus Ecclesiæ membris extra ordinem reuelare, tamen extraordinariam illam reuelationem certis quibusdam, prout ipsi visum est, Ecclesiæ membris factam, ad Ecclesiæ totius vsum pertinere: & propter Ecclesiam, eiùsque membra singula factam esse: vnde Apostolus 1. Cor. 3.21. *Omnia*, inquit, *vestra sunt, & Paulus, & Apollos, & Cephas, & mundus, &c.* Vide de hac re 1. Cor. 12.1. &c.

Non præterea contuli] Hæc est summa propositio primæ partis hystoriæ vitæ Paulinæ in Christianismo. Nam quæ sequuntur ad vers. 18. ad hanc sententiam declarandam pertinet. Sensus est, quasi dicat, contentus extraordinaria hac Christi reuelatione tanquam sufficiente ad munus Apostolicum obeundum, non præterea communicaui cum vlllo hominum, aut requisiui consensum vel approbationem vllius

lius hominis, ac si non satis instructus essem v-
nica illa extraordinaria Christi reuelatione.
Ergo, vt verbo dicam, his verbis innuit Aposto-
lus, non quæsiuisse se post illam reuelationem
Christi, doctrinæ ac cognitionis suæ confirma-
tionem, quam vocant, aut ratificationem ab ul-
lo mortalium. Nam hoc discriminis est inter
Apostolum & Pastorem, quòd cùm Apostolus
non acceperit ab hominibus, vel ab Ecclesia ap-
probationem doctrinæ suæ extra ordinem re-
uelatæ, neque subiectus fuit hominum iudicio,
vel censuræ, quasi in doctrina errare potuerit.
vide Corint. Cor. 4.3. quo loco videtur Aposto-
lus, omnium hominum iudicium declinare. Pa-
stor verò in Ecclesia ordinarius, quantumuis e-
ruditus, & omnium rerum cognitione instru-
ctus, non adeat munus prius, quàm confirma-
tionem & approbationem doctrinæ suæ ab Ec-
clesia acceperit.

Carne &] Carnis & sanguinis nomine in-
telligit hominem fragilem ac infirmum, er-
roribus obnoxium: ex partibus enim hominis
quæ fragilitatem significant ac important, ma-
luit hominem designare quàm ex nomine suo;
vocabula enim carnis & sanguinis sonant infir-
mitatem creaturæ. Eph. 6.12.

17. *Neque redij Hierosolymam*] Declaratio est
præcedentis sententiæ ex profectione Pauli, &
itinere statim post reuelationem illam Christi
extraordinariam suscepto. Profectionem suam

explicat diuersis, primúmque narrat quòd non sit profectus; deinde quòd sit profectus: quod ad primum, ait, non redij Hierosolymam.

Ad eos qui ante me] nempe, vt cum Apostolis Christi conferrem: Non redii, inquit, Hierosolymam, quia hinc profectus est Damascum ad synagogas, vt si quos inuenisset sectæ Christianæ, tum viros, tum mulieres, vinctos duceret Hierosolymam Act. 9. 2.

Qui ante me fuerunt Apostoli.] Erat enim Paulus Apostolorum vltimus 1. Cor. 15. 8. *Vltimo verò omnium velut abortiuo visus est etiam mihi:* & versu 9. ibidem, non vltimum solùm, & nouissimè vocatum profitetur, sed etiam Apostolorum minimum, imò non dignum qui vocetur Apostolus, & Eph. 3. 8. non modò Apostolorum minimum, sed & omnium sanctorum longè minimum se profitetur.

Sed abij in Arabiam] Nunc ostendit quòd profectus sit statim post extraordinariam illam Christi reuelationem, Abij, inquit, in Arabiam: desertam intellige, vbi nondum nominatus erat Christus.

Ac denuò reuersus sum Damascum] è qua nimirum abij in Arabiam. Ex hac Pauli profectiōe illud intelligitur, quod declarandum suscepit, non statim post reuelationem illam Christi còtulisse se cum carne & sanguine. Nam si animus fuisset conferre cum carne & sanguine, rectà Hierosolymam ad Apostolos rediisset, at non

rediit

redit Hierosolymam, sed abiit in Arabiam primam, ac denuò reuersus est Damascum, vnde exiit: Ergo non statim contulit cum carne & sanguine.

Nota de industria susceptum esse hoc iter ab Apostolo, ne haberent aduersarij quod obijcerent aduersus ipsius Apostolatam. Si enim Hierosolymam statim reuersus fuisset, vel inuisendi Apostolos tantum causa, non conferendi cum iis, aut communicandi gratia, profectò egregiam hinc nacti sibi visi fuissent aduersarij occasionem vocandi in dubium eius Apostolatam: quamobrem Pauli exemplo abstinendum est etiam ab iis rebus & actionibus quæ alioqui licitæ sunt, ac legitimæ, ne demus aduersariis occasionem calumniæ, ac iniustæ accusationis: Nam, vt ait Apostolus Ephes. 5. 15. Videndum est quomodo accuratè incedamus, non vt insipientes, sed vt sapientes, redimantes occasionem, quoniam dies mali sunt.

18. *Deinde tribus*] Secunda pars historiæ conuersationis Pauli in Christianismo, continet autem reditum eius Hierosolymam post aliquot annos, nimirum tres. Triennij huius Lucas in Actis Apostolorum non expressè meminit, tantum hoc habet de tempore in genere Act. 9. 23. *Expleto autem multo tempore.* Hic videtur intelligendum illud triennium, quod intercessit inter conuersionem Pauli, & reditum eius Hierosolymam versus. Nam anno demum

post conuersionem quarto incunte, Hierosolymam rediit.

Vt Viserem Petrum] Hunc finem inuisendi Petri consultò expressit, ne putaretur Hierosolymam reuersus eo fine vt cum Petro conferret.

Et mansi apud] Narrat quàm breui tempore apud Petrum manserit, quò significet se à Petro non edoctum: neque enim eruditur aliquis in re aliqua nisi satis longo tempore.

19. *Alium autem ex.*] Hoc narratur, per occupationem, dici enim potuit, an non vidisti Hierosolymis nisi solum Petrum? respondet se non alium vidisse ex Apostolis excepto Iacobo: paucitas enim ista Apostolorum quos conuenit Paulus Hierosolymis huc pertinet, vt ostendat non contulisse se cum Apostolis, aut ab iis prætereà edoctum fuisse, nam illud opus omnium Apostolorum præsentiam ac sententiam postulasset.

Iacobum fratrem Domini] Hic fuit non Zebedæi filius, Iohannis Apostoli frater, sed Alphæi filius, qui & Iacobus minor, & iustus, & frater Domini, hoc est cognatus, secundum Hebraicam phrasin, dictus est. Is est qui hanc Epistolam Iacobi Apostoli nomine inscriptam ad duodecim tribus dispersas scripsit Act. 9. 27. Habes Paulum à Barnaba deductum ad Petrum & Iacobum, quo etiam loco habes sermonem illum à Paulo cum Apostolis collatum, post-

postquam ad eos adductus esset: narrauit, inquit, quomodo in via vidisset Dominum.

20. *In iis porrò quæ*] Obiter quasi inferit narrationi attestationem, id nimirum exigente rei quæ agitur grauitate ac pondere: eoque tendit hæc attestatio, & appellatio Dei, vt fides narrationi habeatur. Permittitur autem in rebus magni momenti exponendis ac narrandis Deum attestari, vt fides dicto habeatur. Quia igitur permagni intererat ipsos Galatas fidem habere huic narrationi, quâ confirmauit Apostolatuum suum, ideò narrationem hac attestatione illis comprobauit. Vide similem attestationem Rom. 9. 1. *Veritatem dico per Christum, non mentior.*

Nota igitur quemadmodum in prima illa parte historiæ vitæ suæ in Christianismo ostendit non contulisse se cum carne & sanguine ex eo quòd non Hierosolymam ad Apostolos, sed aliò se contulerit statim post illam reuelationem Christi extraordinariam: ita in hac secunda parte idem ostendit ex eo quòd reuersus tandem Hierosolymam dūtaxat inuiserit Petrum, non manserit apud eum nisi dies paucos, non viderit alium quenquam ex discipulis nisi Iacobum.

21. *Deinde Veni in*] Tertia pars historiæ vitæ Pauli in Christianismo: continet autem profectiōem eius in Syriam, & Ciliciam. Act. 30. narratur cum Hierosolymis deductum Cæsa-

ream, & deinde Tarsum emissum. Sunt autem Cæsarea & Tarsus vrbes Ciliciæ. Ergò Paulus ipse hoc loco meminit regionum in quas profectus est; Lucas autem particularius vrbes Ciliciæ designauit, in quas profectus est. Porro natus est Paulus Tarsi, vt ipse de se testatur. Act. 22. 3. enutritus verò est Hierosolymis ad pedes Gamalielis, ibidem. Occasionem profectionis huius in regiones Syriæ primùm, deinde Ciliciæ, habes Act. 9. 29. 30. vbi ait liberè nomine Domini Iesu loquutum esse, & disceptasse Paulum aduersus Iudæos, aduersus Græcos qui Hierosolymis erát, ideóque conatos eos ipsum interimere, qua re deinde cognita à fratribus, eum deductum esse Cæsaream, & inde Tarsum venisse: ergo persecutio vrgebat profectiorem istam in regiones Syriæ, & Ciliciæ, quemadmodum & illam superiorem quæ fuit Damasco Hierosolymam Act. 9. 23. 24. &c. Factum est autem profectiione hac Pauli, vt latiùs diffunderetur Euangelium Christi. Sic solet Christus hostium rabie ad propagandum regnum suum abuti. Vide Act. 8. 1. &c.

22. *Eram autem ignotus*] Profectiorem, vel potiùs commorationem suam in regionibus Syriæ & Ciliciæ, commendat testimonio Ecclesiarum Christi quæ in Iudæa erant. *Illæ*, inquit, *glorificabant Deum de me*, ex eo autem amplificat hoc testimonium Ecclesiarum Iudaicarum, quòd ipse non nisi fama, & sermonibus hominum

num Ecclesiis illis cognitus fuit. Amplificat igitur hoc Ecclesiarum testimonium de Paulo, quod glorificarent Deum de homine, alioqui sibi ignoto, hoc est, facie ignoto, fama tamen cognito. Nota igitur hoc loco, glorificandum Deum esse de instrumentis illis Dei illustribus, & quasi luminaribus totidem, quæ à Deo excitantur ad præbendum lumen cognitionis gloriæ Dei in facie Iesu Christi, ubicunque locorum degant, & quantumcunque nobis ignoti sint facie. Satis nobis sit quòd audiamus eos tanto cum fructu Euangelium Christi annuntiare.

23. *Qui persequebatur nos*] Notanda hîc est glorificationis huius causa, quæ non in eo sita est, quòd Paulus annuntiârit simpliciter doctrinam fidei, sed in eo quòd is, qui aliquando persequebatur doctrinam fidei euaserit nunc prædicator, non doctrinæ quidem alius cuiusdam, verùm eiusdem illius, quam olim persequebatur ac vastabat. Nota ergo: Paulus ex persecutore factus est prædicator, & prædicator quidem eiusdem doctrinæ quam persecutus est.

Glorificatur quidem Deus tum cùm quivis annuntiat doctrinam fidei, at verò magis glorificatur cùm is qui antea persecutus est eam doctrinam, eandem postea annuntiat. Doctrina hæc latius extendi potest hoc modo: Glorificatur quidem Deus salute cuiusvis hominis: at magis glorificatur salute & conversione eius

hominis, qui prius apertum quasi bellum Deo indixit: nam in eo relucet clariùs Dei misericordia: cùm enim peccatum abúdat tum gratia superabúdat: & quò quis grauiùs peccauerit in Deũ, eò iam conuersus ad Deũ euadit illustrius exemplum misericordiæ diuinæ. Hinc Paulus 1. Tim. 1. 16. prædicat se factum exemplum esse credituris Deo in vitam æternam, exemplum autem id eò factus est quia priùs erat blasphemus, persecutor & iniuriosus.



ANALYSIS CAP. II.

ARGUMENTVM.

I. Hoc capite primum persistit in historia illa Vita sua in Christianismo transfacta ad Vers. vsque 15. quo loco transitione facta Versu 15. Et priori parte Versus 16. tandem posteriori parte eiusdem Versus proponit, non iustificari hominem ex operibus.

II. A Versu 17. ad 21. digressio est, qua occupat argumentum quoddam aduersariorum contra propositionem illam iustificationis per fidem, eique respondet.

III. Versu autem 21. primum argumentum est quo ostendit, ex operibus legis non iustificari ullam carnem.

CAP. II.

I. Deinde interiectis annis quatuordecim, rursum ascendi Hierosolimam una cum Barnaba, assumpto simul & Tito.

2 Ascen-

2 Ascendi autem ex reuelatione, & exposui eis Euangelium quod prædico inter Gentes: sed priuatim cum eis, qui sunt in pretio, ne quo modo frustra currem aut cucurrissem.

3 Sed neque Titus qui mecum erat, quum esset Græcus, coactus fuit circumcidi.

4 Nempe propter emissarios falsos fratres, qui irrepserant ad explorandam libertatem nostram quam habemus in Christo Iesu, ut nos in seruitutem adigerent.

5 Quibus ne ad momentum quidem cessimus per subiectionem, ut veritas Euangelij permaneret apud vos.

6 Ab iis autem qui existimantur esse aliquid, qualescunque fuerint, nihil mihi discrepat, personam hominis Deus non accipit: Nam qui sunt in pretio, nihil mecum præterea contulerunt.

7 Imò è contrario, quum vidissent mihi creditum fuisse Euangelium præputii, sicut Petro circumcisionis.

8 (Nam qui efficax fuit per Petrum ad Apostolatam circumcisionis, efficax fuit etiam per me erga Gentes)

9 Quumque cognouissent gratiam mihi datam Iacobus & Cephas & Iohannes, qui aestimantur esse columna, dextras dederunt mihi & Barnaba societatis: ut nos inter Gentes, ipsi verò inter circumcisos, Apostolatu fungeremur.

10 Solùm monuerunt ut pauperum meminissimus: quod & ipsum studui facere.

11 *Quum autem venisset Petrus Antiochiam, in os ei restiti, eò quòd condemnandus esset.*

12 *Nam antequam venissent quidam à Iacobo, Unà cum Gentibus edebat : quum autem venissent, subduxit sese ac sepiravit ab eis, metuens eos qui erant ex circumcisione.*

13 *Ac simulabant Unà cum eo reliqui etiam Iudaei: itaque etiam Barnabas simul abreptus fuit in illorum simulationem.*

14 *Sed quum vidiissem eos non recto pede incedere, ut veritati Euangelij congruebat, dixi Petro coram omnibus. Si tu, quum sis Iudaeus, Gètiliter vivis, ac non Iudaicè, cur gentes cogis iudaizare?*

D *Einde interiectis*] Hæc quarta pars est historiae vitæ Pauli in Christianismo ad versum vsque 11. Continet autem profectionem eius Hierosolymam versus, simul & id quod ab eo Hierosolymis agente factum est : proponit itaque hoc versu profectionem suam. *Deinde, inquit, ascendi rursum Hierosolymam.* Propositio non nudè subiecta est, verùm amplificata est, primùm, adiuncto tempore ascensionis. Deinde, adiuncto comitatu, *Unà cum Barnaba, inquit.* Tertiò, causa ascensionis impellente, principiò versus 2. *Ascendi, inquit, ex revelatione.*

Interiectis annis] Hi anni numerandi esse videntur, non quidem inde à conuersione Pauli, verùm à primo reditu Hierosolymam, qui fuit post

post conuersionem tribus annis. Vide cap. i. 18. Atque ita hæc, de qua nunc loquitur, ascensio videtur fuisse anno post conuersionem 17. In Actis Apostolorum legimus, Paulum post conuersionem suam, omninò quatuor temporibus reuersum Hierosolymam. Primus reditus fuit Damasco, tribus annis post conuersionem Act. 9. 26. Gal. i. 18. De secundo legimus Act. 11. 30. cuius Apostolus ipse non meminit ad Galatas. De tertio legimus Act. 15. 3. De quo habetur ad Gal. 2. 1. De quarto legimus Act. 21. 17. qui & vltimus fuit, cuius etiam ad Gal. nulla fit mentio. Ergo hoc loco intelligendus videtur tertius ille Apostoli reditus Hierosolymam versus.

Vnà cum Barnaba] Hic est Barnabas ille qui Paulum quo tempore primùm reuersus est Hierosolymam acceptum duxit ad Apostolos, Petrum & Iacobum Act. 9. 27. qui deinde abiit Tarsum, vt requireret Saulum, & eum inuentum duxit Antiochiam Act. 11. 25. Qui etiam vnà cum Paulò missus est Antiochia Hierosolymam: in secundo Pauli reditu Act. 11. 30. Separatus etiam est cum Paulo ad prædicandum gentibus, Act. 13. 2. De Pauli autem & Barnabæ peregrinatione inter gentes, eas nominatim, quæ fuerunt in Asia minori, lege inde à cap. 13. Actorum, ad cap. vsque 15. Barnabas etiam simul cum Paulo missus est Antiochiâ Hierosolymam, percontaturus de quæstione circumcisionis, quam Iudæi quidam obtrudebant An-

tiochenis, Act. 15. 1. 2. Et hoc loco tandem Paulo separatus est propterea quod de Marco inter ipsos non conuenerat. Act. 15. 36. & deinceps. Ante illud tempus perpetuè erant peregrinationis socij, verùm tum primum interueniente illo dissidio separati sunt, ita tamen ut Deus eorum dissidio ac separatione ad Ecclesiæ suæ ædificationem abusus sit. Erat autem Barnabas vir bonus & plenus spiritu sancto ac fide, Act. 11. 24.

Assumpto simul.] De Tito nulla fit mentio. Act. 15. 2. quo loco est historia tertij reditus huius Pauli Hierosolymam versus. Tantùm dicitur illic alios quosdam ex fidelibus vnà cum Paulo & Barnaba ascendisse Hierosolymam. Aliis illis annumerandus videtur Titus, cuius hîc expressè meminit Apostolus. Videtur ex hoc loco priùs Paulo cum Tito intercessisse familiaritatem quàm cum Timotheo, quem quidem assumptum à Paulo legimus aliquanto tempore post hunc tertium reditum, Actor. 16. 3.

2. *Ascendi autem*] Hæc causa est impellens ascensionis, reuelatio Dei extraordinaria, de qua tamen nihil habemus Act. 15. vbi de tertio hoc reditu agitur. Subindicat autem Apostolus hæc ascensionis suæ causa extraordinaria, extraordinarium se hominem, quocum Deus extraordinarium egerit.

Et exposui] Hactenus profectio fuit, nunc sequitur

quitur id quod fecit Hierosolymis. Exposui, inquit, iis, nempe Hierosolymitanis, *Euangelium quod prædico inter gētes*. Tum correctio quædam est, quasi dicat, non quidem exposui Euangelium meum palam in concilio aliquo conuocato, ac si doctrinæ meæ rationem aliquam redderem, sed priuatim ac familiariter doctrinam meam communicavi mea sponte, idque non cum quibusuis, sed cum iis qui sunt in pretio & maximi nominis, vt cum Iacobo, Petro, Iohanne, de quibus postea versu 9. Subindicat autem hac re non veritum se fuisse censuram eorum qui erant maximi nominis, & in pretio habiti sunt.

Ne quo modo] Facti sui finem addit, non quidem vt aliquid disceret ex Apostolis, sed tantum vt occurreret tempestiuè falsis illis de se rumoribus, quòd aliam ab Apostolorum doctrina traderet doctrinam, per quos fieri potest vt perderet operam suam, aut etiam perdiderit in Euangelizando gentibus, hoc est, nullo cum fructu, vel doceret vel docuerit. Finem autem hunc expressit verbis translatis ab eis qui in stadio currunt, quibus sese non vno in loco comparat, vt 1. Cor. 9. 24. 2. Tim. 4. 7. 8. Phil. 3. 12. & deinceps.

Nota hoc loco, Apostolum in prædicando Euangelio ante omnia ob oculos habuisse salutem & conuersionem eorum quibus prædicauit: nisi enim id spectasset, profectò doctrinam

suam ne Apostolis quidem communicasset. Omnia igitur facienda sunt prius, quàm ut frustra laborent Pastores, hoc est, nullum fructum laborum suorum percipiant. Nam hæc futura est eorum gloriatio in extremo die, teste Paulo Philip. 2. 16. quòd non frustra cucurrerint aut in vanum laborauerint. Vide similem locutionem Gal. 4. 11. Metuo de vobis ne frustra fatigatus sim apud vos.

3. *Sed neque*] Illustratur proximum factum, in exponendo Apostolis Euangelio suo, effectu suo duplici. Primum est: Titus quicum ipso erat non coactus fuit circumcidi, nèpe ab Hierosolymitanis, & Apostolis.

Cùm esset Græcus] Amplificati • quædam & ratio per occupationem: dici enim potuit, cur cogendus fuit circumcidi? Resp. quia Græcus erat, ac proinde incircumciscus ac præputiatus.

4. *Nempe propter*] Ratio cur non coactus fuit circumcidi Titus, per occupationem. Est autem à causa primam mouente, & iis hominibus qui Apostolos ad id urgebant, & cum iis de circumcidendo Tito agebant: erant autem emissarii. Tum describuntur emissarii illi, erant falsi fratres.

Qui irrepserant ad] Descriptio hæc emissariorum paulò diligentius examinanda est, primum, generis loco est, quòd fratres sint. Deinde, differentia prima est, quòd non veri, sed falsi fra-

si fratres sint. *Tertiò*, secunda differentia est à modo ingressus eorum in Ecclesiam Dei, non quidem palam ingressi sunt, sed irrepsert. *Quartò*, differentia est à fine ingressus clancularij, eoque duplici. prior est, vt explorarent libertatem Ecclesiæ; tum quæ sit illa libertas exponitur, quam habemus, inquit, in Christo Iesu: hoc est, non ciuilis aliqua & politica, sed Christiana ac spiritualis. Porro de hac libertate postea cap. 5. 1. est autem ea qua Christus nos liberauit à tota lege, tam ceremoniali, quàm morali, qua ex parte moralis iustificat aut condemnat, hætenus enim ab ea liberamur. Posterior finis ex priori pendet, eo enim pertinebat eorum exploratio & quasi speculatio Christianæ libertatis, vt tandem Ecclesiam Christi in seruitutem adigerent. Hic autem vltimus finis est ac præcipuus quem sibi proponunt speculatores, & exploratores quicunque, vt nimirum tandem subuertant eos ad quos explorandos mittuntur. Porro seruitus hæc est qua legi inserviendum fuit, ac proinde peccato & morti. Nam hæc necessariò coniuncta sunt, vt apparet Rom. 6. 7. ab hac seruitute dissuadet postea cap. 5. 1.

5. *Quibus ne ad*] Concludit ex hac causa, ab emissariis & exploratoribus sumpta, non cessasse se, ne ad momentum quidem, illi hominū generi. Nimirum hoc est re ipsa idē cum eo quod dictum est suprà, non coactus fuit Titus

circumcidi. Significat autem si coactus fuisset ab Apostolis circumcidi Titus, quod ea res non tam fuisset Apostolis cedere, quam emissariis illis, qui ad hoc ipsum instigârunt Apostolos.

Ne ad momentum] Hac circumstantia innuit quàm strenuè emissariis illis restiterit, quàmque nihil planè iis voluerit concedere aut gratificari. Nam in causa Christi nihil, ne tantillum quidem, aduersariis est condonandum.

Per subiectionem] Hoc verbo addito significatur modus illius quasi cessionis, fuisset enim turpis ac seruilis. Sic enim Emissariis illis sese turpiter subiecisset Apostolus, prodita libertate Christiana. Quod si igitur cedendum sit aliquibus aliquando, videndum illud ne cedendo prodamus libertatem nostram in Christo Iesu, & nostra ipsorum culpa in seruitutem redigamur.

Vt Veritas Euangelij] Hic finis est cur non cesserit, non modò vt veritas, hoc est, sinceritas Euangelij, sine legis permistione, permaneret, sed etiam vt permaneret apud Galatas: significat enim restitisse se aduersariis non tantùm causa Euangelij & Christi, sed etiam Galatarum: Nam in re religionis hæc duo perpetuò ante oculos debemus habere, primum Dei ipsius gloriam, deinde salutem hominum. Porro his verbis obiter Galatarum beneuolentiâ captat.

Nota

Nota ex hoc primo effecto quando non sit cedendum aduersariis, ne in rebus quidem adiaphoris, in quibus initio & primis illis temporibus Apostolorum numerabatur circūcisio, nempe tum cū res non est cum infirmis fide, de quibus Rom. 14. Act. 16. 3. (Quorum gratia circumcisus est Timotheus ne illi nimirum offenderentur) sed cum obstinatis malitiosis, & vt hīc vocantur, emissariis, qui hoc vnum spectant vt subuertatur libertas Christiana, cum his res fuit Apostolo hoc tempore, & in eo hominum genere sunt Papistarum plerique hodierno die, qui non tantū id spectant vt libertas Christiana in adiaphoris subuertatur, sed vt omninō veritas Euangelij destruatur.

6. *Ab iis autem qui*] Hoc alterum effectum est, quo explicatur illud Pauli factum in exponendo Euangelio suo Hierosolymitanis præsertim Apostolis: est autem quod ii qui putantur esse aliquid, & in pretio sunt, nihil cum ipso prætereā contulerunt, hoc est, nihil vel adiecerunt doctrinæ ipsius, vel de ea diminuerunt, vel in ea immutarunt. Porro defectus est aliquis in hac sententia, qui supplendus est per verbum illud quod est in fine versus. *Prætereā contulerunt*, vt sit sensus, *ab iis qui putantur esse aliquid nihil mecum prætereā collatum est*. Inteligit autem eos qui postea versu 9. vocantur columnæ, hoc est, eos qui citra controuersiam Apostoli erant, vt Iacobum Petrum, Iohannem,

& Apostolos ceteros..

Qualescunque fuerint.] Hæc in parenthesis legenda sunt. Correctio autem est proximi verbi, quasi dicat, quid dico eos qui putantur esse aliquid? Nam qualescunque, vel quocunque loco aliquando fuerunt tum cum Christum secum præsentem haberent nihil meâ refert, hoc est, nihil moror, non in hoc laboro: nam hoc vnum scio, Deum personam hominis non accipere, hoc est, non respicere, vel personam illorum, vel personam meam, ita ut vel velit eos solos esse Apostolos, vel nolit me esse Apostolum, *qui prius eram blasphemus, persecutor, iniuriosus.* 1. Timot. 1. 13. Disce igitur exemplo Dei, adeoque ex natura Dei iustissima, non adeò respiciendas esse hominum conditiones, sine bonas siue malas. Quasi verò possit Deus pessimum quemque & in speciem abiectissimum erigere, ita ut inter optimos quosque censeatur: & rursus ex iis qui optimi habentur pessimos facere. Vnde Apost. Rom. 14. 4. *Tu quis es qui condemnas alienum famulum, proprio domino fiat, aut cadit, stabilietur autem, potest enim Deus eum stabilire.*

Ἐμοὶ γὰρ ἔδει] Resumptio est sententiæ illius initio versus inchoatæ & abruptæ: particula enim γὰρ resumptioni inseruit, idemque valet atque, *inquam*, mutata autem est loquendi forma, & ex passiva, ut loquuntur, actiua facta est.

7. *Imò è contrario*] Correctio quædam est præcedentis sententiæ, quasi dicat, tantum abfuit ab eo ut aliquid mecum præterea contulerint, aut aliquid in mea doctrina correctione dignum existimauerint, ut è contra, dexteras dederint mihi ac Barnabæ societatis, eaque re approbârint totam meam doctrinam, in eamque consenserint.

Quum vidissent] Causæ approbationis Apostolorum narrantur, ne quid temerè ab iis factum videatur. Prima est, viderunt mihi concreditum fuisse Euangelium inter Gentes, ut Petro, inter Iudæos. Quomodo ante id perspexerint, narratur sequenti versu in parenthesis.

8. *Nam qui efficax*] Obseruarunt concreditum Paulo Euangelium inter Gentes, ex efficaci Dei operatione per ministerium ipsius. Argumentum est ab effectu Euangelii ipsius tanquam instrumenti, cuius principalis causa fuit ipse Deus. Ideò dicit non quidem ego efficax fui, sed Deus efficax fuit per me. Porro hoc idem re esse videtur cum eo quod dicitur Rō. 15. 18. *Christus effecit per me*, hoc est, meo ministerio. Tractatur autem hic locus, ut & superior simili comparatione Petri, ut significet se Dei gratia Petro nihilo inferiore, non quidem ut Petro aliquid detrahat, verum ut allerat apostolatam suum.

9. *Quumque cognouissent*] Secunda causa est approbationis Apostolorum, cognouerunt Ia.

cobus, Cēphas & Iohannes gratiam mihi datā. Hæc est specialis quædam notitia certorum ex Hierosolymitanis, eorumque primi nominis, cum superior illa generalior fuerit Hierosolymitanorum. Erant autem primi nominis, Iacobus, Petrus & Iohannes, de quibus dicit, quod putabantur esse columnæ, hoc est, à falsis fratribus soli in pretio habebantur. Quorum etiam nominibus ad alios decipiendos abutebantur, hi, inquit, nominatim dextras dederunt mihi & Barnabæ societatis, quo significârunt unitatem illam & consensionem in doctrina, neque id tantum, sed & societatem in Apostolatu. Sed verba sequentia symbolum hoc exponunt, quibus dicit, *et nos inter gentes*. Quibus verbis significat idèd dextras esse datas, ut eo quasi signo approbarent Apostolatū Pauli, & Barnabæ inter Gentes fuisse, quemadmodum & ipsorum fuit inter Iudæos. Hac igitur correctione amplificauit superius illud Apostolorum factum, quòd nihil prætereà cum Paulo contulerint.

10. *Solum* monuerunt.] Occupatio est: an de nulla planè re te admonuerunt? huic occurrit respondētque: tantum hoc monuerunt, ut pauperum meminissemus, hoc est, Sanctorum, qui Hierosolymis & in Iudæa agebant.

Quod & ipsum] Exponit fidem suam ac diligentiam in exequendo illud Apostolorum mādātum, atque hoc obiter ad iustam ipsius com-

men-

mendationem; vide de præstito hoc officio 1. Cor. 16. 1. & deinceps. 2. Cor. 8. 9.

II. *Cum autem venisset*] Quinta pars est historia vitæ Paulinæ in Christianismo transactæ. Summa est. Antiochiæ Petro in os restiti. Factum autem hoc est posteaquam Paulus & Barnabas Hierosolymis reuersi sunt Antiochiam Syriæ, ibi quoque reuersi manserunt: vide Act. 5. 34. Manentibus Antiochiæ Paulo & Barnaba, vt apparet ex hac historia, Petrus Hierosolymis Antiochiam venit.

In os ei restiti] In Græco est in facie, vel coràm: neque tantùm coràm egit cum Petro Paulus, sed etiam palàm & in conspectu omnium, vt apparet ex v. 14. sequente: publica enim peccata & scandala remouenda sunt publicis reprehensionibus. Vide 1. Tim. 5. 20. *Eos qui peccant*, inquit, hoc est, presbyteros, qui peccant cum offensione multorum, iam legitimè conuictos peccati *coram omnibus argue, vt & reliqui timeant.* Verba autem hæc significant grauem, confidentem, & liberam reprehensionem, inferuntque authoritatem in reprehendendo planè Apostolicam: nam huc pertinet tota hæc historia conuersationis Pauli, vt appareat eum Apostolum esse & extra ordinem à Deo edoctum.

Eò quod condemnandus] Ratio est proposita reprehensionis ex merito ipsius Petri. q. d. nam cōmeritus est reprehensione, adeoque condemnationem, hoc est, sententiã quasi damnatoriã.

12. *Nam antequā*] Confirmat meritū Petri ex facto ipsius sibi tam repugnanti, & contrario pro temporum diuersitate, cum oporteat Christianos sibi constare in bono perpetuò, neque mutari pro tēporum vicissitudine: Deus enim sui semper similis est: *Ego lehoua & non mutor*, Mal. 3. 6. Primum itaque membrum facti sibi repugnantis est, quod vnà cum Gentibus ederit, nullo ciborum delectu facto, quod & ipse Petrus iam antea ex cœlesti visione didicit, Act. 10. 15. & deinceps, vbi hanc vocem audiuit, *Quæ Deus purgauit, tu ne polluito*. Ergo non peccauit Petrus, ed quòd cum Gentibus ederet & vsus sit Christiana libertate in adiaphoris: huius facti prioris tempus denotatur, tum nimirum, cum nondum venissent quidam à Iacobo, hoc est, Hierosolymis, vbi Iacobus frater Domini agebat. Hi autem erant Iudæi, neque, vt videtur, infirmi illi fide, quoad adiaphora, quibus cedendum fuit ne offenderentur, Rom. 14. 1. & deinceps: verum obstinati qui contenderunt legem Mosaicam cum Euangelio Christi coniungendam esse, similes nimirum illis emissariis qui voluerunt Titum circumcidi suprà versu 3. & deinceps.

Quum autem venissent] Secundum membrum facti Petri primo illi planè repugnans: est autem quod subduxerit sese ac separauerit à Gentibus earumque mensis, à consuetis cibis: hoc factum tempore suo circumscriptum est, nempe

pe quo venerunt quidam à Iacobo Antiochia, fortasse ad explorandam libertatem, vt illi emissarii suprà. Causa quoque facti addita est, quia metuit Iudæos qui venerunt à Iacobo. Metus hic pròculdubio laudabilis non fuit: videtur autem fuisse cuiusmodi fuit ille, de quo 2. Tim. 1. 7. *non Deus nobis, inquit, dedit Spiritum timiditatis, sed roboris.* Videtur autem Petrus concepisse hunc metum, non tam ob id ne offenderet infirmos Iudæos quàm ne ipse persecutionem aliquam pateretur, nam qui ritus legis Mosaicæ coniunxerunt cum Euangelio Christi idèd fecerunt, ne ob crucem Christi persecutionem paterentur: vide Gal. 5. 11. *Ergo, si circumcisionem etiam prædico, quid adhuc persecutionem patior?* ibidem 6. 12. *Quicumque volunt speciosi apparere in carne, cogunt vos circumcidi, tantum ne ob crucem Christi persecutionem patiantur.* Quare cùm metus hic reprehendendus fuerit, sequitur & factum illud ex metu hoc reprehendendum fuisse, & Petrum eo facto grauiter peccasse: sed de hoc postea.

13. *Ac simulabant vnà.*] Facti huius posterioris amplificatio ex scandalo, quod ex ipso sequutum est: eo enim offensi sunt reliqui Iudæi vnaque cum Petro simulârunt.

Itaque etiam] Ex Iudæis qui offensi sunt nominatim commemoratur Barnabas, qui cum tantus esset vir & cum Paulo gentium Apostolus, eius præsertim offensione ac simulatione

exaggeratur factum illud Petri, quodd videlicet tantum virum simul abriperit in eandem simulationem ac hypocrisin. Factum Petri, vt his verbis patet, hypocriseôs nomine designat: nam Petrus eò quodd subduxerat se à Gentibus, quibuscum prius comedebat, hypocritam se gessit, hoc est, simulauit se delectum aliquem ciborum facere, adeoque legem Mosaicam magni facere, cum tamen persuasum haberet eam abrogatam: fecit hoc in gratiam Iudæorum, & eorum qui à Iacobo venerunt: cum tamen nullius hominis respectu simulandum sit, vel hypocriticôs viuendum, verum candidè & ex animo prout dictat conscientia, facienda sunt omnia: vnde præcipit Paulus de adia-phoris Rom. 14.5. *Vnusquisque in animo suo plenè certus est*, nempe vsu *ἀδιαφορῶν*, quibus vtì vel non vtì oportet, prout conscientia dictat. Quod si conscientia dictauerit, & non vtamur, iam quoque peccatum est.

14. *Sed quum vidissem*] Hactenus fuit Petri factum sibi contrarium, ex quo sequitur eum reprehensione dignum fuisse: nunc habemus ipsa reprehensionis verba, verum prius ex superioribus causa reprehensionis breuiter repetita est. Est autem quodd tum Petrus in primis, deinde alij eius exemplo, non recto pede incesse-rint, hoc est, claudicârint. Id autem declarat ex eo quodd non incesse-rint secundum veritatem Euangelij, quæ regula est secundum quam nobis

nobis ambulandum est in vita, à quasi semel deflexerimus, iam profectò in vita erramus & quasi claudicamus.

Dixi Petro coram] Per prosopopœiam illa ipsa verba repetit quibus tum usus est cum Petro in os restitit: ad prosopopœiam his verbis accessum facit.

Si tu, quum sis] Summa reprehensionis hæc est: quòd Gentes, quantum in ipso fuerat, coegit Iudaizare: hoc est, implicauerit eos legis seruitute, vel, vt ipse loquitur Galat. 5. 1. seruitutis iugo, atque ita abduxerit à Christo, fecit autem hoc Petrus ex consequenti, vt loquuntur: nam dum separauit, substraxit & seduxit seipsum à gentibus & ipsarum mensis, atque ipsis inspectantibus quasi noluit vt libertate Christiana in adiaphoris, profectò idem fecit re ipsa ac si coegisset gentes transire ad Iudæos. Suo enim exemplo Gentes offendit, & quod in ipso erat, persuasit Gentibus abstinendum esse à cibis illis lege Mosaica vetitis. Quid autem hoc fuit aliud quàm efficere, vt Gentes relicto Christo legem Mosaicam amplecterentur? Nam qui vel vnicam legis Mosaicæ ceremoniam amplectitur, profectò is debitor est totius legis seruandæ: id quod habet Apostolus de circumcisione postea cap. 5. 3. Exaggeratur factum hoc Petri, quod reprehenditur, ex præcedenti facto non dissimili modò, sed planè contrario. *Si tu*, inquit, *quum sis Iudæus*, quasi dicat, hæc ἀκού-

Si ~~ta~~ sunt ac planè dissonant, quòd primùm ipse tu gentiliter vixeris, ac non Iudaicè, hoc est, ad morem Gentium, & non Iudæorum, nimirum nullo delectu ciborum habito, ac deinde coegeris Gentes viuere more Iudæorum: quasi dicat, Quî possunt hæc vnà constare vt tu viuas more Gentium, cogas autem Gentes viuere more Iudæorum, cogis autem dum subtrahis te à Gentibus, earúmque mensis, metu Iudæorum. Ergo non simpliciter & nudè reprehendit hoc Petri factum in subducendo se à Gentibus, verùm comparatè, facta comparatione cum priori Petri facto planè contrario. Peccauit igitur Petrus bis, primùm quod offenderet Gentes, deinde hoc auxit peccatum eius quod ipse secus se gesserit, & modo planè contrario, quo viuere voluerat Gentes: neque enim decet Christianum aliter vitam suam instituere, aliter verò & modo contrario viuendum aliis persuadere, verùm quodcunque nos nobismetipsis deligimus faciendum in vita, tanquam factu optimum, sanè id aliis faciendum debemus commendare, ac in vita sequendum.

Vides itaque ex hac contextus huius resolutione & Petrum peccasse grauiter, & Paulum seridè & vehementer eum obiurgasse, vt non sit nobis cum quibusdam sentiendum, & Petrum non peccasse, & Paulum non seridè cum Petro egisse; sed ex composito hæc inter Petrum, & Paulum transacta fuisse: neque enim placent nobis

nobis glossæ, quæ ipsum textum peruertunt.

15 *Nos natura Iudæi, & non ex Gentibus peccatores.*

16 *Scientes non iustificari hominem ex operibus legis, sed per fidem Iesu Christi: & etiam nos in quâ in Christum Iesum credidimus, & iustificaremur ex fide Christi, & non ex operibus legis: propterea quod non iustificabitur ex operibus legis illa caro.*

15. **N**os natura Iudæi] Tránsito quædâ est ad aliâ Epistolæ partem, quæ est de modo quo iustificatur homo coram Deo: argumento autem à maiori ad minus ostendit quod dixit in reprehensione Petri, non cogendas Gentes ut Iudaizent, hoc est, sequantur in vita legem Mosaicam. Nos, inquit, qui sumus natura, & genere Iudæi, etiam nos in Christum Iesum credimus & iustificaremur ex fide Christi, &c. Quantò minùs igitur cogendæ sunt Gentes, quibus lex non est data, Iudaizare, & quærere iustitiam per legem.

Peccatores] Peccatores peculiariter dicuntur in quibus regnat peccatum. Regnat autem peccatum in iis qui sunt absque Christo, alieni à repub. Israelis, extranei à pactis promissionis, spem non habentes, & Dei expertes in mundo: cuiusmodi olim erant Gentes omnes, excepta vnâ Israelitica Eph. 2. 12. Ideò hoc loco Gentes peculiariter hoc nomine insigniuntur: alioqui

enim omnes sunt peccatores, etiam regeniti ipsi, & in Christo per fidem inliti. I. Iohan. 1. 10. *Si dixerimus nos non peccasse, mendacem facimus eum, & sermo eius non est in nobis.* Postea autem cum de regenitis loquitur, *quisquis, inquit, natus est ex Deo peccatum non committit* Cap. 3. vers. 9.

16. *Scientes non*] Inchoatum argumentum interpellat digressiuncula & parenthesi, in qua est ratio cur Iudæi genere iustificentur fide, non ex operibus legis. Ratio autem est à forma illa siue modo quo Deus hominem iustificat. Modus est, non ex operibus, sed per fidem: modum hunc iustificationis comprobatum dicit scientia, vel potius conscientia Iudæorum.

Scientes, inquit, per fidem Iesu] Modum hunc iustificationis solet Apostolus variè efferre, aliquando enim dicit nos iustificari per fidem Christi, ut Rom. 3. 22. & hoc loco aliquando iustificari nos dicit per fidem nulla Christi mentione facta, ut Rom. 3. 28. aliquando denique iustificari nos dicit per Christum, suppresso fidei vocabulo, ut Rom. 5. 15. & postea versu 17. Cæterum idem sunt ista, siue dicas iustificari hominē per fidem Christi, siue dicas hominem iustificari per fidem, siue denique dicas hominem iustificari per Christum: significatur enim omnibus his locutionibus iustificationis causa meritoria, quæ procurat nobis illam iustitiam, nēpe, Iesus Christus, sed fide nostra apprehēsus.

Etiam nos, inquam] Resumptio est argumenti inchoa-

inchoati & interpellati. Particula γ notat quid-
dam maius, quasi dicat, non tantum Gentes
sed etiam nos Iudæi credimus in Christum
&c. Fides est ex hoc loco in ipsum Christum,
ac Christi personam primum: ex fide autem in
Christum, siue Christi personam, participes fi-
mus iustitiæ ipsius: qui enim particeps fit ipsius
Christi per fidem, is quoque particeps fit om-
nium beneficiorum eius, ut iustitiæ, ut vitæ æ-
ternæ. Quare causa meritoria iustificationis no-
stræ, est ipsemet Christus crucifixus fide no-
stra apprehensus. Deus autem ubi videt nos
per fidem indutos ipso Christo, è suo tribunali
pronuntiat nos iustos in ipsius iustitiæ & satis-
factione. Quamobrem non est existimandum
communione esse aliquam cum aliquo bene-
ficiorum Christi; priusquàm communio sit cum
ipso met Christo: primum enim fides coniun-
git nobis ipsum met Christum, deinde benefi-
cia eius, & quæ in eo sunt omnia. Deus autem
cum è tribunali suo intuetur illam communio-
nem primum Christi, deinde beneficiorum, in
quibus est Christi satisfactio & iustitiæ, nos in
illius iustitiæ iustos pronuntiat.

Et non ex operibus] Non satis habet veram cau-
sam formamque iustificationis exprimere, quin
etiam contrariam remouet, nempe, eam iustifi-
candi formam quæ est ex operibus, ut signifi-
cet nos sola & vnica hac forma iustificandi, quæ
est per fidem Christi, iustificari. Vide Rō. 3. 28.

Propterea quòd] Repetitur argumentum illud à forma iustificandi, sed à modo quo Deus iustificat hominē, quasi dicat, propterea quod non iustificabitur homo ex operibus legis sed ex fide Christi. Argumenti repetiti amplificatio quædam est ex subiecto iustificationis vniuersaliter sumpto. *Non iustificatur*, inquit, *illa caro*, hoc enim maius est eo quod dictum est prius, *scientes non iustificari hominem ex operibus legis*, sensus enim est, quasi dicat, in iustificationis modo nullam esse personarum acceptiōnem. Neque aliter iustificandos Iudæos, aliter Gentes, aliter mares, aliter fœminas, &c. Verùm omnes omnino eodem planè modo iustificandos, sicuti *Unus idēque Deus est qui omnes iustificat* Rom. 3. 30. & non est distinctio quod ad peccatum attinet, *omnes enim peccauerunt*, Rom. 3.

17 *Quod si, dum quarimus iustificari per Christum, reperimur & ipi peccatores, num Christus peccati minister est? Absit.*

18 *Nam si quæ destruxi, ea rursus ædifico, transgressorem meipsum constituo.*

19 *Ego enim per legem Legi mortuus sum, ut Deo viuerem.*

20 *Vnà cum Christo crucifixus sum. Vivo autē, non ampliùs ego, sed viuit in me Christus, & vitam quam nunc viuo in carne, viuo per fidem Filij Dei, qui dilexit me, & tradidit semetipsum pro me.*

7. *Quod si, dum*] Propositio disputationis sequentis, proximis verbis fuit: non statim autem eam confirmat, sed prius occupat quod aduersus propositionem illam iustificationis per fidem, non per opera, à Iudæo aliquo, vel inimico gratiæ Christi obiici poterat. Si, dicat aliquis, qui quærunt iustificari per Christum; vel iustificantur per Christum, reperiuntur tamen peccatores vel peccant, annon Christus cum gratia sua & iustitia peccati minister est, hoc est, præbet ansam peccandi? Vide similem occupationem Rom. 6. 1. Illud enim hostes gratiæ & iustitiæ Christi prætexunt impiæ sententiæ de iustitia operum, quo etiam oppugnant iustitiam fidei: quod si ex fide tantum sit iustitia & non ex operibus, futurum sit vt frænum laxetur malis operibus. Quare ad hoc vt homines benè operentur, dicunt oportere sententiã illam iustificationis per opera penitus animo insidere. Quasi verò nemo alliciatur ad bene operandum, nisi infideat animo eius impia illa opinio iustificationis per opera.

Absit] Obiectionẽ illam occupatam, tanquã blasphemam, & à corrupta humana cogitatione profectam auersatur suo more.

18. *Nam si qua*] Auersationis proximæ siue negationis ratio est per translationem culpæ à Christo in se: nam suam ipsius personam Apostolus hoc loco substituit, quasi dicat, Christus nõ est minister peccati: nam ego, si posteaquam

iam iustificatus sum, &ifico rursum peccatum quod per iustificationē destruxi, ego, inquam transgressorem meipsum constituo, hoc est mea ipsius culpa est, non Christi, & reatus ac me pertinet. Metaphora sumpta est ab ædificiis, quæ destruuntur propriè & ædificantur: ita etiam iustificatus per fidem Christi destruitur quodammodo ac demolitur extructam illam peccati molem: destruitur autem peccatum per regenerationem & mortificationē quæ iustificationem per fidem sequitur necessariò: ædificatur rursum peccatum si post iustificationem viuat quis in peccato, vt loquitur Rom. 6. 2. Præsupponitur iustificatus destruxisse & mortificasse peccatum, hoc est, regeneratus esse præsupponitur; quòd si igitur rursum peccet, & in eo incipiat peccatum regnare, iam profectò ædificat rursum quod destruxit.

19. *Ego enim per*] Per occupationis quandam speciem ostendit destruxisse se peccatum. Ego enim, inquit, legi mortuus sum, id est, iam iustificatus per fidem Christi, legi & peccato mortuus sum, hoc est, mortificatur in me peccatum hoc inhabitans & originale: nam legi mortuus esse dicitur in quo mortificatur vetus homo, qui, vt loquitur Apostolus Rom. 7. 5. per legem viget & vires suas exerit: vnde lex virtus peccati dicitur, quia nimirum per legem existentes affectiones peccatorum vigent in membris nostris ad fructum ferendum morti. Ergo legi

legi mortuus est qui mortificatus est, &, vt loquitur postea, in quo vetus homo cum Christo crucifixus est, & corpus peccati eneruatum est, Rom. 6. 6. Eodem sensu nos liberos dicit à lege. Rom. 7. 6. *Liberi, inquit, sumus à lege, mortuo eo in quo detinebamur, peccato videlicet.* Per legem autem se dicit legi mortuum, non quòd lex causa sit mortificationis peccati proxima, ac immediata. Christus enim ipsiusque Spiritus, hoc est, secundus maritus, vt vocatur Rom. 7. 4. propriè mortificationis causa est proxima: verum ideò dicimur mortui esse legi per legem, quia, vt ait Apostolus Rom. 7. 9. Legis aduentu peccatum reuiuiscit, per legem enim peccati agnitio est & irritatio. Reuiuisciente autem peccato, ait Paulus, homo moritur, qui priùs viuebat, hoc est, deiicitur conscientiaè terroribus: nam agnitio peccati & mortis simul sunt: ex morte autem inspecta existunt conscientiaè horrores, atque hic effectus est legis proprius, non vt moriatur peccatum, sed vt moriatur ipse homo, hoc est, concutiatur terroribus conscientiaè, iam verò ita concussus ad Christum sese in Euangelio offerentem confugit, apprehenso Christo per fidem, per Christum iustificatur: iustificatus deinde regeneratur, hoc est, crucifigitur in eo vetus homo, nouus autem homo creatur.

Vt Deo Viuerem] Mortificatio peccati explicatur suo fine ad quem tendit, nempe viuifica-

tionem; nam ideo morimur peccato ut viuamus Deo, & ideo mortificatur vetus homo, ut viuificetur nouus homo. Sunt enim hæ duæ regenerationis nostræ partes.

20. *Vnà cum Christo*] Declaratio quædam est proximi loci: primum autem declarat quod dixit, legi se mortuū esse: exponit autem illud ex eo quod vnà cum Christo crucifixus sit. Crucifigimur autem vnà cum Christo quoad veterem hominem & peccatum inhærens, ideoque Rom. 6.6. dicit veterem illum nostrum hominem cum Christo crucifixum esse. Crucifigi autem dicitur vetus homo vnà cum Christo, quia merito & efficacia mortis Christi mortificatur vetus homo: nam Christus morte sua non tantum promeritus est nobis remissionem peccati, vel absolutionem à reatu peccati, verum etiā eadem illa morte meritus est inhærentis peccati abolitionem, neque tantum meritus est abolitionem peccati inhærentis, sed etiam per mortem suam efficax est ad peccatum inhærens mortificandum: Efficacia autē Christi, vel mortis Christi, est per Christi spiritum operantem in cordibus nostris. Hæc autem quo melius intelligamus, sciendum est Christum efficacem esse in nobis, & per mortem & per vitam suam, siue, quod idem est, & mortem Christi, & vitam in nobis efficacem esse, verum tum demum mortem Christi efficacem esse in nobis posteaquam resurrexit ac reuixit. A vita enim

nim Christi illa gloriosa procedit Spiritus sanctus, sine quo operante non exercitur virtus illa quæ est in morte Christi. Per Spiritum autem sanctum qui sequitur resurrectionem Christi primum in actum quasi educitur vis illa ac virtus quæ est in Christi morte, & Spiritus sanctus peccatum in nobis inhærens per vim mortis Christi mortificat, deinde eodẽ Spiritu sancto operante exercitur in nobis vis vite Christi gloriosa, nimirum in nobis viuificandis. Vide Coloss. 2. 14. vbi dicitur Christus *Chirographum rituum quod erat nobis contrarium cruci affixum in medio sustulisse*. Quare quidquid destructum est ac abolitum vi mortis Christi illud dicitur crucifixum esse cum Christo.

Vino autem non] Declaratio eius quod dixit superiori versu, vt Deo viuerem. Deo enim viuere nihil aliud est quàm ipsum hominem, quæ nimirum carnalis est, non viuere, sed Christum in homine viuere. Quid autem illud sit, Christum in aliquo viuere, verba sequentia exponunt, est autem vitam hanc, quam viuit quis in carne, hoc est, in mortali isto corpore, vel vt loquitur 2. Cor. 4. 11. in mortali carne nostra, vitam inquam, illam viuere per fidem filii Dei: nam per fidem habitat quodammodo Christus in cordibus nostris, vt loquitur Eph 3. 17. Cum igitur per fidem habitet Christus in cordibus nostris, profectò, beneficio fidei, Christus viuit in nobis, & in cordibus nostris, vt non sit alia

vita hæc nostra spiritualis ab illa vita Christi in nobis viuentis, sed vna eademque re & numero sit vita nostra & Christi. Quemadmodum enim non est alia, atque alia re ipsa & numero, vita corporis & capitis naturalis, sed vna eademque re & numero vtriusque vita: propter arctissimam illam coniunctionem capitis & corporis, ita etiam, & quidem multò magis vna eadēq; re ac numero est vita nostra spiritualis & Christi, quantò arctior & maior est capitis Christi & nostri coniunctio quauis coniunctione naturali, ideoque Apost. Col. 3. 4. vocat Christum vitam nostram, & 2. Cor. 4. 10. dicit Christi vitam in se manifestam esse. Vt verbo dicā, vita nostra spiritualis, nihil aliud est quàm vita Christi viuentis in nobis.

Qui dilexit me] Notat causas fidei suæ in Christum, primùm dilectionem Christi, qua nos prosequitur, deinde ex dilectione voluntariam illam Christi pro nobis mortem: hæc enim duo conciliant fidem nostram in Christum. Nota igitur fidei nostræ obiectum non filium Dei tantum, sed filium nos diligentem, & dilectionem suam morte tam voluntaria re ipsa ostendentem: vnde Rom. 3. 25. dicitur fides in sanguine ipsius.

21. *Non abrogo gratiam Dei. nam si per Legem est iustitia, igitur Christus sine causa mortuus est.*

Non

N*on abrogo]* Haëtenus digressus est ab instituta propositione, de modo quo Deus hominẽ iustificat : nunc reuertitur ad institutum, & aggreditur propositionis probationem. Primum autem argumẽtum est à fine mortis Christi in hanc formam. Si per legis opera est iustitia, Christus frustra mortuus est : at Christus non est frustra mortuus, ergo per legis opera non est iustitia. Assumptionis sententia præcedit : nam hæc idem sunt re ipsa, abrogare Dei gratiam, & dicere frustra vel sine causa mortuam Christum : nam Christum tollere & inutilem reddere, est gratiam Dei tollere, quia tota gratia & misericordia Dei in Christo constat. Sequuntur autem verba quæ in assumptione sunt ex profunda quadam consideratione dilectionis illius Christi & beneficii de quo proximè. Eruptio autem videtur esse in exclamationem quandam, quasi dicat, hanc ego tantam Dei in Christo gratiam nunquam abrogabo, aut irritam faciam.

Nam si per] Propositio syllogismi, ex qua illud vides, iustitiam per legis opera nullum locum Christo relinquere, & irritam eius mortem reddere. Si enim non in eum finem mortuus est Christus, vt nos iustificaret, profectò frustra mortuus est : at si per opera legis iustificamur, non in eum finem mortuus est. Ergo si per opera legis iustificamur frustra mortuus est. Neque verò est quòd homines partiantur

iustitiam inter legem & Christum: nam antequam
 dens hoc connexionis, *Si per legem est iustitia*,
 ita accipio, ac si dixisset, si per legem, vel vl-
 la ex parte est iustitia, aut si aliqua pars iusti-
 tiæ nostræ operibus legis meritoriis tribuitur.
 Quod autem non possunt consistere opera le-
 gis meritoria, & gratia Dei, siue Christus in ne-
 gotio iustificationis, vide Rom. II. 6. *Quod si per
 gratiam*, inquit, *non iam ex operibus*. Quod autem
 nulla sit legis potentia ad nos iustificandos, vi-
 de Rom. 8. 3.



ANALYSIS CAP. III.

ARGUMENTVM.

I. Huius cap partes sunt
Varia, primum digrediens
 rursus ab instituto, ex indi-
 gnatione reprehendit defe-
 ctuopem Galatarum ad Ver-
 sum & que 6.

II. Deinde partim con-
 firmat iustificationem per
 fidem, partim refutat iusti-
 ficationem per legis opera ad
 Versum & que 15.

III. Tertiò, propositio-

nem quandam affinem illi
 superiori quam refutauit
 pertractat, nempe legem nõ
 abrogare promissionem, ad
 Versum & que 23.

IV. Quarto, & iterius pro-
 gressus abrogationem legis
 aliqua ex parte ostendit, si-
 mul etiam propositionis hu-
 ius, nos omnes filios Dei esse,
 & universalitatẽ obiter quasi
 cõfirmans ad finem capitis.

CAP. III.


1 *Amentes Galata, quis vos fascinavit ne obsequeremini Veritati, quibus ob oculos Iesus Christus prius fuerat depictus, inter vos crucifixus?*

1 *Hoc solum cupio discere ex vobis, Ex operibus Legis Spiritum accepistis, an ex fide per auditum percepta?*

3 *Adeo amentes estis? quum Spiritu inceperitis, nunc carne perficimini?*

4 *Tam multa passi estis frustra? si modo etiam frustra.*

5 *Qui igitur subministrat vobis Spiritum, & efficit virtutes in vobis, ex operibus Legis, an ex fide per auditum percepta subministrat?*

 *Mentes Galata*] Prima pars. cap: reprehensio defectionis Galatarum, quasi dicat, ô Galatæ, cur defecistis à veritate agnita? Verum non tam simplici propositione contentus, primum Galatas amentes compellat, ex sancta quadam ira & zelo veritatis. Causam autem notat defectionis eorum internam, nempe, amentiam, & dimotionem quandam à mente, vt loquitur 2. Thess. 2. 2. Ne citò, inquit, à mente demoveamini, deinde non dicit simpliciter, cur non obsequiti estis veritati, verum, *quis vos fascinavit*, inquit, designans causam defectionis externam, nempe, fascinationem quandam, ex qua fuit amentia illa & causa defectionis interna. Nam falsi doctores

eos quasi fascinantes, & oculo malo intuiti, dimouerunt à mente sua. Ergo amentia fuit ex fascinatione quadam. Vocabulum hoc translatum est à veneficis, qui vel intuitu suo interimunt eas res quibus malè volunt.

Veritati] nempe, agnitæ, & perceptæ.

Quibus ob] Primum argumentum reprehensionis, à viuâ illa & efficaci prædicatione Euangelij, quâ quasi ante oculos ipsorum & coràm depictus est Christus, qui est Euangelij subiectum: nam sermo crucis, vt vocatur ab Apostolo 1. Cor. 1. 18. euidens esse debet, aded vt oculis quodammodo Christum eumque crucifixum, repræsentet. Atque hæc est demonstratio illa spiritualis potentia, quam Apostolus requirit in oratione & sermone de cruce 1. Cor. 2. 4. Sermo hic proculdubio spiritualis est, hoc est, à dictante Spiritu sancto est, & per nos quasi loquente, quemadmodum res ipsa (quæ est Christus eius crux, eius gloria, eius beneficia) spiritualis est ac planè cœlestis: vide 1. Cor. 2. 13.

Inter vos] Graphicam hanc descriptionem & depictionem Christi, de crucifixione ipsius præsertim interpretatur: nam hæc est prima ac præcipua prædicationis Christi pars, quæ est de ipsius cruce, & fides nostra primum omnium Christum crucifixum pro peccatis nostris, & è cruce pendentem amplectitur. Quare etiam Euangelij prædicatio fidem nostram ad
Chri-

Christum, eumque crucifixum, primum adducit: vnde Paulus 1. Cor. 2.2. Prædicationem suam de Christo crucifixo potissimum esse admonet. *Decreueram, inquit, nihil scire inter vos nisi Iesum Christum, eumque crucifixum.*

2. *Hoc solum cupio*] Secundum argumentum reprehensionis ex effectis fidei in Christum, Spiritu sancto cum ipsius donis: quasi dicat, non accepistis spiritum ex operibus legis, sed ex fide: Ergo malè defecistis à fide ad opera legis. Hoc argumentum, quemadmodum primum illud, & sequentia, tractatur dialogismo: vrget enim Galatas ac pungit interrogationibus, ad hoc vt respondeant, si quid pro se habeant: Consopitis enim & amentibus opus est stimulis, vt ex lethali illo somno excitentur.

Ex operibus legis] Hoc est virtute operum legalium.

Spiritum] Spiritum sanctum intelligo cum donis suis, præsertim extraordinariis illis: nam in primitiua Ecclesia qui Christo nomen dederunt, acceperunt dona illa spiritus extraordinaria, vt donum linguarum, interpretationis, loquutionis, prophetiæ, &c. ad hoc vt testimonium Christi, hoc est, Euangelium in ipsis confirmaretur: Vide 1. Cor. 1.4. & deinceps.

An ex fide] Fidei nomen propriè accipio, vt antea operum, pro fide illa in Christum Iesum: nam fidem in Christum sequitur Spiritus san-

ctus Ephe. 1. 13. Posteaquam credidistis obſignati eſtis ſpiritu illo promiſſionis ſancto: non dicit fidem ſimpliciter, ſed auditionem fidei, quo ſignificat fidem eſſe ex auditu Rom. 10. 17.

3. *Adeo amentes*] Tertium argumentum reprehentionis, quo reprehendit eorum defectiōnem ex cauſa, ſua nempe, amentia; nam qui deficiunt à veritate, illi neceſſario primum à mente dimouentur, ac amittunt ſanam mentem, ut loquitur Apoſtolus 2. Theſſ. 2. 2. Ergo defectio & apoſtaſia arguit amentiam, ac non immerito apoſtaſis amentia obiicitur.

Quum Spiritu] Amentiam oſtendit ex progreſſu quodam ipſorum, ut ſic dicam, præpoſtero; eſt autem quod à perfectiori ad imperfectius progreſſum fecerunt, cum qui in aliqua re proficit, ac verè progreſſum facit, initium facit ab imperfectiori, deſinat autem in perfectius. Spiritus nomine intelligo, ut ſuprà, Spiritum ſanctum, & internam illam veritatem, qui miniſtratur per Euangelium Chriſti. Carnis autem nomine intelligo externum cultum legalem, non modò umbras illas legis, ſed etiam legis moralis opera, quæ carnis nomine appellantur. Rom. 4. 1. Iudæi quibus lex olim data fuit, progreſſum fecerunt à lege (quæ erat pædagogus ad Chriſtum Gal. 3. 24.) ad Spiritum & veritatem quæ eſt in Chriſto Ieſu; & hic quidem verè progreſſus fuit; at cum Galatæ quibus nulla lex

la lex data est exorsi primùm à Christo, eiusque Spiritu ac veritate, progressi sunt ad legem Iudaicam, profectò non tam progressi sunt, aut profecerunt, quàm regressi sunt ac defece-
runt.

4. *Tam multa passi*] Quartum argumentum reprehensionis ex effectu quodam alio defecti-
onis ipsorum: defectione enim sua omnem il-
lam afflictionem quam pro Euangelio perpe-
ssi sunt inutilem reddiderunt: Ergo malè defe-
cerunt, nihil enim frustrà faciendum, multò
minus ferendum aut tolerandum: at verò nisi
perseueremus in veritate ad finem vsque in ni-
hilum redeunt omnes labores, omnes ærumnæ
quas perpetimur in hac vita.

Si modo etiam] Correctio est qua mitigat as-
peritatem præcedentis interrogationis: q.d.
quanquam ne hoc quidem mihi persuadeo vos
tam multa perpeffos esse frustrà. Vide igitur
vt lenitatem seueritati admiscet in reprehен-
dendo.

5. *Qui igitur*] Repetit argumentum repre-
hensionis secundum, vtpote efficacissimum ad
Galatas conuincendos, & os eorum quasi obtu-
randum: vrget enim sensibilia, vt sic dicam,
effecta & testimonia, quæ ipsi Galatæ experti
sunt ex Euangelio Christi, & fide in ipsum sola
procedere. Magis autem explicatum repeti-
tur quàm suprà positum est: nam causam sub-
ministrantem, Spiritum subindicat, cum su-

præ tantum dixerit, accepisse eos Spiritum : & Spiritum quodam modo definit, per virtutes spiritus: addit enim: & efficit virtutes in vobis.

6 *Sicut Abraham credidit Deo, & imputatum est ei pro iustitia:*

7 *Ita nostis, nempe eos qui ex fide sunt, esse filios Abrahamæ.*

8 *Providens autem Scriptura Deum ex fide iustificaturum Gentes, ante euangelizavit Abrahamæ: Benedicentur, inquit, in te omnes Gentes.*

9 *Itaque qui ex fide sunt, benedicuntur cum fidei illo Abraham.*

10 *Nam quotquot ex operibus legis sunt, sub execratione sunt. Scriptum est enim, Execrabilis quisquis non manserit in omnibus quæ scripta sunt in libro Legis, ut faciat ea.*

11 *Nullum autem per legem iustificari apud Deum manifestum est: siquidem iustus ex fide vivet.*

12 *Lex autem non est ex fide, sed Qui fecerit ea homo, vivet in ipsis.*

13 *At Christus nos redemit ab execratione Legis, dum pro nobis factus est execratio: scriptum est enim, Execrabilis quisquis pendet in ligno:*

14 *Ut in Gentibus benedictio Abrahamæ extet in Christo Iesu, & ut promissum illum Spiritum accipiamus per fidem.*

6. **S**icut Abraham] Hactenus digressus est ab incepta instituti probatione, in gravem apostasiæ Galatarum reprehensionem. Nunc

Nunc sedata quasi mente, ipsos incipit docere, reditque ad institutam illam probationem, in qua hoc notandum, eum vicissim refutare ac confirmare: ultimo enim versu capitis superioris, vno argumento capit refutare iustitiam ex operibus, hoc verò loco confirmat iustitiam ex fide. versu verò. 10. postea refutat iustitiam ex operibus. Siue autem refutat iustitiam operum siue confirmet iustitiam fidei, eodem res redit; ea autem docendi ratione ac vicissitudine, illa doctrina de iustificatione manifestior euadit: cum & vera iustificandi forma comprobatur, & falsa refutatur.

Hoc itaque loco confirmat iustitiam fidei exemplo Abrahami in hanc formam. Quemadmodum iustificatus est Abraham pater, eodem modo iustificantur filii eius. Idem enim est fœdus cum Abrahamo ipsiusque filiis initum, *Ero Deus tuus & seminis tui post te*, Gen. 17. 7. At Abraham pater iustificatus est per fidem: Ergo per fidem quoque iustificantur filij. Propositio, vt quæ manifesta sit, non habetur in textu. Assumptio est hoc versu 6. sic autem videtur sequi ex proximo loco. *Primum* intelligenda est responsio reddenda interrogationi, quæ facta est superiori versu in hunc sensum. q. d. non ex operibus legis, sed ex fide subministrat Deus nobis spiritum, &c. *Deinde*, illustratur responsio hæc, tacita quadam Abrahami similitudine. q. d. Quemadmodum Abrahamo

ex fide sua imputata est à Deo iustitia, vel iustitiæ donum, quod longè maximum est omnium & multis partibus vincit dona illa omnia extraordinaria & miraculosa: atque ita transitum sibi facit ad Institutam illam quam diximus probationem: ex hac enim similitudine Abrahami concludit institutum, nempe nos fide iustificari.

Imputatum est ei.] Nempe id quod credidit vel illud credere ipsius Abrahami: non quidem quòd imputata sit iustitia Abrahamo propter apprehensionem illam fidei ipsius, verum imputata est ipsi iustitia propter Deum in Christo quem fide apprehendit, hoc est, propter fidei obiectum, fide tamen ipsi applicatum, tanquã causa instrumentali. Significatur autem hoc loco causã meritoria ac procurans virtute & dignitate sua imputationem illam iustitiæ, cum dicit [*& imputatum est illi ad iustitiam*] sensus enim est, quai dicat, Deus propter illud credere, hoc est, propter alienum meritum quod ipse fide apprehendit, iustum eum censuit. Imputandi vocabulum mutuatum est ac sumptum à rationibus subductis, qui enim præest rationibus subducendis: is propriè dicitur imputare, hoc est, vt nos loquimur vulgò, *to giue allo* & *ance*, nos autem in scriptura dicimur reddituri rationem Deo in vltimo illo die 1. Pet. 4. 5. Deus igitur illo die præfuturus est quasi rationibus accipiendis, & subductis iam rationibus imputaturus

taturus est iis qui talentum acceptum benè collocarunt, iustitiam, hoc est, ex operibus laturus est sentent, iam tanquam totidem testimoniis fidei in Christum Iesum.

Vocabulum autem hoc imputandi commune est & operanti, & credenti : Si enim aliqua essent opera nostra meritoria, profectò Deus iustitiam ex iis nobis imputaret, verùm, cum nulla sint, iustitiam ex alienis, hoc est, Christi operibus imputat. Quòd si ex nostris dicatur imputare iustitiam, id fit idè quòd opera regenerationis testentur fidem in Christum, propter quem solum imputat iustitiam. Quòd autem vocabulum hoc sit commune, vide Rom. 4. 4. *Ei qui operatur, inquit, merces non imputatur ex gratia, sed ex debito.* Ergo etiam ei qui operatur, & qui meretur operibus suis, dicitur iustitia & merces imputari. Vt autem imputationis vocabulum sumptum est à rationibus quæ subducuntur, ita iustificationis vocabulum traductum est à foro & iudiciis.

7. *Ita nostis*] Infert ex proximo exemplo Abrahami, conclusionem de iustitia fidei.

Esse filios] Hoc est, iustificari: nam in eo sumus filij Abrahæ, quòd quemadmodum ille credidit & iustificatus est, ita nos quoque credentes iustificemur: & ille pater noster dicitur quòd exemplo imputatæ iustitiæ nobis præeat. Vide de hac re Rom. 4. 11. & deinceps.

8. *Præuidens autem*] Secundum argumen-

tum quo ostendit iustificationem per fidem. Est autem ab exemplo Gentium & iustificationis earum, quam testimonio & prædictione scripturæ confirmat. *Primum* autem proponit ac admonet Scripturam Gentium iustificationem ex fide prædicere. *Deinde*, testimonium Scripturæ in medium affert. *Tertiò*, concludit iustificationem ex fide. Enthymema est. Scriptura antè Euangelizavit Abrahamo Deum ex fide iustificaturum Gentes, ergo qui ex fide sunt benedicuntur siue iustificantur. Scripturam intelligo Spiritum sanctum per Moysen scribentem; nam propriè spiritus hoc prævidit, & antè euangelizavit. Nota ordinem in prædicendis futuris, primùm qui prædicit futura, prævidet ea, vnde etiam Prophetæ dicti sunt videntes.

Gentes] Prædictionem hanc ac promissionem Apostolus interpretatur de Gentibus, quæ erant alienæ à repub. Israelis: concludit autem, vt videbimus, ex iustificatione Gentium per fidem, omnium sine discrimine iustificationem per fidem: nam eadem est regula atque ratio iustificandi omnes, & singulos: Quemadmodum vnus idemque Deus est. Sic in superiori argumento, ex singulari exemplo Abrahamæ, & formula qua ipse iustificatus est, nempe: ea quæ est per fidem, conclusit omnium iustificationem per fidem. Vide Rom. 4. 23. vbi postquam dictum est imputatam esse fidem Abrahamæ pro iustitia, subiicit, *non scriptum est propter eum solum,*

lum, sed etiam propter nos. Et Rom. 3. 30. *Siquidem unus, inquit, Deus est, qui iustificabit circumcissionem ex fide, & præputium per fidem.*

In te] Adducto in medium testimonio Scripturæ ostendit propositionem suam, nempe Scripturam id prædixisse. Deum ex fide iustificaturum Gentes, q. d. Nam hæc sunt Scripturæ verba, *Benedicentur, in te*, &c. hoc est, vt & verba precedentia & sequentia exponunt, tibi per fidem inferendæ: nam fidem intelligendam esse in hac locutione, *in te*, ostendit primum quod dixit in prima parte versus, *Deum ex fide iustificaturum Gentes*, deinde quod sequitur versu sequenti. *Qui ex fide sunt benedicuntur.* Porro in Abrahamo intelligitur eius semen. Nam tum cùm hæc promissio facta est ei, in lumbis eius erat caput illud benedicti seminis Iesus Christus, secundum humanam suam naturam: secus enim non erant inferendæ Gentes per fidem Abrahamo: fides enim nō incumbit nisi Deo, vel homini qui etiam Deus est, hoc est, Christo Iesu. Alibi autem in Genesi vbi hæc ipsa promissio repetitur, expresse mētio fit seminis Abrahami, *Benedicentur*, inquit, *in semine tuo omnes Gentes*, Gen. 22. 18.

9. *Itaque qui ex*] Ex fide esse, est credere; aut pendere ex conditione fidei in iustificatione, vt versu sequenti. Ex operibus legis esse, est operari aut pendere ex conditione operum.

Benedicuntur] In conclusione retinet verbum

quod in promissione illa fuit citata Gen. 12. 3. Benedictionis autem verbo intelligit iustificationem, de qua quæstio est, & quæ Benedictionis quædam species est. Sic Rom. 4, 6. Beatitudinis nomine, quam citat ex Dauide, intelligit eandem iustificationem, cum tamen illud nomen Beatitudinis commune sit omnibus Dei beneficiis.

Cum fidei illo] Obscurè hoc loco argumentum à simili exemplo Abrahami repetitum, ad illustrationem præsentis complexionis: nam sensus est: q. d. Quemadmodum Abraham iustificatus est per fidem.

10. *Nam quotquot*] Hætenus duobus argumentis ostendit iustificationem per fidem, nunc vicissim docet non esse iustitiam per opera legis, estque hoc secundum argumentum, quo id ostenditur: primum enim fuit capite superiori versu 21. Est autem argumentum à contraria execratione, quæ ex operibus legis consequens est: contraria enim sunt execratio & benedictio, siue iustificatio. Syllogismus est. Quotquot sub operibus legis sunt, sub execratione sunt, Ergo ex operibus legis non est benedictio, siue iustificatio. Adducitur autem hoc argumentum per occupationem. Nam occasione proximæ conclusionis obiici potuit, annon qui ex operibus legis sunt, benedicuntur? huic occurrit, quasi dicat, qui ex operibus legis sunt, non benedicuntur: nam qui ex operibus legis sunt sub

exe-

execratione sunt. Particula enim *ſ* redit rationem intellectæ illius negationis, per quam respondetur obiectioni.

Scriptum est] Antecedens confirmat testimonio Scripturæ, ex Deut. 27. 26. Porro hæc est illa comminatio quæ coniuncta est cum fœdere legali, cuius formula sequitur vers. 12. de qua etiam vide Rom. 10. 5. Nam hoc est fœdus legale, *Qui fecerit omnia quæ scripta sunt in lege, uiuet in ipsis*, huic promissioni coniuncta est comminatio: *Execrabilis quisquis non manserit in omnibus*, &c. In hac comminatione intellige omnia & singula. Nam nota hac vniuersi generis intelligitur obedientia vndequaque perfecta. Lex enim Dei requirit, vt Deum diligamus toto corde, tota anima, totis viribus; adeò vt si non præstetur plena obedientia, iam non satisfactum sit legi; imò, vt inquit Iacobus, *Si quis offenderit in vno iam reus fit omnium*. Iacob. 2. 10.

II. *Nullum autem*] Hoc tertium est argumentum, quo ostendit iustitiam non esse per legem. Primum est propositio concludenda, deinde est ratio à testimonio. Notandum quod dicit neminem iustificari apud Deum: nam de iustificatione non ea quæ est apud homines (qui externam operum faciem duntaxat intuentur) sed ea quæ est apud Deum, qui internam cordis sinceritatem respicit, disputat Paulus, Rom. 4. 2. concedens quodammodo Abrahamo iustificationem ex operibus apud homi-

nes: negat tamen illi iustificationem apud Deū
Iustificatio autem apud Deum est senten-
tia absolutoria ab ipso Deo profecta.

Siquidem iustus] Testimonio ex Propheta A-
bacuc, de iustitia fidei, confirmat propositio-
nem suam, cuius sensus est: iustus viuet ex fide
nimirum per quam iustus fit: Ergo habemus in
hoc testimonio iustitiam esse per fidem. Porro
citatur Apostolus hoc testimonium tanquam ma-
nifestum de iustitia fidei: idē ait *manifestum est*
Pro iustitia fidei vsurpauit hoc testimonium
Rom. 1. 17. Videtur Apostolus plurimi semper
fecisse testimonium istud prophetæ, vt quocum-
que tam apertum fuerit de iustitia fidei.

12. *Lex autem non*] Assumptio est syllogis-
mi: nam totus syllogismus est. Iustitia est per fi-
dem; lex non est fides, ergo per legem non est
iustitia: nam hanc assumptionem ita intelli-
go ac si neget fidem de lege, vtpote cum illa pla-
nè pugnante. Sequitur igitur, quod si legi cum
fide conuenire non potest, & si iustitia est per
fidem, sequitur, inquam, iustitiam nullo modo
esse per legem: nam hæc duo, lex & fides, adē
pugnant, vt si ex fide sit iustitia, iam non sit ex
lege: ac è contra, si ex lege, iam non sit ex fide.
Quemadmodum Apostolus Rom. 11. 8. dispu-
tat de gratia & operibus. *Si electio*, inquit, *per*
gratiam est, non iam est ex operibus. Possunt qui-
dem, fateor, consistere fides, & lex, gratia & o-
pera: verum, cum quæritur de causa iustifica-
tionis

tionis meritoria & principali efficiente, profectum adeò diffiliunt à se inuicem hæc duo, vt si vnum ponas alterum neges necesse sit. Nā gratia Dei in efficiendo & iustificando non patitur vlllo pacto societatem meriti humani, vt neque Christus quem fide apprehendimus ad iustificationem: nam vult Deus gratiam suam in Christo solam esse, ad hoc vt soli sit gloria. Inprimis enim quærit Deus gloriam suam ex gratia & misericordia sua.

Sed qui] Legem non esse fidem, vel nihil legi esse commune cum fide ostendit ex formula fœderis legalis, cuius conditio, quæ est operum, cum fide non potest consentire: facere enim & credere non consentiunt, neque concurrunt ad causam vitæ æternæ constituendam: secus consentire possunt vt causa & effectum suum, non autem, vt sic loquar, vt concussæ eiusdem effecti.

13. *At Christus nos*] Occupatio: nam ex comminatione illa legali, de qua suprà vers. 10. conscientia Galatarum sic assumere & concludere potuerunt; at nos non mansimus in omnibus quæ scripta sunt in libro legis vt faciamus ea: ergo nos sumus execrabiles. Apostolus non negat quidem execrabiles esse, sed respondet ex effecto Christi, quo omnes homines redemit ab execratione legis.

Dum pro nobis] Redemptionem illam Christi declarat ex forma & modo quodam suo: mo-

dus est, redemit nos, dum execrationem illam sub qua fuimus nos, in sese transtulit, & nostram quasi vicem suppleuit. Similem locutionem vide 2. Cor. 5. 21. *fecit ut qui non nouit peccatum pro nobis peccatum esset, ut nos efficeremur iustitia Dei in illo.* Factus est, igitur primùm pro nobis *peccatum*, hoc est imputatum est illi peccatum nostrum: deinde factus est pro nobis *execratio*: execratio enim legalis sequitur peccatū, siue illud inhæreat, siue imputetur; vt è contra benedictio Euangelica sequitur iustitiam, siue illa inhæreat siue imputetur: vt non sit quòd Papistę irrideant iustificationē & benedictionē esse ex aliena, hoc est, Christi iustitia nobis imputata. Irrideant eādem opera execrationem Christi esse ex aliena, hoc est, nostro peccato ipsi imputato: neque enim audent dicere Christum propter suum & inhærens peccatum execrabilem factum fuisse.

Nota hoc loco redemptionem nostram carè Christo constituisse: ex quo illud apparet, & quantum mali sit in peccato, & quàm inuiolabilis sit Dei iustitia: Deus enim ne filio quidem suo gratificatus est peccatorum vitam, sed vt peccatoribus parceret, filio suo non pepercit: neque redemit filius à Patre vitam nostram minori pretio quàm precioso suo sanguine. Ex hoc quoque apparet, quàm cara sit Christo Ecclesia sua, quàm cara etiam ecclesiæ singula membra, vtpote tam caro pretio redempta. Paulus
Act.

Act. 20. 28. dum commendat presbyteris Ephesinis Ecclesiam Dei, dicit *acquisitam esse Dei sanguine*, quo significat Deo caram esse ac pretiosam.

Scriptum est enim] Christum factum pro nobis execrationem docet testimonio Scripturæ, Deut. 21. 23. Quæ docet quemcunque è ligno suspensum execrationem factum esse. Argumentum est: Execrabilis quisquis pendet in ligno: at Christus pependit in ligno: Ergo factus est execratio. Nota Christum non idè execrabilem fuisse quia pependit in ligno, verùm idè pependisse eum in ligno quia execrabilis fuit. Nā suspensio ex ligno mortis & pænæ genus fuit execrabilibus & maledictis destinatum in lege Dei, & execrationis vera causa est peccatū: Christus verò prius fuit maledictus quàm suspensus fuit & crucifixus. Crucifixio autem testimoniū quoddam fuit externum, quo Deus toti mundo manifestum fieri voluit, quòd Christus factus est pro nobis execratio.

14. *Vt in Gentibus*] Redemptionem nostri ab execratione per Christum illustrat duplici fine, prior est, vt erga gentes execrationi contraria benedictio Abrahæ extaret in eodem Christo Iesu. Nota igitur nos in Christo nō tantum redemptionem habere ab execratione legis, sed etiam execrationi contrarium beneficium, nempe, benedictionem Abrahæ promissam, hoc est, vt quod vulgò dicimus, in Chri-

sto non tantum remittuntur peccata nostra, sed etiam in Christo iustificamur. Dicit in *Gentibus* nominatim extare benedictionem Abrahamæ, non autem in nobis, ut superiori versu dixit, Christum nos redemisse, hoc est, tam Iudæos, quam Gentes: nimirum quia de gentibus tum quaestio fuit, an etiam ad eas pertineret benedictio Abrahamæ, & iustificatio: nam de Iudæis, hoc est, de naturali semine Abrahamæ, nulla tum quaestio fuit. Vocat autem benedictionem Abrahamæ, quia ut Abrahamæ eiusque semini primum promissa est, ita ad Abrahamum eiusque semen propriè & peculiariter pertinebat: ad Gentes autem non primum aut propriè pertinebat benedictio, verum quatenus erant inferendæ Abrahamo eiusque semini: neque enim naturales rami erant, sed, ut loquitur Apostolus Rom. 11. 17. oleaster, & erant insitæ Abrahamo & eius semini, & participes factæ radicis & pinguedinis oleæ.

Et ut promissum] Posterior finis priori subordinatus, nam iustificationem, quæ benedictionis nomine intelligenda est, sequitur sanctificatio, de qua in hoc fine, *Quos iustificavit, eos glorificavit*, Rom. 8. 30. *Posteaquam credidistis, ob signati estis Spiritu illo promissionis sancto*, Eph. 1. 13. *Ex operibus legis spiritum accepistis, an ex auditione fidei* Gal. 3. 2. Nam per fidem, & iustificationem fidei purgantur corda nostra, ac sanctificantur. Non licet Spiritum simpliciter, sed *promissionem spiritus,*

ritus, hoc est promissum Spiritum; quia Spiritus sanctus cum donis suis promissus fuit iam olim per Prophetas: vide Act. 2. 16. &c. Eodem sensu vocat *Spiritum promissionis*, Ephes. 1. 13. Vel *promissio Spiritus* hoc loco potest intelligi; promissio illa spiritualis benedictionis facta Abrahamo, supra versu 8.

15 *Fratres, humano more loquor, Homini licet pactionem auctoritate confirmatam nemo abrogat, aut ei aliquid superaddit.*

16 *Abraha verò dicta sunt promissiones, & semi-
mini eius. Non dicit, Et seminibus, ut de multis: sed ut
de vno, Et semini tuo, qui est Christus.*

17 *Hoc autem dico, pactionem antè confirmatam
à Deo, respectu Christi, Lex quæ post annos quadrin-
gentos & triginta cæpit, non facit irritam, ut aboleat
promissionem.*

18 *Nam si ex Lege est hæreditas: non iam ex
promissione: Abraha verò per promissionem gratifi-
catus est Deus hæreditatem.*

19 *Quid igitur Lex? Transgressionum gratia ad-
dita est, usquequò venisset semen illud cui facta est
promissio: Lex, inquam, ordinata per Angelos, per
manum internuntij.*

20 *Internuntius autem, vnus non est: Deus ve-
rò vnus est.*

21 *Num igitur Lex addita est aduersus pro-
missiones Dei? Absit. nam si data fuisset Lex quæ
posset viuificare, verè ex Lege esset iustitia.*

22. *Sed conclusit Scriptura omnia sub peccatum, et promissio ex fide Iesu Christi daretur credentibus.*

15. **F***Raires, humano*] Occasione proximi loci in quo meminit promissionis illius factæ Abrahamo, digreditur in doctrinam de promissionibus, deque earum firmitate. Demonstratur itaque hoc loco hæc conclusio, Lex non abrogat promissionem de qua disputatur ad versum vsque 23. Postea verò à versu 23. ad finem vsque capitis, demonstrat alteram quandam conclusionem, nempe, veniente fide lex non ampliùs est pædagogus, vel, non sumus ampliùs sub lege. Est igitur his verbis prioris illius conclusionis primum argumentum cum præfatione quadam. Præfatio est de genere argumenti: est enim sumptum ab humanis negotiis: idèd dicit, *humano more loquor*: quasi dicat, vtor exemplo quod sumam ex medio & promiscuo hominũ vsu. Rom. 3. 5. in alio quodam sensu vtitur iisdem his verbis, illic enim, *humano more loqui*, est, ex corrupto hominum sensu loqui.

Hominis licet pactionem] Syllogismus est in hanc formam: Si sit hominis pactio autoritate confirmata, nemo eam abrogat, aut aliquid ei superaddit: atqui pactio cum Abrahamo est confirmata à Deo. Ergo lex non abrogat eam. Argumentum est à minori, exemplo humana-
rum

um pactiorum. Syllogismus est connexus pri-
mus: In assumptione assumitur maius quàm
quod fuit in antecedente propositionis. [*Au-
toritate confirmata*] vulgò dicunt authenticam.

Aut aliquid] Hic intellige omnes eos modos
quibus vitari possit pactio aut corrumpi, siue
dematur aliquid de ea, siue addatur ei aliquid,
siue denique aliquo modo immutetur ac per-
vertatur.

16. *Abrahæ verò dictæ*] Assumptio, quasi di-
cat, dictæ promissiones Abrahæ à Deo sunt con-
firmatæ, sic accipiendum esse hunc locum se-
quens versus docet, vbi assumptionis sententia
repetitur. Porro promissionem hanc intellige
hæreditatis, quam fecit Deus Abrahamo & se-
mini ipsius: promissio enim particularis Abra-
hamo facta duplex fuit: prima seminis, secunda
hæreditatis, quam promisit Abrahamo & se-
mini: de hac vide Gen. 15. 18. Rom. 4. 13. Voco
has particulares promissiones, vt distinguam
eas à toto fœdere gratuito, quod his verbis con-
ceptum fuit, *Ego Deus tuus & seminis tui post te*,
Gen. 17. 7.

Non dicit] Obiter & per digressiunculam an-
notat quasi in vocabulum seminis, cuius men-
tio fit in promissione: annotat autem quòd non
dictum sit pluraliter *seminibus*, verum singulari-
ter *semini*: idque in eum finem vt designetur v-
nus Christus.

Qui est Christus] Quasi dicat, atqui hoc qui-

dem semen, quod vnum est ac singulare, et Christus. Interpretatur igitur illud semen singulare de Christo capite seminis benedicti. Nam ad eum peculiariter ac propriè pertinent omnes promissiones benedictionum omnium *qui est heres omnium*, Heb. 1. 2. per quem rursus ad credentes quoscunque in ipsum, deriuantur. Quod autem Christi nomine, non intelligatur hîc *Christus*, quem vocant mysticum, hoc est, Christus cum membris suis, hoc est, cum Ecclesia sua, apparet ex sequenti versu in quo Christi nomen propriè capitur, cum dicit, *pactionem antè confirmatam à Deo respectu Christi*.

Nota igitur hoc loco: Deum in promissione illa facta Abrahamæ & semini, nomine seminis intellexisse primum & propriè caput illud benedicti seminis Iesum Christum: deinde in illo secundo quasi loco, reliquum Abrahamæ semen, siue ex Iudæis, siue ex Gentibus, etsi non sine discrimine aliquo: nam in promissione priùs respexit Iudæos & naturale semen Abrahamæ, quàm Gentes. Experientia enim satis docuit non nisi postremo loco ad Gentes pertinere Dei promissiones, Act. 3. 25. 26. & 13. 46.

17. *Hoc autem dico*] Conclusio per asseuerationem quandam quasi dicat, hoc affirmo atque asseuero pactionem, &c. Cum hac conclusione, coniuncta est assumptio repetita.

Ante] Hoc est, multò antequam lex lata est, ex temporis enim circumstantia, & pactionis antiquitate, conclusionem asserit atque amplificat: non enim verisimile est, legem ideò datam vt promissionem quæ multò antè data est, abrogaret: antiquitas igitur commendat promissionem Dei, atque eam legi succedenti digniorè reddit, neque tamen sequitur quò quid perpetuò antiquius est, eò dignius illud esse, et si in aliquibus rebus prærogatiua sit; & dignitas, à tempore & antiquitate.

Respectu Christi] Nempe qui fuit semen illud Abrahæ cui promissio facta est: promissio igitur & facta est Christo, & facta est in Christo tanquam mediatore, nisi enim ille à principio intercessisset mediator inter Deum & hominem, profectò fœdus illud gratuitum cum homine nō fuisset ictum. Paulus 2. Cor. 1. 20. *Quotquot, inquit, sunt promissiones Dei, in ipso sunt: Etiam & Amen;* hoc est, in ipso constantes sunt ac inuariabiles, nimirum, quia ipse est fundamentum supra quod sunt quasi extructæ, & in quo stant firmiter in æternum, ac complementum suum capiunt.

Lex quæ post annos] Vt priùs ab antiquitate commendauit promissionem, eiùsque dignitatem amplificauit, ita minuit quodammodò legis authoritatem ac dignitatem præ autoritate illa promissionis, à temporis, vt sic dicam, posterioritate: nam data est lex ex monte Sinai

quadringentos & triginta annos post datam Abrahamo promissionem. Hi fuerunt anni peregrinationis populi Israelitici, quibus finito eo ipso die egressi sunt ex Aegypto Exod. 12. 14.

Vt aboleat] Nam facta irrita pactione, aboletur simul promissio: constat enim pactionem promissione cum certa aliqua conditione recedita.

18. *Nam si ex*] Secundum argumentum eiusdem conclusionis, à complemento promissionis hereditatis, hoc est, ab ipsa possessione hereditatis quæ promissa fuit: adiit enim hereditatem illam Abraham cum semine suo, non v. legis sed promissionis. Argumentum est: Non cessit Abrahamæ hereditas ex lege: Ergo lex non abrogat promissionem. Probatur antecedens Cessit Abrahamo hereditas ex promissione: Ergo non ex lege. Probatur sequela: non potest cedere ex utroque simul: nulla gratia ex utroque, & lege operum, & gratuita promissione contingit.

Hereditas] Hereditatis nomine intelligo primam regionem Canaan, tanquam typum, deinde ipsos cælos, & cælestem regionem tanquam rem significatam. Nam quòd ad Abrahamum ipsum, nunquam missus est in possessionem terræ Canaan, hoc est, Typi, cui tamen dicitur hoc loco Deus gratificatus esse hereditatem per promissionem. Et Rom. 4. 13. dicitur
promissio,

missio, hoc est, promissa hæreditas, cessasse. Ergo hæreditatis nomine præcipuè hoc loco intelligenda est cœlestis illa Canaan, in cuius possessionem missus est Abraham.

Non iam ex] Posita lege tollitur promissio, ergo lex & promissio contraria sunt, neque concurrere possunt ad nos vel iustificandos vel servandos. Dico non posse concurrere, tanquam causam iustificationis & salutis nostræ. Lex enim & legis opera important meritum & debitum, promissio verò importat meram gratiam à Christo Iesu & eius solo merito. Vide Rom. 4.5. *Ei, inquit, qui operatur, merces, non imputatur ex gratia, sed ex debito*: Debitum autem & gratia consistere unà non possunt: Ergo lex & promissio simul esse non possunt. Potest quidē lex cum operibus suis unà consistere cum promissione, tanquam effectum gratuita promissionis & iustificationis nostræ, arguens nos in gratiam rediisse cum Deo, & iustificatos iam esse; imò dico legis opera necessariò antecedere sententiæ iustificationis plenam executionem, hoc est, glorificationem nostram, non tamen ut glorificationis causam aliquam meritoriam sed ministram ac subservientem, sine qua non sit glorificatio.

Ut hanc rem paulò altius repetamus. Iustificatio, sententia est, non modò iustitiæ, sed & vitæ, ac gloriæ: sententiam hanc nullum bonum opus antecedit, nisi fidem fideique apprehen-

tionem (quæ est in efficaci vocatione) dixeris executionem autem huius sententiæ præsertim quod ad gloriam vel glorificationem attinet, necessariò antecedunt bona opera, quæ sunt effecta quidem sententiæ iustificationis, causæ autem ministræ ac subserviientes executionis, sententiæ, hoc est, glorificationis. Dicam planius, & rem explicabo hac similitudine, Nō secus afficiuntur bona opera in hac vita ad metam illam glorificationis, siue perfectæ sanctificationis, quàm afficitur progressio per viam aliquam ad terminum ad quem progressio fit: nisi quis progressum faciat, vel ambulando, vel currendo, vel aliquo saltem modo mouendo, non assequetur terminum vel metam destinatam: ita nisi quis ambulauerit in bonis operibus, vel cucurrerit in stadio illo bonorum operum, non perueniet ad metam. Quia verò abutuntur aduersarij causæ nomine, quod nō prius audiunt quam meritoriam causam intelligant, ideò nos libenter abstinemus ab illo nomine, ac tutius appellabimus bona opera, bonam conuersationem, vitæ sanctimoniam, quæ via est qua tendimus ad gloriæ perfectionem; appellabimus, inquam, medium, atque illud necessarium, quo itur ad perfectionem gloriæ, & vitam æternam.

19. *Quid igitur*] Occupatio, q.d. Quis igitur est legis vsus si non hic, vt per legem obtineant homines hæreditatem?

Transgressionum] Responſio eſt ex proprio legis uſu, qui eſt, ut peccata coerceantur, & inordinati hominum affectus cogantur in ordinem, ne modum excedant, & externam omnem diſciplinam perturbent. Hic proprius fuit finis datæ legis, de quo etiam poſteà hoc capite verſu 23. & 24. ubi lex primùm præſidio, deinde pædago comparatur: uſus autem ille, de quo Rom. 5. 20. qui eſt ut augetur offenſa, non eſt per ſe legis uſus, ſed per accidens, ut docet Apoſt. Rom. 7. 8. *Nam peccatum*, hoc eſt, caro & corruptio natiua, occasione ſumpta per legem genuit omnem cupiditatem, & per eam euasit ſummè peccans.

Uſquequò] Hunc legis uſum circumſcribit ſuo tempore, tempus autem eſt aduentus Chriſti, qui fuit ſemen illud cui facta eſt promiſſio. In eandem ſententiam dicit poſteà verſu 23. *Iudeos ſub legis præſidio concluſos in eam fidem qua erat reuelanda*. hoc eſt, in fidem Chriſti, & verſu 24. dicit *legem pædagogum fuiſſe in Chriſtum*. Ex quo apparet Chriſti nomine ſuprà v. 16. non Chriſtum myſticum quem vocant, ſed ipſummet Chriſtum, caput corporis ſui, Eccleſiæ intelligendum: nam data eſt lex uſquequò veniſſet Chriſtus, & lex pædagogus fuit in Chriſtum, ut ex fide in eum iuſtificaremur. Nota ruiſus Chriſto propriè ac primàm factam eſſe promiſſionem hæreditatis.

Lex, inquam, ordinata] Obiter digreditur in le-

gis Mosaicæ commendationem, ne omnem illi authoritatem detrahere videatur, commendatur igitur legem ex ministris suis primùm Angelis deinde Mose. Nam quòd ad Angelos, inferenda lege eorum fuisse aliquas partes, conitat ex historia, Heb. 12. 18. &c. Nam sine dubio tum commutati sunt Deum legillatorem, & ille tubæ sonitus, de quo Heb. 12. 19. ab iis certè profectus est.

Per manum] Hic est Moses, qui inferenda lege, inter Deum & populum intercessit tanquã mediator. Moses enim mediator fuit fœderis legalis, vt Christus Euangelici, & fœderis gratuiti, vnde Iohan. 1. 17. *Lex dicitur per Mosem data* esse, nimirum vt mediatorem: *Gratia & Veritas per Iesum Christum.*

20. *Internuncijs*] Rursus digreditur in definitionem quandam internunciij siue mediatoris, simulque in oppositam quãdam Dei ipsius definitionem. Definitio internunciij hæc est, nõ est vnus, scilicet, partis, sed duarum partium dissidentium, nempe Dei & hominis. Huc videtur pertinere hæc descriptio, vt indicet legem cuius minister fuit Moses, signum fuisse, non concordia & pacis, sed discordia.

Deus verò] Descriptio Dei, superiori opposita, quòd Deus sit vnus, sibi que semper similis. Vnitas hæc non tam ad essentiam Dei, quã vna est, quã ad consilia & actiones ipsius referenda est.

21. *Num igitur*] Per proximam illam Dei descriptionem transitum sibi fecisse videtur ad institutam conclusionem, quam ex ea infert, hoc versu; nam sensus est, quasi dicat; cum igitur Deus sit vnus, constans sibi & immutabilis, an igitur legem dedit aduersus promissiones suas? ex eo enim sequeretur Deum variū ac mutabilem esse. Est igitur hoc argumentum institutæ conclusionis tertium, à Dei natura immutabili sempérque sibi simili; Deus est vnus sempérque sibi similis: Ergo data lege, non abrogat promissiones suas. hoc enim est id quod hîc dicit, lex addita est aduersus promissiones Dei, quasi dicat, an lex addita est vt abolet promissionem Dei? promissiones dicit pluraliter, vt & suprâ vers. 16. fortasse quod eadem promissio hæreditatis, facta Abrahamo & semini ipsius, sapius repetita sit.

Absit] Respondet interrogationi per detestationem.

Nam si data] Argumentum est institutæ conclusionis quartum à legis efficacia, vel potius impotentia, in hanc formam. Si data fuisset lex quæ posset viuificare, verè ex lege effet iustitia; vel, quod idem est, lex aboleret promissionem: hoc enim ex illo consequens est; atqui lex non potest viuificare: ergo ex lege non est iustitia. Lex non potest viuificare, hoc est, mortuis in peccato, animam indere, quia non habet comitem viuificatē illum Spiritum, hoc est, Spiritum

tum regenerationis. vide 2. Cor. 3. 6. *ubi littera occidens dicitur, & vers. 9. ministerium condemnationis.* Lex igitur potentia est, non ad vitam, sed ad mortem; vt *Euangelium potentia est ad salutem & vitam æternam cuius credenti.* De hac legis impotentia quod ad vitam: vide Rom. 8. 3. *cum enim legis impotentia nihil posset in carne, &c.* Porro connexionis huius veritas ex eo apparet, quòd si posset lex viuificare perfectèque regenerare hominem, tum profectò homo iustus esset ex operibus legis.

22. *Sed conclusit*] Assumptio syllogismi: at lex non potest viuificare: sententia enim est, quòd tantum absit lex ab eo vt viuificet, vt è contrà concludat omnia sub peccatum & mortificet. *Scriptura* nomine hoc loco intelligo legem, siue Scripturam veteris testamenti, quæ tota ferè est de lege. In eandem sententiam Rom. 11. 32. dicit *Deum conclusisse omnes in contumacia.* Ergo sensus est hoc loco, quòd Deus in scriptura concluderit omnia sub peccatum. *Omnia*, hoc est, omnes homines, & quicquid ad homines pertinet: nam etiam res creatæ in hominis vsum sequuntur statum ac conditionem hominis: conclusò homine sub peccato & miseria, suo quodam modo & ipsæ conclusæ sunt: vide Rom. 8. 19. & deinceps. Rursus liberato homine à peccato & miseria, & ipsæ res creatæ suo quodam modo liberantur, ibidem: & 2. Cor. 15. 17. *Ecce noua facta sunt omnia.*

Vt promissio] Hoc est, ut esset iustitia per fidē,
 & per consequens staret promissio. conclusio
 est, quæ pendet ex assumptione tanquam finis.
 Promissionem intelligo beneficia promissa,
 quæ pendent ex fide Iesu Christi, ac proinde
 non dantur nisi credentibus. Hæc conclusio æ-
 quipollet negatæ: Ergo ex lege non est iustitia:
 quæ hoc loco inferenda fuit. Nota hoc loco:
 occasione miseræ, sub qua conclusi sunt om-
 nes homines, misericordiā datam fuisse: nam
 hoc illi subiungitur tanquam finis. Atque id est
 quod in eundem sensum loquitur. Rom. 11. 32.
Concluserit Deus omnes in contumacia ut omnium mi-
sereretur. Atque id est, quod tantopere admira-
 tur eo loco Apostolus, cum dicit, *O profundas di-*
uitias tum sapientiae, tum cognitionis Dei! admira-
 bilis enim est artifex Deus qui vitam ex morte,
 lucem ex tenebris, iustitiam & vitam ex pec-
 cato & miseria educit.

23 *Antequam autem venisset fides, sub Legis*
praesidio tenebamur, conclusi in eam fidem qua erat
reuelanda.

24 *Itaque Lex pædagogus noster fuit in Chri-*
stum respiciens ut ex fide iustificaremur.

25 *At postquam venit fides, non amplius sub*
pædago sumus.

26 *Omnes enim filij Dei estis, per fidem in Chri-*
sto Iesu.

27 *Nā quicumque in Christo baptizati estis, Chri-*

flum induistis.

28 *Non est Iudæus neque Græcus, non est servus neque liber, non est masculus ac fœmina. omnes enim vos unus estis in Christo Iesu.*

29 *Quod si vos estis Christi, nempe Abraham semen estis, & secundum promissionem hæredes.*

23. **A** *Ntequam autem*] Hactenus demonstratum est: legem non abrogare promissionem: nunc demonstrat, nos postquam venit fides non ampliùs sub lege tanquam pædago go esse, hoc est, ipsam legem quodammodò esse abrogatam. Primùm autem est propositio in qua proponitur nos non esse ampliùs sub lege tanquam pædago go. Propositio autem non est nuda, sed explicata dissimili comparatione superioris nostræ conditionis, quæ fuit sub lege ante fidei aduentum: primùm itaque his verbis est dissimilitudinis protasis, q. d. ante aduentum fidei sub lege fuimus.

Fides] Fidei nomine intelligo Christum fide apprehendendum: nam pro fide versu sequente Christum ipsum nominat, dum dicit legem pædagogum nostrum fuisse in Christum.

Sub legis] Legem intelligo non ceremonialem modò, sed & moralem, adeoque totam legem Dei: nam sub totius legis præsidio detentis sunt olim Iudæi, & tota lex post Christi aduentum ipsis abolita fuit, etiam moralis quoad iustificationem & condemnationem; & morali lege tan-

ge tanquam præsidio circumposito in ordinem fuerant coacti vel maximè.

Præsidio tenebamur] Iudæorum statum sub lege, vel potiùs legis dominium in Iudæos, variis modis effert. *Primum*, exponit ipsum, metaphora sumpta à præsidio, quo conclusi tenentur captiui, ita ut nulla ex parte pateat eis euasio, aut effugium. *Deinde*, dominium legis exponit metaphora sumpta à pædago, à quo quasi manu ducuntur pueri & rudiores, versu sequenti. *Tertiò*, exponit ipsum metaphora sumpta à tutoribus & curatoribus, sub quibus detinentur infantes, & ætate minores tanquam serui totidem, capite sequenti v. 2. & 3.

Status igitur Iudæorum sub lege tanquam præsidio olim fuit quasi captiuorum. Status etiam Iudæorum sub lege tanquam pædago olim fuit quasi puerorum & rudiorum. Status denique ipsorum Iudæorum sub lege tanquam tutrice aut curatrice fuit quasi pupillorum. Hoc igitur loco dicit Iudæos fuisse sub lege tanquam præsidio, non illo quidem quo muniuntur liberi ac sui iuris homines, præsertim principes, sed quo concludi solent captiui ne effugiant. de præsidio ad muniendum liberos comparato, vide Philip. 4. 7. quo loco dicit, *Et pax Dei quæ superat omnem intellectum præsidium erit cordibus vestris*, non quidem quo corda nostra in seruitute, & captiuitate quadam detinenda sunt, sed quo munienda sunt aduersus omnem

tentationem, ad hoc, vt de nulla re sint solliciti

Conclusi in eam fidem] Hoc effectum est eius quod proximè dixit præsidii: præsidio enim vndique concludimur ita vt non possimus ef- fugere.

In eam fidem] Hic finis est cur legis præsidio conclusi fuerunt Iudæi; vel potius tempus est quo captiuitas eorū sub legis præsidio circum- scripta fuit. Est autem tempus ad aduentum vs- que Christi, quo veniente liberati sunt ex illa legis seruitute. Porro in eundem sensum dicit versu sequenti, *in Christum*, quo hîc dicit *in eam fidem*, &c. vt illud intelligamus, de quo suprà monuimus, pro eodem sumi hoc loco, & pas- sim apud Paulum, fidē & Christum. Nunquam enim legas apud Paulum, fidei vocabulum, cū solūm sumitur, nisi in hoc sensu, nempe, Chri- sto fide apprehenso; nisi fidem dixeris nonnun- quam pro doctrina fidei vsurpari, vel pro fidei dono; vt cū dicitur, cuique sapiendum esse prout Deus partitus est mensuram fidei, Rom. 12. 3. vel pro persuasionem quauis, vt Rom. 14. 22. 23. Dicam verbo, in negotio iustificationis non aliter accipitur fidei vocabulum seorsim sum- tum, quàm pro Christo fide apprehenso.

24. *Itaque lex*] Eandem protasin clariùs epetit, & legem pædagogo comparat. *In Chri- um*] Hoc est, vsque ad Christum. *Vt ex fide*] Hoc est, vt ex fide Christi iustificaremur: hic enim us est fidei in Iesum Christum, vt per ipsum iustifi-

iustificemur. Fides enim *primùm* credit Christum pro nobis mortuum esse & resurrexisse: atque hæc est ea quæ dicitur fides Christi. *Deinde* per illam fidem in mortem & resurrectionem Christi iustificamur, hoc est, beneficiū iustificationis à Deo consequimur, non quidem virtute fidei, hoc est, apprehensionis nostræ, verum Christi eiusque meriti virtute: ita tamen ut fide nostra apprehendatur in efficaci vocatione iustificationem antecedente.

25. *At postquam venit*] Hactenus fuit protalis dissimilitudinis: sequitur apodosis, & præcipua conclusio hoc loco demonstranda; nempe quòd adueniente Christo non ampliùs sint Iudæi sub lege tanquam pædagogo, vel quòd iis lex quodammodo abolita sit.

26. *Omnes enim*] Ratio est cur non simus sub lege tanquam pædagogo: est autem à contraria conditione qua filij Dei sumus: pugnant enim ista, sub pædagogo esse, & filios esse: nam qui sub pædagogo sunt, serui sunt aliquo modo; qui verò filij sunt, liberi sunt. Valet ergo sequela ab affirmatione filiorum ad negationem pædagogi: filii Dei sumus: ergo non sumus sub pædagogo.

Per fidem] Causam notat cur simus filij, efficientem & meritoriam, nempe fidem in Christo; vel, quod idem est, Christum fide apprehensum: nam quemadmodum, postquam in efficaci vocatione Christus fide apprehensus est, cen-

femur deinde iusti in illa fide, ita etiam per eandem illam fidem censemur filij. Porro eodem loco æstimare solet Apostolus iustificationem & adoptionem nostri. Nam cum dicit Rom. 8. 30. *Deum quos vocavit eos iustificasse*, haud dubiè adoptionem iustificationis nomine intelligit; idque non immeritò: nam Deus vna eademque opera nos iustos in Christo censet ac pro suis filiis nos reputat. Et quemadmodum ex iustificatione sequitur glorificatio, ita ex adoptione, vel eò quòd filij sumus, Paulus Rom. 8. 17. deducit hæreditatem illam æternam, quæ nihil aliud est re ipsa quàm nostra glorificatio. Quòd si velis distinguere beneficia hæc iustificationis, & adoptionis, dicemus adoptionem quasi amplificationem quandam iustificationis. Deus enim quos semel iustos censuit, eos quasi arctius amplectitur & pro filiis suis habet in Christo Iesu.

27. *Nam quicumque*] Filios Dei esse eos docet, neque id tantum, sed & vniuersos sine discrimine filios esse ostendit, ex illa cum Christo *κοινωνία*, qua Christi facti sunt, ipsumque induerunt, in hanc formam. Qui Christum induerunt, ii omnes filij Dei sunt: at omnes vos Christum induistis; ergo omnes filij Dei estis. Assumptionem probat hoc versu à symbolo baptismi: baptismus enim signum est, adeoque organon *κοινωνίας* & coniunctionis cum Christo. Syllogismi forma est, Quicumque in Christo bapti-

baptizati sunt Christum induerunt: at omnes
sine discrimine in Christo baptizati estis: Ergo
omnes sine discrimine Christum induistis.

Porro *Christum induere*, est cum eo arctissime
coniungi, &, vt loquitur Apostolus Rom. 6. 5.
complantari cum eo similitudine mortis & resurre-
ctionis ipsius, cuius coniunctionis symbolum est
baptismus, Metaphora sumpta à vestibus ac in-
dumentis: coniunctio enim Christi & nostri va-
riarum rerum tam naturalium, quàm artificio-
sarum, coniunctionibus in scriptura figuratur,
vt capitis & membrorum, vt vitis & palmitum,
vt mariti & vxoris, vt fundamenti & ædificij, vt
indumenti & induti. Quarum omnium con-
iunctionum nulla tam arcta est, quàm est Chri-
sti & membrorum ipsius: Id enim quod figura-
tur perpetuò quiddam maius est figura sua, est-
que quiddam in se infinitum & incomprehen-
sibile, quod Spiritus rebus quibusdam familia-
ribus, & comprehensibilibus pro nostro captu
solet adumbrare.

28. *Non est Iudæus*] Occupatio, cum homi-
nes tam diuersi sint natione, conditione, sexu,
quomodo fit vt omnes Christum induerint, &
Christi sint? Respondet, in Christo omne hoc
discrimen Gentis, conditionis, sexus sublatum
esse; & rationem addit à contrario: *in Christo e-*
nim omnes sunt vnus homo. Simile vide Colos. 3.
11. *ibi non est Græcus & Iudæus*, & c. Paulus Rom.
3. 22. paucis hoc ipsam expressit cum dixit, *Non*

enim est distinctio. Nomina igitur omnia hæc, discrimina naturalia & politica, in Christo sublata esse: dico in Christo eiusque respectu, secus enim manent, hoc est, respectu huius vitæ & huius sæculi, quorum respectu necessaria sunt hæc discrimina nationum, cōditionum, sexuū: ideoque à Christo non sunt sublata, sed ab eo sanctificata, cū aliōqui respectu vocationis, iustificationis, vitæ denique æternæ sublata sint.

Vnus estis] Vnum hominem vocat, & Eph. 2. 15. vnum hominem nouum, idque in Christo Iesu, cuius hominis vnus Christus ipse caput est: nos autem omnes corpus sumus. Idem ibidem vers. 16. dicit nos *reconciliatos in vno corpore*: nos igitur omnes inter nos efficiamus vnum corpus, cum Christo autem simus vnus homo, cuius caput est Christus, nos verò corpus. Summam hanc coniunctionem sic expressit Colos. 3. 11. *Christus est omnia & in omnibus*. Huiusmodi quoque est illa loquutio 1. Cor. 15. 28. *Deus erit omnia in omnibus*, qua significat nostri & Dei summa & ineffabilis quædam coniunctio: eaque ex duabus causis, priori, quòd Christus erit omnia; posteriori, quòd idem ille Christus erit in omnibus, id est, implebit præsentia sua omnes pariter. Cum igitur vnus Christus futurus sit omnia, idque in omnibus; profectò omnes futuri sunt vnus in illo vno, qui omnes impleturus est.

29. *Quòd si vos*] Hæc est propositio illius syllogismi, de quo suprà: nam Abrahæ semen esse, & filios Dei esse, idē sunt reipsa, vide Rom. 9.8. *Non, inquit, qui filij carnis sunt, si filij Dei sunt, sed qui filij promissionis sunt, censentur in semine*, nempe, Abrahæ, hoc est, filij Dei sunt: id quod exigit oppositionis ratio. Porro Christi esse, & Christum induere, idem sunt. *Et secundum*] Amplificatio quædam & commendatio seminis Abrahæ, siue filiorum Dei, ex hæreditate illa cœlesti quam cōsequentur. Nam qui filii sunt, necessitate hæredes sunt: *hæredes quidem Dei, co-hæredes autem Christi*, Rom. 8.17. Causam hæreditatis coniungit, nempe, promissionem gratuitam, ne putetur ex lege hæreditatem illam obtineri.



ANALYSIS CAP. IIII.

ARGUMENTVM.

<p>I. Hoc capite primùm redit ad dissimilitudinem illam conditionis Iudaorum ante aduentum Christi, & conditionis post eius aduentum, quæ fuit cap. superiori vers. 23. 24. eamque illustrat similitudine conditionis hæ-</p>	<p>redis, quæ quidem alia est ante tempus illud à patre præfinitam alia Verò post illud tempus: similitudo hæc est ad Versum & que 8.</p> <p>II. Hinc digressiones sunt aliquot ad Versum & que 19.</p>
---	---

111. Postremò eandem illam dissimilem conditionem docet per figuram quamdam ex ipsa lege desumptam: docet, inquam, atque concludit nos nunc non esse sub lege, sed sub promissione, ad quem caput.

CAP. IIII.

1 Hoc autem dico: Quam diu haeres est infans, nihil differt à seruo, quamvis sit Dominus omnium:

2 Sed sub tutoribus & curatoribus est usque ad tempus quod pater praefinierit.

3 Ita & nos, quum essemus infantes, sub clementis mundi eramus in servitutem redacti:

4 At postquam venit plenum tempus, emisit Deus filium suum factum ex muliere, factum Legi obnoxium:

5 Ut eos qui Legi erant obnoxij, redimeret, et adoptionem acciperemus.

6 Quoniam autem esset filij, emisit Deus Spiritum filij sui in corda vestra, clamantem, Abba, id est, Pater.

7 Itaque non amplius es servus, sed filius: quòd si filius, etiam haeres Dei per Christum.

Hoc autem dico] Praefatur se clariùs expositurum dissimilem illam conditionem, de qua superiori cap. 23. 24. q. d. id quod dixi, ante fidei aduentum nos sub lege fuisse, post verò fidei aduentum nos non ampliùs sub lege esse: ego dico illud & expono hac sequenti similitudine magis

gis apertè. *Quandiu hæres*] Protasis similitudinis, continens dissimilem hæredis statum, qui fuit ante præscriptum à patre tempus, & qui est iam post præscriptum à patre tempus. *Quamdiu* hæres infans est, & cum nondum venit illud tempus à patre præscriptum, manet, tanquam seruus sub tutoribus & curatoribus: at postquam venit tempus à patre præfinitum, non ampliùs est sub tutoribus & curatoribus. In hac protasi similitudinis primùm est conditio hæredis dum infans est, siue antequam venit tempus à patre præfinitum, ad alteram vsque partem. v. 2. quo deinde loco est conditio hæredis postquam venit tempus à patre præfinitum.

Quamuis sit] Exaggeratio conditionis illius hæredis quam dixit proximè ex diuersis: q. d. quamuis iure sit Dominus, tamen dum infans est nihil differt à seruo.

2. *Sed sub*] Ostendit nihil differre à seruo, ex eo quòd subiiciatur tutoribus & curatoribus tanquam Dominis. Est obnoxius curatoribus & tutoribus tanquam Dominis, ergo seruo similis est. Argumentum est ex relatis, vel potius paribus in relatis. Tutores ac curatores sunt domini eius dum infans est, ergo ipse seruus est.

Vsque ad tempus] In hac temporis limitatione intelligenda est altera pars protaseos, nempe conditio hæredis post tempus à patre præfinitum, superiori dissimilis. q. d. at postquam venit

tempus à patre præfinitum, & ex infantia excessit hæres, iam non est seruus, neque sub tutoribus & curatoribus.

3. *Ita & nos*] Redditio similitudinis, continens dissimilitudinem conditionis nostræ, partim quæ fuit ante aduentum Christi, partim quæ est iam post aduentum Christi. q.d. eodem modo nos, qui hæredes sumus iure, ante aduentum Christi, quo tempore tanquam infantes fuimus, sub lege eramus in seruitutem redacti: at verò postquam venit Christus, redempti sumus à legis seruitute ac donati filiorum libertate.

Sub elementis] Elementa dicuntur ritus illi & ceremoniæ legales, adeoque tota lex, siue legis doctrina, quæ elementaris duntaxat fuit, respectu doctrinæ Euangelij, quæ est de Christo, & de ipso corpore, quæ quidem doctrina legalem ac veterem subsecuta est, & illius superioris respectu perfecta quædam & absoluta doctrina & est, & dicitur. Lex superiori capite vers. 20. comparata est pædagogo, qui manu ducit puerum, traditque ipsi doctrinæ prima elementa & rudimenta: nunc verò comparatur ipsis elementis & rudimentis quæ traduntur à pædagogo. Hoc nomine vocantur ritus legales, Coloss. 2. 20. *Mundum* opponit spirituali regno Christi: mundum enim intelligit sæculum rude ac crassum, & quasi terrenum, vel, vt sic dicam, homines mundanos, & terrena, non autem cælestia,

cœlestia, & spiritualia sapientes. His hominibus opus fuit primis huiusce elementis, ac rudimentis religionis, quibus tum erudirentur, tanquam dum ex mundanis & terrestribus fierent spirituales. Ergo elementa referuntur ad mundum & homines mundanos & terrestres: doctrina Euangelij, quæ est de Christo refertur ad regnum Christi spirituale & homines spirituales ac cœlestes.

4. *At postquam* } Altera pars redditionis continens dissimilem superiori conditionem eam, quæ nunc est post Christi aduentum. Notandum quod non dicat ieiunem (ut superiori capite vers. 20.) At postquam venit fides, vel Christus, redempti sumus à lege, verum dicat, *postquam venit plenum tempus, emisit Deus*, &c. Alludit autem ad tempus illud præfinitum à patre aliquo terreno, de quo supra vers. 2. *Plenum* itaque *tempus* est, tempus à Deo patre præscriptum missioni filij sui in mundum. In genere tempus à Deo alicui rei præstitutum plenum dici potest: in specie verò tempus illud præstitutum à Deo aduentui Christi plenum dicitur, ut hoc loco, & Eph. 1. 10. Præscriptum enim fuit hoc tempus rei longè maximæ & salutari in primis: nam etsi multa sunt respectu rerum multarum, quæ quotidie accidunt, plena tempora; tamen plena tempora dicuntur κατ' ἐξοχὴν respectu rerum quarumcunque, & euentuum maximè illustrium, ut respectu legis datæ po-

pulo Israëlítico, respectu primi aduentus Christi, respectu secundi aduentus Christi. Dum dicit, *postquam venit plenum illud tempus emisit*, &c. significat non potuisse mitti Christum in mundum priusquam illud tempus à patre præscriptum omnibus suis punctis, & momentis esset completum.

Emisit Deus] Factum est Dei in pleno tempore. Non igitur nudè, & ieiunè dicit Christum venisse in mundum, sed vt ipsius aduentus gloria Deo Patri tribuatur, autorem eius narrat Deum patrem & factum ipsi tribuit. vide simile Rom. 8. 3.

Factum ex] Modus est aduentus siue missionem filij Dei in mundum. Missus enim in mundum est speciali quodam modo, dum factus est ex muliere: alioqui enim filius Dei in mundo iam fuit à principio, sed speciali quodam modo tum manifestatus est, nempe in carne. vide Ioh. 1. 10. *In mundo erat*, inquit, & *mundus per eum factus est*, quo significat in mundo fuisse filium Dei ante manifestationem ipsius in carne: tum addit, *ad suos venit*, quo significat specialem quendam filij Dei aduentum, cum, nimirum, caro factus est, vt expressè loquitur eodem capite postea vers. 14. Porro *factum* dicit *ex muliere* eodem sensu, quo Rom. 8. 3. *conformatum* dicit *carni peccato obnoxia*. Eodè sensu dicit Ioh. 1. 14. Sermonem carnem factum esse; factus est filius Dei ex muliere, non secundum deitatem, sed secundum

secundum carnem, vt Apostolus circumscribit hoc locutionis genus Rom. 1. 3. *Facto*, inquit, *ex semine Davidis secundum carnem*. Cæterum ipsa locutio indicat filium Dei fuisse priusquam factus est, ac proinde Christum Deum esse, vel ex hoc locutionis genere colligitur.

Factum legi] Secunda pars narrationis facti patris, prima enim fuit in filio suo emittendo & aptando illi corpus, vt loquitur Dauid Psal. 40. 7. Secunda autem est in reddendo iam misum, legi obnoxium, hoc est, legis execrationi, supra 3. 13. *factus est autem sub lege* quia prius factus est ex muliere: neque enim execratio ea sub qua fuimus competere potest nisi in carnē & naturam humanam. Quamobrem oportuit redemptorem nostrum hominem esse. Heb. 2. 14. *Ipse*, inquit, *consimiliter particeps factus est carnis & sanguinis*, vt per mortem aboleret eum qui mortis imperium habuit. Tum postea vers. 16. *Non enim*, videlicet, *Angelos assumpsit, sed semen Abrahamæ* assumpsit.

5. *Vt eos qui*] Finis cur filius Dei factus sit legi obnoxius, nempe, vt eos qui erant legi obnoxij redimeret, hoc est, eos redimeret qui erant sub execratione legis, dum pro ipsis factus est execratio, supra 3. 13. factus enim execratio pro nobis, & suspensus è ligno, non modo liberauit nos à legis & peccati seruitute, sed etiam morte sua sustulit è medio peccatum & legem. Vide Rom. 8. 3. *Condemnauit*, inquit, *peccatum in carne*,

nempe crucifixæ; & Eph. 2. 15. *Inimicitias*, inquit, *id est, lege mandatorum quæ in ritibus posita est, per carnem suam abolitis*: & Colos. 2. 15. *Ac deleto quod aduersum nos erat rituum chirographo, quod, inquit, erat nobis cōtrarium, ipse verò cruci affixum è medio sustulit*. Nam, vt paulò altiùs hoc repetam; Cum quatuor numero sint hostes humani generis, diabolus, peccatum, mors, & lex, vt est virtus peccati; Christus, cū nos redimeret è seruitute istorum hostium, eadem opera omnes istos hostes peremit, sua nimirum ipsius morte. Liberatio enim per Christum non est nisi interemptis priùs iis à quibus captiui detinebamur: interemptio autem hæc facta est per suam ipsius mortem.

Vt adoptionem] Hic rursus finis est redemptionis à legis seruitute, & execratione, vt nimirum ex seruis filij & liberi euaderemus. In eundem sensum dixit suprà cap. 3. 13. 14. *Nos redemptos esse ex maledictione legis, vt benedictio Abrahæ extaret in Christo Iesu*: cernitur enim benedictio Abrahæ in vocatione, iustificatione, adoptione, denique glorificatione. Ergo in primo Christi aduentu accepimus adoptionem, & manifestatum est quòd filij Dei sumus; verū plenā adoptionis nostræ manifestatio reiicitur in secundum Christi aduentum. Vnde Paulus Rom. 8. 23. dicit nos etiam adhuc adoptionem, id est, redemptionem corporis nostri expectare: & 1. Ioh. 3. 2. dicitur nunc quidem nos filios esse, sed non-

nondum patefactum esse quid erimus; scire autem nos fore ut cum ipse patefactus fuerit similes ei simus: & Eph. 1. 14. de nobis loquitur ac si nondum in libertatem essemus vindicati, cum dicit, Spiritum esse Arrhabonem libertatis nostræ dum in libertatem vindicemur ad eandem gloriæ ipsius.

6. *Quoniam autem estis*] Adoptionem nos accepisse ostendit ex testimonio Spiritus sancti, emissi in corda nostra, & clamantis Abba pater: quasi dicat, vel hac ratione cognoscetis vos adoptionem accepisse, & filios esse, quod demissus in corda vestra spiritus clamet, Abba, pater: idè autem quia estis filii datus est vobis spiritus. Nota, adoptionem causam esse Spiritus sancti, & regenerationis; quia enim adoptamur à patre in filio, idè datur nobis Spiritus filij, cuius hoc est officium ut *testetur* *Unà cum spiritu nostro nos iam esse filios Dei.* Rom. 8. 16. hoc est, nos censerì in numero filiorum, cum tamen natura simus filij iræ Eph. 2. 3. Vnde *spiritus adoptionis* vocatur, nimirum quia testatur nos adoptatos esse in Christo; & *arrhabo est hæreditatis nostræ.* Eph. 1. 14. Testatur autem nos filios esse hoc ipso quod demissus in corda nostra clamet, *Abba, pater*, hoc est, liberet corda à conscientia seruitutis, cui erant obiecta, ita ut iam liberata cum fiducia deum possunt inclamare. Liberat autem Spiritus corda, dum effundit in ea Dei in Christo charitatē Rom. 5. 5.

Emisit Deus] Donum hoc spiritus adoptionis non ieiunè quidem effert, sed describit primùm à primo ipsius autore & efficiente, Deo patre, vt eius doni gloria in patrem redundet. Deinde *spiritu filii* nominat, ad hoc, vt innuat à patre per filium emissum esse Spiritum, vt gloria quoque huius doni sit filij: filius enim mittit Spiritum, sed à patre Ioh. 15. 26. dicitur autem hoc loco Spiritus filii, non autem patris, quia pater dedit filio spiritum suum cum omnibus donis spiritus, Ioh. 3. 34. 35. Est tamen etiam spiritus Patris: nam hoc quod dicimus, dedisse patrem filio omnia, intelligimus de communicatione, nempe, quòd pater cum filio suo omnia communicauerit. Ergo ita data sunt filio omnia, vt interea patri reseruata sint. Vnde Ioh. 17. 10. mea omnia tua sunt, & tua mea sunt.

Clamantem] Eodem sensu dicit Rom. 8. 15. *Nos per spiritum clamare Abba pater.* Per spiritum, inquam, primò efficientem, cum corda duntaxat sint secundariæ causæ, & instrumentariæ Spiritus sancti. Idèd motus illos cordium spiritui tribuit principaliter, & hoc loco, & Rō. 8. 26. cum dicit *spiritum interpellare pro nobis suspiris inenarrabilibus*: hoc enim locutionis genere illud planè significat primum motorem esse Spiritum sanctum; nos autem instrumenta esse duntaxat spiritus, viua tamen & non mortua, vtpote non tantùm instructa naturali hac vita, verùm multò magis per eundem illum spi-
ritum

itū viuificata: viuificati autem spiritu *συνεργοι*
 amus & cooperamur cum Spiritu sancto.

Pater] Vocem Hebræam interpretatur Græ-
 cè, quo indicet Spiritum sanctum non clama-
 re tantum, eumque inuocare Hebræo idioma-
 te, sed etiam Græco, hoc est, aliarum gentium
 quarumcunque idiomate. Nam Græcorum no-
 mine communiter omnes Gentes excepta sola
 Iudæorum gente intelliguntur, vt passim ad
 Rom. *Iudæo primum deinde Græco*. Quod si spi-
 ritus Deum inclamet patrem, etiam gentium
 quarumcunque idiomate, profectò spiritus a-
 doptionis etiam Gentibus datus est, vnde Act.
 15. 8. *Deus, inquit, dedit iis testimonium, dato ipsis*
Sp. S. Sicut & nobis.

7. *Itaque non*] Concludit ex spiritus testi-
 monio eos filios esse, vel, quod idem est, adop-
 tionem accepisse, vt suprà vers. 5. illustratur con-
 clusio à contraria serui conditione.

Quod si filius] Amplificatio & commendatio
 quædam conditionis filiorum, à necessaria filii
 relatione ad hæredem: filij enim Dei necessa-
 riò omnes hæredes sunt. Hanc ipsam consequen-
 tiam habes Rom. 8. 17.

Per Christum] Pro hoc dicit Rom. 8. ibidem
hæredes Dei, cohæredes autem Christi. Cæterum
 vt per Christum & in Christo filij Dei simus &
 adoptamur in filios Dei Eph. 1. 5. ita per eun-
 dem Christum hæreditatem consequimur.
 Christus enim solus naturalis est Dei filius, ac

proinde hæres propriè: nos autem insiti ipsi per fidem, tanquam fratri primogenito, Dei filij quodammodò, hoc est, per adoptionem euadimus, iuxta promissionem, *In semine tuo benedicentur omnes Gentes*, hoc est, per fidem Christo insiti, ac proinde Christi fratres primogeniti. Euadimus etiam hæredes Dei in eo, ac proinde Christi cohæredes, vt vocamur Rom. 8. 17. Hinc apparet quænam sit coniunctio nostri cum Deo, quæ rursus cum Christo filio. Coniunctio nostri cum Deo, est quasi filij cum patre; cum filio autem coniunctio est, quasi fratris cum fratre, eoque primogenito: atque idè cum fratre qui primas teneat & caput sit: vnde etiam dicimur cum Christo coniungi, vt membra cum capite coadunantur.

8 Imò tum quidem ignorantes Deum, seruiebatis iis qui natura non sunt dij.

9 At nunc quum cognoscatis Deum, imò potiùs edocti sitis à Deo, quomodo conuertimini retrorsum ad impotentia & egena elementa, quibus retrorsus ab initio seruire vultis?

10 Dies obseruatis & menses, & tempora, & annos.

11 Metuo de vobis ne frustra fatigatus sim apud vos.

12 Estote quasi ego: nam ego sum quasi vos: fratres, rogo vos. nihil mihi fecistis iniuriæ:

13 Nostis

13 *Nostis autem me per infirmitatem carnis vobis prius euangelizasse.*

14 *Et experimentum mei quod fiebat in carne mea, non pro nihilo habuistis, neque respuistis, sed me ut Angelum Dei, ut Christum Iesum, excepistis.*

15 *Qua igitur erat beatitudinis vestrae predicatio? testimonium enim reddo vobis, vos, si fieri potuisset, oculos vestros effoscos daturus mihi fuisse.*

16 *Itaque num inimicus factus sum vobis, dum vobis vera loquor?*

17 *Depereunt vos non bene, imò excludere nos volunt, ut se depereatis.*

18 *Sed præclarum est vehementer amare in re bona semper, & non solum dum præsens sum apud vos.*

8. **I** *Mò tum quidem*] Secunda pars capitis, in digressionibus posita, prima digressio est in reprehensionem apostasiæ, & defectionis ipsorum, qualis fuit cap. 1. 6. & deinceps, item cap. 3. vers. 1. & deinceps. Ergo hoc loco iam tertia vice eos reprehendit. Argumentum reprehensionis primum est à Dei cognitione, illa nimirum quæ est per verbum ipsius, non autem ea quæ est per naturam & res creatas, de qua Rom. 1. 21. nam etiam ut ex eo loco discitur, ipsæ Gentes & Idololatræ cognouerunt Deum. Argumentatio est, *Nunc quidem cognoscitis Deum*: ergo quomodo conuertimini retrorsum ad impotentia & egena elementa? q. d. il-

Iud non est tolerabile, quòd qui cognoscunt Deum conuertant se retrorsum ad res inanes & vacuas gratiæ. Factum hoc ipsorum quod est ex cognitione Dei, exaggeratur facto ipsorum præcedente in colendis Idolis, idque ex ignorantia Dei veri. q. d. tolerabile illud fuit, vos ignaros veri Dei aliquando seruiuisse Idolis: at nunc cùm cognoscatis Deum, quomodo tolerari potest quòd conuertamini retrorsum ad egena elementa?

Tum] Nempe, cum Iudæi essent sub lege, vos tum inseruiebatis Idolis, & longè deteriori loco fuistis quàm Iudæi: longè enim præstantius fuit ante Christi aduentum sub lege & ritibus legis viuere, quàm Idolis inseruire.

Ignorantes Deum] Cognouerunt quidem Deum ex rebus creatis, sed ignorârunt quatenus ex verbo suo Deum non cognouerunt. Ignorarunt etiam, quia, vt dicitur Rom. 1. 28. *visum est eis Deum non retinere in notitia.* Nam sua sponte ex-cæcati sunt.

Iis qui natura] Naturam & veritatem opponit speciei & figmento. Nam Idola natura & re ipsa dii non sunt, verùm homines fingunt ea sibi deos esse: vnde *εἰδωλα* vocantur: hoc est, non res ipsæ, sed species quædam & vmbre rerum inanes. Quare Apostolus 1. Cor. 8. 4. dicit, *Idolum nihil esse in mundo*; significat nō esse rem, sed spectrum aliquod, & inane figmentum humani cerebri. Existit autem figmentum istud
hoc

hoc modo. Primum ex natura est aliqua veri Dei notitia, Rom. I. 19. Deinde homines, qui sunt malitia, *mutant gloriam incorruptibilis Dei, in efformatam imaginem mortalis hominis*, ibidem 23. mutant autem dum *evanescent in ratiocinationibus suis*, ut est ibidem vers. 21. cognoscunt igitur natura esse Deum. Sciunt etiam aliquo modo quis sit Deus, eumque in rebus creatis intuentur; sed vix affulsit iis lux illius maiestatis cum evanescit quasi ex oculis. Illi autem palpitando in tenebris Deum quærunt, ut dicitur Act. 17. 27. non tamen inveniunt; nihilominus non desistunt, verum pro Deo vero, speciem Dei, hoc est, figmentum suum apprehendunt & colunt: repræsentant autem sibi illud figmentum & speciem illam in efformata imagine mortalis hominis, quadrupedum, volucrum, reptilium: nam Idolum quod peperit cerebrum parat manus.

9. *Ac nunc quum*] Quasi dicat per comparisonem præteriti facti & præsentis; præteriti, inquam, tanquam minoris ac minus detestandi: præsentis tanquam maioris & magis detestandi: quasi dicat, multò minus tolerabile est illud quòd post cognitionem Dei còvertamini retrorsum ad impotentia, & egea elementa.

Cognoscatis] Cognitio hæc est per verbum.

Imò potius] Correctio, qua cognitionis huius excellentiam significat, ex Deo autore & doctore: Erant enim *θεοδιδάκτοι*, docti nimirum

per spiritum Christi: vide 1. Cor. 8. 3. *Si quis diligit Deum*, inquit, *hic edoctus fuit à Deo*, & 13. 12. *Tū verò cognoscā prout edoctus fuero*.

Quomodo conuertimini] Conclusio reprehensionis, qua significatur ἀποστολία & defectio eorum: nam hæc retrogressio est defectio, vide cap. 3. 3.

Impotentia & egena] Elementa impotentia & egena opponit Deo; defectio enim est à Deo ad ipsa. Porro *elementa*, hoc est, ritus legales, *impotentia & egena* dicuntur, non quidem quòd ante Christi aduentum nullum planè vsum aut etiam vim habuerint (vibræ enim erant Christi venturi, & vibræ tum quidem efficaces, propter corpus ipsum quod venturum erat) verum egena dicuntur & impotentia, quia post Christi aduentum nullius iam corporis vibræ sunt, ideòque nullam efficaciam habent, nihilque iis subest.

Ab initio] Hoc est, quasi verò iam initiandis sitis, cum iam spiritu inceperitis, vt dictum est suprà cap. 3. 3. hoc est, initium sumpseritis non ab his elementis, verum ab ipso spiritu.

10. *Dies observatis &*] Egena illa elementa illustrat inductione quadam rituum legalium quorundam, præsertim eorum qui de temporibus præscripti erant in lege, cuiusmodi erat observatio dierum, mensium, annorum, ritus de cibis (hoc est, de alio quodam adiaphoron genere) quos Coloss. 2. 12. reiiciendos censet: nam
et si

si tum primis illis temporibus propter infirmos fratres ciborum usus, & dierum observatio libera fuit, Rom. 14. tamen simpliciter non fuit in his libertas Christiana, cum umbræ fuerint, & præsentī iam corpore oporteat cessare umbras: ideoque Apostolus cum videret esse aliquos qui vrgerent observationem & usum ierarum rerum tanquam simpliciter necessaria, vehementer sese iis opposuit, ac si Christum manirent. Ex his quæ dicta sunt ab Apostolo, illud in primis observatione dignum esse duximus, nempe, meliorem fuisse statum Galatarum, dum ex ignorantia Dei idolis inservirent, quam cum ex Dei cognitione ritibus legalibus sese subiicerent, & umbras corpori admisceant: quod fit ut ego putem tolerabiliorem conditionem Idololatrarum, qui Deum nunquam cognoverunt, neque verbum ipsius, quam istorum, qui scientes & volentes inuertunt Evangelium Christi, & onerant se mandatis & doctrinis hominum,

II. *Metuo de vobis*] Conclusio reprehensionis mitigata: nam non dicit apertè defecisse eos, sed id se dicit metuere; neque dicit metuere se ne deficient, verum id subobscurè innuit dum dicit metuere se ne frustra fatigatus sit apud eos, nam frustratio hæc præsupponit defectionem. Nota quàm graue sit bonis pastoribus perdidisse operam, non hoc dico quod unquam sui respectu perdant operam; nam sem-

pertriumphant in Christo, & *Christi bona fr. grantia sunt Deo in iis qui seruantur, & in iis qui pereunt*, 2. Cor. 2.15. verum id volo quod perdata sit eorum opera respectu eorum, qui vel non conuertuntur ad ipsorum prædicationem, vel conuersi deficiunt.

12. *Estote quasi ego*] Secunda digressio, in qua hortatur ad mutuum amorem, tanquam constantiæ ac perseuerantiæ in veritate fundamentum quoddam: nam non parum facit ad fidem & ædificationem amor erga pastores & doctores: quos enim diligimus eos libenter audimus. Amandi igitur sunt doctores & pastores, & in pretio habendi, sed *tanquam ministri Christi, & dispensatores mysteriorum Dei*, 1. Cor. 4.1. primum itaque est exhortationis propositio: *Estote quasi ego*, q. d. estote alter ego, ut ne sum egomet carior mihi quam vobis: innuit enim hac locutione amorem arctissimum.

Nam ego sum] Primum argumentum à pari suo erga ipsos amore: nam par pari referendum. Argumentatio est, Ego vos diligo, ergo vos pariter & mutuò me diligite. Locutio hæc, ut illa prior significat amorē arctissimum; quasi diceret, non estis vobis ipsi cariores, quam mihi estis. Nam primus charitatis gradus proximo secundum Deum est, quo quis seipsum diligit: vnde dilectionem sui ipsius statuit Deus mensuram dilectionis proximi; *dilige, inquit, proximum sicut teipsum*. Matth. 22.39. Ergo

um significare volumus dilectionem proximi non mediocrem, dicimus nos esse tanquam filios, hoc est, nos non minùs ipsos diligere, quam ipsi se diligant.

Fratres, rogo] Repetit exhortationem maiorem vehementia: prius enim monuit, nunc vero rogat & obnixè petit. Ex quo illud discimus, verum magni interesse, ut quis diligat doctorem & pastorem suum: non enim si res fuisset parui momenti, tam seriò de ea cum iis egisset: facit aque non mediocriter ad ædificationem & salutem nostram dilectio Pastorum, & Doctorum. Caterùm de mutua illa dilectione pastoris & regis, vide 2. Cor. 6. 11. & deinceps. Quo loco apostolus profitetur primùm amorem illum quo ipsos sit persecutus; deinde mutuam amorem requirit. Vehementem autem illum amorem, quo ipsos sit persecutus, pluribus exponit. *Os*, inquit, *nostrum apertum est erga vos, cor nostrum dilatatum, non habitatis angustè in nobis.*

Nihil mihi fecistis] Occupatio est, qua remouet suspicionem odii erga ipsos. Nam ferè qui nobis iniuriam fecerunt eos odio habemus. Quasi dicant Paulo, non immemor es iniuriæ in te nostræ, quid igitur nos ad dilectionem tui hortaris, cum tu sis alieno à nobis animo? Respondet se iniuriam illam sibi factam, quæcunque demùm illa fuerit, nullo habere: ut igitur constet amicitia, iniuriarum perpetuò obliuisci oportet. Non enim faciliè coniungemur cum iis

quos suspicamur iniuriarum sibi factarum nobis recordaturos.

13. *Nostis autem*] Transitio est ad secundum argumentum exhortationis. In transizione preparate eorum animos ad argumentum ipsum. Argumentum est *per infirmitatem carnis*, &c. Si 1. Cor. 2. 3. *fui ego cum infirmitate & timore ac tremore multo apud vos*. Infirmitatis nomine intelligit mala quaecunque, quibus obnoxius fui ex infirmitate naturæ humanæ, siue ea extra ipsum fuerunt, siue ea in ipso ac naturæ ipsius inhæserunt. De externis malis vide 2. Cor. 11. 23. & deinceps, de internis vide 2. Cor. 12. 7. & deinceps, quo loco infirmitatis nomine intelligit surculum illum infixum carni, & Angelum Satanae qui ipsum colaphis cædebat. 1. Cor. 2. 3. Infirmitatem videtur opponere eminentiæ sermonis, in qua non est versata ipsius prædicationis.

14. *Et experimentum*] Hoc est argumentum secundum, à pristino ipsorum erga se officio. q. d. Tum me licet multis tentationibus & infirmitatibus obnoxium, plurimi fecistis: Ergo nunc diligite. Quod supra dixit infirmitatem, nunc experimentum sui *in carne* vocat. Nam infirmitatum & afflictionum omnium hic usus fuit, ut exploraretur & experimētum ipsius fieret: nomen ab usu sumptum est.

In carne] Caro hic est humana natura & imbecillis hominis conditio, ut accipitur 2. Cor.

2.3. Eodem sensu dicitur corpus, mortalis caro, externus homo 2. Cor. 4. 10. 11. 16.

Non pro nihilo] Argumentum illustratur ex diversis.

Sed me ut] Hoc est argumentum amplificatum comparatione simili ab Angelis, & ab ipso Christo. Non est hîc putandum eum Christi loco habitum fuisse à Galatis. Æstimationem nim eam reprehendit 1. Cor. 3. 4. 5. 21. verùm hoc tantùm innuit, reputatum se ut ministrum Christi ac dispensatorem Mysteriorum Dei, atque ideò ministerii sui causa duntaxat, & qua ratione minister est Christi. Nam etiam minimi Christi tanquam Christum accipimus, sed ministerii causa; vnde sequitur nos Christum ipsum pluris facere; nam ut vulgò dicitur, propter quod vnumquodque est tale, illud ipsum est magis tale.

15. *Quæ igitur erat*] Per exclamationem commendat, imò admiratur potius beatam ipsorum conditionem, quæ tum fuerat cum ipsum tanti facerent, & ut Angelum Dei, ut Christum ipsum exciperent. Commendat igitur illud ipsum factum à beata illa conditione quæ ex ipso sequebatur: beatitas enim nostra, siue status postea beatus, est ex benefactis nostris.

Testimonium enim] per repetitionem illius eorum erga se benevolentiae & officij, beatitatem illam quam prædicavit, confirmat: benevolentiam autem illam eorum suo testimonio ob-

signat, q.d. vos tum si fieri potuisset oculos vestros effoscos daturi fuissetis mihi, cuius rei ego ipse testis sum. Hyperbolica ista loquutione significat, Galatas impensè admodum ipsum d. lexisse.

Si fieri potuisset] Hac hypothesi & conditione innuit, nefas esse testari amorem erga aliquem huiusmodi corporum nostrorū violatione: neque tamen minorem esse propterea dilectionem animi significat, quòd violatione huiusmodi aliqua corporis eam non testemur. Nichil enim imminuitur de amore vel amicitia, deò quòd amici causa nolimus facere indignum & vetita.

16. *Itaque inimicus*] Conclusio exhortationis, in qua expostulat cum iis, quòd ipsum pro inimico habeant, & odio prosequantur immeritò, id est, veritatis causa. Concludendum fuit. Ergo vos me ducite amicum, vel me diligite: verum loco illius conclusionis expostulat cum iis, quòd ipsum pro inimico habeant. Nota hoc loco, veritatem odium parere, præsertim autem veritatem verbi diuini & Euangelii, quæ gignit in animis aduersariorum & impiorum odium acerbissimum.

17. *Deperunt vos non*] Occupatio, atque tu pseudoapostolos vocas, nos deperunt? Respondet deperire quidem, sed non benè, hoc est non in bonum finem.

Imò excludere] Ostendit quod dixit, pseudo:

postolos non benè deperire ipsos, ex fine ipsis proposito, qui est vt, excluso Paulo, tanquam riuali, Galatæ ipsos tantùm depereant. Significat igitur pseudoapostolos non sincerè amare, sed in amando sese quærere, etiam cum perniciæ Galatarum:quam necesse fuit sequi ex Paulo, si veritatem Dei ipsis tradiderit: excluso atque contempto: simul enim cum ipso oportuit excludi doctrinam ipsius, adeoque Christum ipsum. Nota igitur, quid sibi propositum habeant falsi quique doctores, nempe, se ac ventrem suum. Vide Philip. 2. 19. Quorum Deus, inquit, est venter.

18. *Sed præclarum*] Nunc è diuerso qui sit ipsius erga Galatas amor edocet. Eius duas condiciones facit: prima est quòd sit in re bona, hoc est, quòd sit bona de causa: secunda est, quòd sit semper, hoc est, vt verba sequentia exponunt, non solum dum præsens est apud illos, sed etiam dum absens. Primùm amorem huc suum erga Galatas non tam in specie, quàm in genere effert, idque non sine epiphonemate aliquo. Sed, inquit, præclarum est vehementer amare in re bonà semper. q. d. quomodo ego vós amo. In fine versus specialitè loquitur, de amore suo dum dicit, Et non solum dum præsens sum.

19 **F**llioli mei, quos iterum parturio, vsque-
quò formetur Christus in vobis!

20 *Velim autem nunc adesse apud vos, & mu-*

tare Vocem meam: quoniam haesito in vobis.

21 Dicite mihi qui sub Lege vultis esse, Legem non auditis?

22 Scriptum est enim, Abrahamum duos filios habuisse: unum ex ancilla, & unum ex libera.

23 Sed is qui ex ancilla natus est, secundum carnem natus est: qui verò ex libera, per promissionem.

24 Per quæ aliud figuratur. Nam hæ sunt duæ illæ pactiones, una quidem quæ est Agar, ex monte Sina, generans prolem ad servitutem.

25 Istud enim nomen Agar est Sina mons in Arabia: eadem autem serie respōdet ei Hierusalem quæ nunc est, servitque cum filiis suis.

26 Illa verò quæ sursum est Hierusalem, libera est, quæ est mater omnium nostrum.

27 Scriptum est enim, Latere sterilis quæ non parit: erumpe & clama quæ non parturit, quoniam plures sunt liberi desertæ, quàm eius quæ habet virum.

28 Nos igitur, fratres, secundum Isaac, promissionis filij sumus.

29 Sed quemadmodum tunc is qui secundum carnem genitus fuerat, persequabatur eum qui natus erat secundum spiritum: ita & nunc.

30 Sed quid dicit Scriptura? Eiice ancillam & filium eius: non enim hæres erit filius ancillæ cum filio libera.

31 Nempe, fratres, non sumus ancillæ filij, sed libera.

19 *Filioli mei*] Tertia pars capitis, in quo ostendit tertio loco nō esse eos sub lege, sed sub promissione. Argumentum autem est à seruili eorum conditione qui sunt sub lege, & à libertate eorum qui sunt sub promissione. Argumentatio est: Qui sunt sub lege, serui sunt; qui qui verò sunt sub promissione, liberi: Ergo non sumus sub lege sed sub promissione. Atque hæc summa est eorum quæ dicuntur ad finem vsque capitis. Primū autem est præfatio constans primū *εὐχῇ* siue optatione, qua significat velle se adesse apud eos vt coram loquatur. Deinde loco quodam attentionis, quo excitat eos qui volunt esse sub lege ad legem audiendam. In *εὐχῇ* siue optatione est blanda ipsorum compellatio, qualis solet esse patrum, dum filios suos alloquuntur; filioli mei, inquit: tum causam addit cur filiolos vocet, ab actu parturiendi, vel potiùs denuò parturiendi.

Quos, inquit, iterum parturio] Quibus verbis innuit summam molestiam & dolores, quasi partus, & eos quidem iteratos in Galatis Christo lucrificandis.

V[bi] quo formetur] Circumscribit actum illum denuò parturiendi ipsos, suo tempore: Est autem, quoad Christus formetur in ipsis, hoc est, quoad ipsi fiant perfectus quasi ac maturus fœtus in Christo. Nam hæc idem sunt, Christum formari in nobis, & nos formari in Christo, Christum adulescere in nobis, & nos ado-

lescere in ipso; Christum viuere in nobis, & nos viuere in illo. Oriuntur autem hæ phrasæ ex summa illa Christi & nostri *κοινωνία*. ex hac circumscriptione actus parturiendi, illud videmus: Non tum demum parturitionem esse cum mulier enititur fœtum iam maturo perfectumque, verum parturitionem esse toto illo tempore quo formatur fœtus in vtero: nam toto illo tempore dolor aliquis est & desiderium aliquod enitendi fœtum.


20. *Velim autem*] Hæc est *ἐὺχ* siue optatio: duo autem sunt quæ optat, primum est vt præfens sit apud ipsos: alterum est vt mutet vocem suam; hoc est, vt aliis quasi verbis, & alio vocis sono vtatur apud eos quàm antea vsus est. Nam verba quibus vsus est antea, spreta sunt ab iis ac contempta. Nota igitur optandum esse vniuersimodis mutemur, & quasi transformemur, ad hoc vt homines lucrifaciamus.

Quoniam hæsito in vobis] Hæc ratio est mutationis optatæ, quòd de ipsis hæsitet, ac dubitet de ipsorum erga se animo: dubitat enim ne, nisi mutatum quodammodò & alium factum videant, satis libenter vocem ipsius audiant.

21. *Dicite mihi*] Secunda pars præfationis locus attentionis, per correctionem quandam vt videtur, subiectus. q. d. verum, cum coram loqui non possim, absens hoc à vobis peto, vt dicatis mihi vos qui vultis esse sub lege, an vel

is legem audire. Significat absurdū esse quòd nolint audire legem, cū velint esse sub lege: 7. d. vos non rectè facietis si non audiat eam legem quam tanti facitis, & cui tam arctè adhæretis.

22. *Scriptum est*] Nunc aggreditur argumentationem, ac antecedens argumentationis declarat. Declarat autem ex historia quadam filiorum Abrahami ex Genesi, quæ pars legis est repetita & in medium adducta. Primū autem est ipsa historia duobus versibus: deinde est allegorica eius interpretatio à versu 24. ad versum 28. In historia primū narratur ac proponitur, Abrahamum habuisse duos filios: deinde describuntur filij duo ex matribus suis, inter se conditione pugnantibus: vna enim erat ancilla ac serua, altera libera. Deinde describuntur duo filij ex nascendi modis planè à se inuicem discrepantibus: vnus enim natus est secundum carnem, alter verò per promissionem.



23. *Secundum carnem*] Hic modus est, quo natus est Ismael ex ancilla Agar, nempe, secundum naturæ vim. *Caro* enim hoc loco est natura vel naturæ vis, quæ est in carne, h. e. in ho-

mine *ψυχικῶς* & animali.

Per promissionē] modus est quo natus est Isaac ex Sara, superiori planè contrarius, nempe, vi gratiæ promissionis factæ Abrahamo; ve quod idem est, vis gratiæ diuinæ ex qua fuit illa promissio: gratia autem & natura pugnant inter se quàm maximè. Oportuit autem Abrahamum fide amplecti gratuitam promissionem, ad hoc vt ipsi efficax esset ad generationē Isaac. De hac fide qua amplexus est promissionē, vide Rom. 4. à versu 18. ad 22. Quo loco videbis generationem hanc adscribi fidei Abrahamæ, quā hīc attribuit promissioni; verūm non pugnant ista, siue dicas Isaacum natum per promissionem, siue dicas natum per fidem. Nam in vocabulo fidei intelligenda est promissio quam fide apprehendit; & in vocabulo promissionis intelligenda est fides quæ promissionem apprehendit. Quare, vt verbo dicam, natus est Isaacus per promissionem fide Abrahami apprehensam; vel, quod idem est, per fidem Abrahami quæ apprehendit promissionem. Sciendum tamen est principale vim fuisse promissionis & gratiæ, qua natus est Isaac: fidem autē Abrahami causam fuisse non principalem aliquam, verūm causam sine qua non, & subseruientem ac instrumentariam.

24 *Per quæ*] Hactenus fuit historia filiorum Abrahami ex lege adducta; sequitur nunc allegorica ipsius interpretatio. Primum autem est præfatio

præfatio ad interpretationem, quæ innuit interpretationis genus, non quidem propriè sed impropriè ac allegoricè. Nam huius historiæ interpretatio est duplex, vna per propriam verborum significationem, quæ nimirum nomen Ismaelis propriè accipitur, item nomen Isaaci, item nomen Hagaris, item nomen Saræ; &c. Altera quæ hæc nomina impropriè accipiuntur & transferuntur tropicè ad res alias. hoc modo Ismael significat seruos quoscūque qui sub lege sunt; Isaac liberos sub Euangelio; Agar veterem & Legalem pactionem: Sarà nouam & gratuitam pactionem. Præfatur itaque Apostolus secuturum se interpretationem verborum impropriam & allegoricam; q. d. quæ sunt si allegorizentur, vt sic dicā, hoc est, si alieno & nō suo ac proprio sensu interpretetur: nam ἀλλήγορειν, est prædicare aliud quàm verba ipsa propriè significant.

Nam hæc sunt] Interpretationem allegoricam exorditur à duabus matribus, Agare & Sarà: duas autem matres interpretatur duas pactiones siue testamenta duo. Locutio enim ista modificata est, & metonymicè res significata signo tribuitur, vt in formula illa cænæ dominicæ, *hoc est corpus meum*. Est autem metonymia subiecti, in qua vocabulum subiecti attribuitur adiuncto suo.

Vna quidem] Duarum pactionum descriptiones sequuntur. ac primum quidem est descri-

prio veteris pactionis: describitur autem ex loco primùm ex quo facta est, nempe, monte Sina. Deinde describitur ex generatione sua, vel potiùs generationis fine. *Generans*, inquit, *prolem ad seruitutem*. Tertio loco describitur ex figura sua, quæ fuit Agar ancilla (ordinem seruo contextus Græci) sensus enim est, ac si dicat, atque hæc quidem pactio significata est per Agarem ancillam.

25. *Sina enim mons*] Rationem obiter reddit cur vetus pactio, quæ nimirum ex monte Sina data est, figurata sit per Agarem ancillam. Est autem ratio ex descriptione Sinæ, quòd sit mons in Arabia: hoc est, in meridiano tractu ex quò fuit Agar. quasi dicat, cum Sina sit mons in Arabia & meridiano tractu, vnde fuit Agar, profectò non immeritò vetus pactio, quæ fuit ex monte Sina, per Agarem figuratur. Quare idè Agar figura fuit veteris pactionis, vel vetus pactio per Agarem figurata est, quia Sina mons vnde fuit vetus pactio, ibi fuit, vnde Agar fuerat.

Pari autem] Obiter in eadem serie cum Sina collocat præsentem ac terrestrem Hierusalem. q. d. eodem planè loco habeo Hierusalem præsentem cum Sina monte, ex quo fuit prior illa pactio, cum & ex eà quoque sonet lex & pactio vetus, siue legalis.

Seruitque] Hæc ratio est cur eodem loco sit terrestris Hierusalem cum Sina: est autem à conditione

ditione Hierusalem, & filiorum ipsius: conditio seruitutis est. Notandum autem hîc indifferenter accipi pactiones & loca ex quibus pactiones factæ sunt. Nam & hoc loco Hierusalē terrestris pro veteri pactione capitur, & sequēti versu, cælestis Hierusalem pro noua. Atque ita transitum sibi fecit ad alterius pactionis descriptionem.

26. *Sublimis* verò] Hactenus de priori & legali pactione; sequitur nunc posterior & Evangelica pactio, eiusque descriptio quædam, allusione quadam ad præsentem & terrestrem Hierusalem, de qua proximè facta est mentio. Vocat eam sublimen ac cælestem Hierusalem, nimirum à loco vnde facta est pactio Evangelica. Nota autem hîc phaseos mutationem: antithesis enim & oppositionis ratio exigebat, ut diceretur, altera verò pactio, cum dictum sit vers. 24. *Vna quidē*. Verùm occasione proximæ digressionis in explicationem terrestris Hierusalem, quam comparauit in paribus cū monte Sina, nouam & gratuitam pactionem nomine sublimis Hierusalem appellauit, & loquendi genus mutauit.

27. *Libera est*] Descriptio est cælestis Hierusalem, primùm à conditione libertatis: deinde à filiis suis, quæ est, inquit, *mater omnium nostrum*. Posteriores descriptionis partem & multitudinem filiorum cōfirmat testimonio Isaïæ, cap. 54. in quo prædicit Propheta, complures fore

liberos Ecclesiæ Christianæ & Euangelicæ; hæc comparat cum Ecclesia (vt sic dicam) Legali, hoc est, cum Synagoga Iudæorum. Atque hætenus interpretatio fuit allegorica historiæ illius ex Lege repetita, in qua videmus duarum dūtaxat matrum interpretationem expressam; nā primū duas matres interpretatus est duas pactiones: inde duas illas pactiones descripsit & ordine explicauit. Habemus tamen in descriptionibus duarum pactionum interpretationem duorum filiorum, Ismaelis, & Isaaci, etsi non expressam. Nam Ismael figura fuit omnium quos vetus pactio generat: ad seruitutem, hoc est, omnium seruorum Legis, & peccati: Isaac verò typus fuit omnium filiorum Dei, & liberorum sub Euangelio seu in libertate viuentium sub Euangelio. Habes quoque in iisdem illis descriptionibus (etsi obscuram) interpretationem allegoricam duorum modorum illorum quibus duo filij nati sunt. Nam pactio Legalis generat filios naturaliter, & natura homines se subiiciunt Legali pactioni: Pactio verò gratuita generat filios supernaturaliter, & vi gratiæ, non naturæ.

His itaque expositis, relinquitur intelligendum, illud antecedens argumentationis illius quam diximus haberi toto hoc loco, nempe, qui sub Lege sunt, serui sunt; qui verò sub promissione, liberi. Nam & historia recitata ex Genesi, & historiæ interpretatio, vt facilè apparet,

huc

huc pertinent, vt videamus eos qui sub veteri
 pactione & Lege sunt, seruos esse; eos verò qui
 sub noua pactione & Euangelio sunt, liberos
 esse; ideoque sic concludit ex præcedentibus,
Nos igitur fratres secundum Isaac promissionis filij
sumus, quasi dicat, non sumus igitur sub Lege,
 sed sub promissione.

28. *Secundum Isaac*] hoc est, exemplo Isaaci
 qui typus fuit omnium filiorum promissionis;
 & quasi primogenitus cælestis Hierusalem. *Se-*
cundum enim hoc loco est similiter. q. d. Quem-
 admodum Isaac promissionis filius fuit & is qui-
 dem primogenitus. *Promissionis filij*, hoc est ge-
 nitiui pactionis gratuitæ, quemadmodum &
 Isaac genitus est.

29. *Sed quemadmodum*] Occupatio, at filij
 promissionis obnoxij sunt persecutionibus va-
 riis: Respondet id quidem ita esse, & responsio-
 nem suâ similitudine persecutionis quam pas-
 sus est Isaac aliquando ab Ismaële illustrat.

30. *Sed quid dicit*] prior pars responsionis
 fuit per concessionem: Hæc verò est per corre-
 ctionem, in qua similitudine eiectionis Agar
 & Ismaëlis è domo Abrahami, significat tãdem
 seruos istos in Ecclesia, qui filios persequuntur,
 tandem ex Ecclesia & domo Dei eiiciendos.

31. *Nempe fratres*] Redit ad conclusionem,
 concluditque non affirmationem modò, vt su-
 præ, sed & negationem. Non sumus, inquit, filij
 ancillæ, sed liberæ.

CAPITIS QUARTI TABVLÆ.

Vetus pactio siue Hierusalē terrestris	}	generat	{	seruos	}	secundū	{	naturę vires.
Noua pactio siue Hierusalem cælestis								
				liberos				gratiā.

Vel, vt tabula interpretationis respondeat
historiæ & tabulæ historiæ:

Serui	}	nati ex	{	pactio veteri siue terrestri Hierusalem	}	secundū	{	naturę vi- res & ope- ra.
Liberi				pactio noua siue cælesti Hierusalem				gratiam & Christum.

Ex hac tabula colligitur hæc propositio, filij
veteris pactiois siue qui sub Lege sunt, serui
sunt; contrā verò, filij nouæ pactiois siue qui
sub Euangelio sunt, liberi sunt. Ad hanc pro-
positionem assumitur, At nos non sumus serui,
sed liberi. Assumptio hæc, vt quæ pro confesso
accipiat, omissa est; conclusio verò expressa
est; Ergo non sumus filij veteris pactiois siue
ancillæ, vt ipse loquitur; sed nouæ pactiois &
liberæ: siue, quod idem est, non sumus sub Le-
ge, sed sub promissione. Estque hoc argumen-
tum tertium quo ostendit Galatas non esse sub
Lege, sed sub promissione. Argumentum est à
cōditione tam eorum qui sub Lege sunt, quàm
qui sub promissione, nimirum horum liberta-
te, illorum seruitute.



ANALYSIS CAP. V.

ARGUMENTVM.

Huius capitis partes sunt tres. | ta Vice reprehendit Galatarum apostasiam ad Vers. 13.

I. Primum hortatur ad perseuerantiam in libertate ad Vers. 7. | III. Hinc sequitur doctrina parantica de Christianis moribus ad finem

II. Deinde iam quartum capitis.

CAP. V.

1 In libertate igitur qua Christus nos liberauit, perstate, & ne è contrario implicamini seruitutis iugo.

2 Ecce, ego Paulus dico vobis, si circumcidamini, Christum nihil vobis profuturum.

3 Testor enim rursus omni homini qui circumciditur, eum esse debitorem totius Legis seruandæ.

4 Facti estis inanes, separati à Christo, quicunque per legem iustificamini, & à gratia excidistis.

5 Nos enim Spiritu ex fide spem iustitiæ expectamus.

6 Nam in Christo Iesu neque circumcisio quicquam valet, neque præputium: sed fides per charitatem agens.

In libertate] Superiori capite conclusit Galatas sub promissione esse, nō autem sub lege: nunc autem hortatur vt perseuerent sub promissione;

nec, è contrario, implicent se legis iugo. Doctrinam igitur ipsam satis prolixam de legis abrogatione, inde à versu. 23. capitis tertij, sequitur exhortatio ista ad perseverantiam *Libertate*, hoc est, perstate sub promissione, sub qua liberi estis: nam hæc verba exponenda sunt per relationem ad ultimum versum præcedentis capitis, in quo dictum est, *Non sumus ancilla filij, sed libera*, hoc est, non sumus sub lege, sed sub promissione: Hinc est exhortatio. Ergo manete filij liberæ, & ne vos ex filiis liberæ efficiatis ipsi filios ancillæ. Verùm Apostolus pro filiis liberæ dixit liberos, & pro filiis ancillæ, dixit servos: & hortatus est ad perseverantiam in libertate, dehortatus autem est à defectione in servitutem legis. Dixit *iugum servitutis*, quia servitus legalis cervicibus hominum imponitur tâquam iugum graue, quod ferre ipsi non possunt: vide Act. 15. 10. Vbi legem vocat iugum cervici impositum, quod neque partes, neque ipsi portare potuerunt. vide Matthæum. 23. 4.

2. *Ecce ego Paulus*] Ratio dehortationis proximæ ab incommodo, quod sequitur legis iugum. Tractatur per occupationem: dici enim ab iis potuit, nos circumcisionem duntaxat amplectimur, & cum Euangelio Christi coniungimus: huic respondet, *si circumcidamini Christus nihil vobis prodest*. Responsionem hanc effert cū obtestatione quadam, quasi diceret, hoc certò futurum experiemini quod ego dico: Ergo in-

com-

ommodum est, quòd Christus nihil iis profuturus sit.

3. Responsionem hanc deinde resoluit in iuriam causam, quæ syllogismi assumptio est. *Terror enim*: quasi diceret, Ego Paulus rursus hoc dico; Quemadmodum dixi circumciso Christum nihil profuturum, ita rursus dico circumcisum astrictum esse obseruationi totius legis. Ergo quemadmodum conclusio cum testificatione quadam Pauli proposita est, ita & assumptio. His testificationibus innuitur veritas & certitudo harum sententiarum, quas hîc tuo testimonio confirmatas effert, & sic asseuerat veras esse.

Eum esse debitorem] Ratio cur circumciscus astringatur ad totius legis obseruationem est, quia circumcisio initiatio quædâ fuit, vt sic loquar, ad legem vniuersam; & qui circumcidebatur, dabat nomen suum quasi Mosi legislatori, seseque obligauit ad totius legis Mosaicæ obseruationem. Quemadmodum nunc qui baptizantur, dant nomen suum Christo, seseque obligât ad omnes partes Christianismi: fuit enim circumcisio initiationis sacramentum Iudæis olim, vt nunc Christianis est Baptismus.

4. *Facile est*] Hæc ratio est cur ex hac assumptione sequatur illa conclusio, siue syllogismi propositio. Est autem syllogismi propositio; Quicumque per Legem iustificantur, siue, quod idem est, debitores sunt totius legis ser-

uandæ, illi facti sunt inanes Christi, & à gratia exciderunt. Assumptio est, Atqui qui circumciditur, iustificatur per Legem, siue debitor est totius Legis seruandæ, vnde sequitur conclusio; Ergo ei qui circumciditur inanis factus est Christus, siue Christus ei nihil prodest.

Quicumque per] Sensus est, qui quæritis per legem iustificari, vel, vt loquitur Rom. 9. 31. *Quis sectamini legem iustitiæ:* nam re ipsa nulla caro iustificatur per legem, Rom. 3. 20. Porro pro eodem sumit ista, iustificari per legem, & debitorem esse totius Legis seruandæ: nam qui debitorem se facit Legis obseruandæ, is quærit iustitiam per Legem. Hoc igitur est illius consequens: & sæpe antecedens & consequens indifferenter sumuntur.

Et à gratia] hæc coniuncta sunt, inanes fieri Christi, & à gratia excidere; vt & Christus & Dei gratia simul sunt, seque mutuò ponunt & tollunt. Nam Dei gratia & misericordia est in solo Christo, & si Christus sit, Dei gratia est, & misericordia. Nota hoc loco Christum & Legem, gratiam & opera, vnà consistere non posse, quorum vnum si ponatur, alterum tollatur necesse est. vide huiusmodi oppositionē Rom. 4. 4. & 11. 6. Gal. 2. 21. Item 3. 12. Neque est quod isti obiciant opera *συνεργία* siue concausas esse in nobis iustificandis; neq; quo minùs *συνεργία* sint in nobis iustificandis impedire hanc, aut huiusmodi aliquam Pauli propositionem,

cum

Am Paulus ex solis operibus Legis affirmatis
 eget Christum, non autem ex operibus, tan-
 quam concausa cum Christo, Christum neget.
 Hoc enim planè falsum esse quod asserunt, vel
 ex eo videmus, quòd Paulo negotium fuit cum
 is qui Legem & Legis opera cum Christo tan-
 quam concausas coniunxerunt in re iustifica-
 tionis. Aduersus hos autem sic argumentatur:
 Qui iustificatur per Legem, inanis factus est
 Christi.

5. *Nos enim*] Ratio propositionis syllo-
 ismi, à modo iustificandi, quo qui Christi par-
 ticipes fiunt iustificantur, superiori illi per Le-
 gem iustificandi modo planè contrario. Est au-
 tem quòd qui Christi participes fiunt per fidem
 iustificètur: Nam quod dicit, *Nos*, intelligit eos
 qui Christi fiunt participes, qui oppositi sunt
 is qui Christi inanes facti sunt.

Spiritu] Causam fidei notat, vt & expectatio-
 nis siue spei, in fine versus; non naturam, aut na-
 turæ instinctum, sed Spiritum Dei sanctum.

Ex fide] dixisset quidem vno verbo, fide iusti-
 ficamur, sed ad maiorem fidei qua iustificamur
 commendationem, coniungit cum fide spem
 vitæ æternæ, quæ fidem iustificantem sequitur
 necessariò. Nam sensus est, quasi diceret ex fi-
 de, qua nimirum iustificamur expectamus spẽ
 (hoc est, vitam æternam speratam) Iustitiæ, hoc
 est, quæ vita æterna iustificationem nostram se-
 quitur. Nota igitur hoc loco ex fide iustifican-

te spem siue expectationem sequi: vnde dicitur *ex fide expectamus*. Præterea ex iustitia vitam sequi: vnde spes iustitiæ vocatur, hoc est; vita æterna, quæ iustitiam sequitur.

6. *Nam in Christo*] Ratione redditur cur Christiani ex fide iustificentur, hoc est, cur hoc modo iustificentur, ex abnegatione modorum iustificationis contrariorum. Duo sunt autem iustificationis modi quos abnegat, & remouet ab iis qui in Christo sunt, nempe, præputium & circumcisio: quasi diceret, Christianos, neque præputium, neque circumcisio, iustificat; siue, quod idem est, neque præputium, neque circumcisio valent quicquam iis qui in Christo sunt ad iustificationem: Ergo fides est qua Christiani iustificantur.

Per charitatem] Hac quasi differentia distinguitur vera & non simulata fides, ab hypocritica & simulata. Et Paulus eam adiecit, vt ostendat se loqui de vera illa & nõ simulata fide. Nõ igitur ex hac differentia fidei adiecta, dicendum est charitatem & opera charitatis *συναντία* esse cum fide in nobis iustificandis. Manifesta enim captio est quæ ita concluditur: fides per charitatem operans nos iustificat, ergo opera charitatis nos iustificant. Captio est à coniunctis ad diuisa.

7. *Currebatis pulchrè, quis vos inhibuit, vt non obsequeremini veritati?*

8 *Hac persuasio non est ex eo qui vocat vos.*

9 *Paulum fermenti totam massam fermentat.*

10 *Ego confido de vobis in Domino, vos nihil aliud esse sensuros: sed qui turbat vos, auferet condemnationem, quisquis fuerit.*

11 *Ego autem, fratres, si circumcisionem etiam prædico, quid adhuc persecutionem patior? nempe abolitum est offendiculum crucis.*

12 *Vtinam etiam abscindantur qui vos inquietant.*

7. **C***urrebatis*] Secunda pars capitis, in qua iam quarta vice Galatas reprehendit: nam incertum est ex hac Epistola, magisne ex instituto doceat, an reprehendat: reprehendit autem ob apostasiam & defectionem. Argumentum hoc loco est, à pulchro illo progressu, quem fecerunt in veritate: *Currebatis*, inquit, *pulchrè*. Metaphora est ab iis qui in stadio currunt, cuiusmodi frequens apud Paulum 1. Cor. 9. 24. Item. 2. Tim. 4. 7.

Quis vos] consequens argumentationis tractatur dialogismo, in interrogatione & responsione posito. Sensus est, ergo malè defecistis à veritate.

8. *Hac persuasio*] Occupat eorum responsionem, in qua Deo qui ipsos vocavit, persuasionē hanc de lege coniungenda cum Evangelio fortasse tribuerent. Respondet, eos nō ita doctos esse à Deo, qui est veritatis dūtaxat doctor.

9. *Paulum fermenti*] altera occupatio, at agitur de re parui momenti; de circumcissione & ritibus, nescio quibus? Respōdet, vniuersam puram & sinceram doctrinam corrumpi ac peruertere admistione alicuius partis, vel minimæ, doctrinæ impuræ: hoc autem significat similitudine quadam & parabola à fermento: qua etiam ipse Christus vsus est. Alibi autem, vt, 2. Tim. 2. 16. apertè loquitur, dicitq; eos qui cœperunt semel à scopo aberrare ad maiorem procedere impietatem, & sermonē eorum depascere vt gangrænā.

10. *Ego confido*] Correctio & mitigatio superioris reprehensionis, in qua primū significat se de Galatis meliora sperare: deinde iudicium denunciat in pseudoapostolos. De Galatis ergo dicit, confidere se eos nihil aliud esse sensuros, hoc est, aliud à veritate ea quam acceperunt. Atqui iam aliud senserunt, cū passim in hac Epistola defectionem & apostasiam iis obiiciat? Respondeo, Apostolum in futurum respicere, innuerēque eos nihil aliud finaliter, vt sic dicam, sensuros: & si quid aliter nunc sentiant, hoc Deum iis postea resecturum, vt loquitur Paulus Phil. 3. 15.

Sed qui turbat] E diuerso denunciat iudicium in pseudoapostolos: turbabant autem eos, idēd quod volebant inuertere Euangelium Christi, vt ipse turbandi verbum exposuit, supra 1. 7. quo loco sequitur talis qualis hīc est iudicij

dicij denunciatio.

Quisquis fuerit] Significat turbatores istos citra exceptionem omnem condemnationem ablaturus. Quemadmodum cap. i. 8. ne se quidem, ne angelum etiam è cœlo excepit, & exemit ab hoc iudicio & anathemate.

II. *Ego autem fratres*] Dixit proximè turbatorem quemcunque citra exceptionem iudicium ablaturum; nunc se purgat ab hoc facto & turbatione, ne videatur ad eum iudiciũ hoc pertinere. Se autem adeò purum esse significat ab hoc facto & turbatione ipsorum, vt è cōtrà quòd non turbet ipsos, & circumcisionem prædicet (hinc enim illa turbatio) significet se persecutionem pati. Sensus igitur est, *Si ego circumcisionem prædico*, id est, si vos turbo, *quid adhuc persecutionem patior?* hoc est, non persecutionem paterer. Ratio subiecta est, quia circumcisio, vel doctrina circumcisionis, coniuncta cum doctrina Euangelij & crucis Christi, tollit omnem offensionem illam, qua Iudæi offenduntur cruce Christi. Argumentatio itaque hoc loco, qua demonstrat se purum esse ab hoc facto, sequitur non eos turbare, hæc est: Ego persecutionem patior, quia non vt alij, vos turbo, & vnà cum cruce Christi circumcisionem prædico: Ergo, ego non is sum qui vos turbo. Probatur sequela; nã si, inquit, vos turbarem, & circumcisionem prædicarem, profectò non offenderentur in me Iudæi: Atqui nulla existente of

fensione, nulla esset persecutio: Ergo hæc ipsa persecutio quam patior, arguit me non esse ex iis qui vos turbant. Vel syllogismus est connexus, cuius propositio hîc tantum habetur: Si vos turbarem, non paterer persecutionem: atqui patior: ergo non turbo. Probatur connectio propositionis, quia si vos turbarem doctrinâ circumcisionis nulla esset Iudæorum in me offensio, & proinde nulla persecutio.

Nota igitur, sinceritatem doctrinæ parere offensionem; offensionem rursus gignere persecutionem. Ergo necesse est quicumque sinceram doctrinam voluit tradere offendiculo sint & persecutionem patiantur. Quod cum vident pseudodoctores, veritati admiscunt mendacia ac sinceritatem doctrinæ Christi peruertunt, tantum ne ob crucem Christi persecutionem patiantur, sicut illius temporis pseudoapostoli, ut loquitur Paulus postea 6.12.

12. *Vtinam etiam*] Redit ad denunciationem; postquam se ipsum purgavit, neque denunciat modò aut pronunciat iudicium in falsos Apostolos, sed zelo quodâ Christi ac veritatis ipsius optat & imprecatur turbatoribus iudicium.

Abscindantur] Hoc est quod dixit capite primo, *anathema sint*, & Rom. 9.3. Anathema separatum à Christo, nâ abscissio hæc est separatio à Christo, & ab ea quæ in ipso est gratia.

Inquietant] Suprà dixit *turbant* eodem sensu. Inquietatio autem hæc nihil est aliud, quam dimotio

dimotio quædam ipsorum à sana mente. Ideò Apostolus 2. Thes. 2. 2. pro eodem hæc sumpsit, à mente dimoueri & turbari: *Ne citò, inquit, à mente dimoueamini, neque turbemini.* De zelo vnde profisciscuntur huiusmodi denuncia-
tiones, & imprecationes diximus in caput pri-
mum.

13 Vos enim ad libertatem vocati estis, fratres: tantum ne libertatem arripite vt datam carni occa-
sionem, sed ex charitate seruite aly aliis.

14 Nam tota Lex vno verbo completur, isto vi-
delicet, *Diliges proximum tuum vt teipsum.*

15 Quòd si aly alios mordetis & deuoratis, vi-
dete ne vicißim aly ab aliis consumamini.

16 Hoc autem dico, spiritu incedite, & quod cõ-
cupiscit caro ne perficite.

17 Nam caro concupiscit aduersus spiritum, spi-
ritus autem aduersus carnem: hæc autem inter se op-
posita sunt, vt non quacunque volueritis, eadem fa-
ciatis.

18 Quòd si spiritu ducimini, non estis sub lege.

19 Porro manifesta sunt opera carnis: quæ sunt,
adulterium, scortatio, impuritas, proteruita,

20 Idololatria, veneficiũ: inimicitia, lis, amu-
lationes, ira, contentiones, dissidia, hæreses,

21 Inuidia, cades, ebrietates, comessationes, &
his similia: quæ prædico vobis, sicut prædixi: eos vi-
delicet qui talia agunt, regni Dei non fore hæredes.

22 At fructus spiritus est charitas, gaudium,

pax, lenitas, benignitas, bonitas, fides, mansuetudo, temperantia.

23 *Aduersus eos qui sunt eiusmodi, non est lex.*

24 *Qui enim sunt Christi, carnem crucifixerunt cum affectibus & concupiscentiis.*

25 *Si uiuimus spiritu, spiritu etiam incedamus.*

26 *Ne simus inanis gloriae cupidi, alij alios prouocantes, alij aliis inuidentes.*

13. **V**os enim] Ratio est tam diræ imprecationis, qua transitum sibi facit ad aliam Epistolæ partem, quæ est de Christianis moribus. Est autem à præsentī eorum conditione, & beata illa libertate ad quam sunt vocati in Christo Iesu: nam hæc conditio libertatis, quò beatior est, eò grauius iudicium incidit in eos, qui conditionem tam beatam perturbant.

Tantum ne libertatem] Hic incipit doctrina parænetica, & quæ est de moribus. Estque hæc *prima parænesis* siue admonitio, ne libertatem Christianam & spirituales commutet in carnalem. *Carnis* nomine hic intellige naturæ corruptelam; hæc omnes occasiones peccandi auide arripit: audito igitur semel libertatis nomine, eam interpretatur licentiam ad peccandum. Quamobrem cauendum nobis perpetuò est, ne etiam ex rebus bonis, cuiusmodi est Christiana ista libertas, reliquæ istæ corruptionis quæ

quæ adhuc aliquot in nobis resident, occasionem peccandi arripiant. Neque enim rebus tantum in se malis utitur caro ad malum, sed etiam rebus in se bonis ad peccatum abutitur. Auidè enim captat omnes peccandi occasiones, Rom. 6.1. Videmus eam ex gratia Dei superabundante, & gratuita iustificatione, arripere peccandi occasionem. Postquam enim Paulus de gratia satis multa dixisset, tum occipit caro, *Quid igitur, in peccato permanebimus?* Simile quid etiam vidimus suprà in hac Epistola 2.17.

Sed ex charitate] Hactenus prohibuit abusum libertatis Christianæ; nunc è diuerso verum eius usum præcipit, qui est in officiis charitatis: estque hæc secunda parænesis à superiori diuersa. Officium charitatis quodcunque seruiendi verbo complectitur: Omne enim officium charitatis consistit in seruiendo; & qui diligit seruit, &, ut loquitur postea. 6.2. portat onus quasi eius quem diligit. Charitas enim perpetuè est cum humilitate, & modestia, qua fit ut quisque alium se præstantiorem existimet Philip. 2.3, & quisquis sincerè amat, is profectò humili sit animo ac modesto necesse est, quo sese libenter omnibus aliis submittat. Vnde charitatis proprietatem hanc inter reliquas assignauit Apostolus 1. Cor. 13.4. Quòd non inflatur, hoc est, quòd humilis sit. Est itaque humilitas virtus cum charitate, tanquam omnium christianarum virtutum radice, coniuncta, & e-

ius quædam proprietas.

14. *Nam tota lex*] Aliquot argumentis ad charitatem mutuam hortatur : primum est ex charitatis quadam definitione, hac nimirum, quòd Charitas sit totius legis complementum. Eodem argumento ad charitatem exhortatus est Rom. 13. 8. *Nam qui diligit alterum*, inquit, *legem implevit*: & ibidem v. 10. conclusit; *Expletio legis est charitas*: legem intellige hîc, vel secûdam legis tabulam (est enim hæc sententia quæ sequitur secundæ tabulæ summa) vel, si lubet, primam etiam intellige, totam enim dicit. Nā etiam dilectio Dei ad dilectionem proximi reducitur aliquo modo, & sub ea intelligitur: dilectio enim proximi oritur necessariò ex dilectione Dei, & dilectio Dei manifestatur dilectione proximi. Quare qui præcipit dilectionem proximi, is eadem opera præcipit dilectionem Dei; & hoc tantùm requirit vt arguamus dilectionem Dei, ex dilectione proximi, tanquam effecto manifestiori.

15. *Quod si alij alios*] Argumentum secundum mutux dilectionis, à contrarij mutui odij & iniuriæ consequente: quasi dicat, Si vos non mutuò dilexeritis, sed è contrà mutuò vos oderitis, profectò futurum est iusto Dei iudicio, vt tandem alij alios planè consumatis. Consumendi enim verbum hoc loco plus videtur significare quàm mordendi & deuorandi: estque consumptio perditionis, cum in superioribus ver-
bis

bis intelligatur duntaxat perditionis principiū: nam mutuū odium, & mutuā iniuriā tādē cedunt in mutuā perniciem. Cauenda igitur initia odiorum, & iniuriarum: desinunt enim tandem in cōsumptionem, extremāque perniciem.

16. *Hoc autem dico*] Parænesis tertia, qua in summa comprehendit omnem spiritualem conuersationem, & quodcunque Christiani officium. hoc dico, inquit, hoc est, ut in summa dicam: correctionis quēdam species est. Eodem sensu alibi dicit, *Incedere secundum spiritum*, Rom. 8. 1. Simul dehortatur à conuersatione secundū carnem, vel potiùs carnis concupiscentiam, ideò dicit, ne perficite quod concupiscit caro. *Concupiscentia* hīc, est motus carnis impurus quicunque: hic motus, dicit Iacobus 1. 15. parit peccatum, nempe actuale & externum, quod, nimirum exequitur, per externa corporis organa & membra.

17. *Nam caro*] Ratio hæc est à contrariis concupiscentiis spiritus & carnis. Neque enim spiritus & caro res duntaxat alias atque alias siue diuersas concupiscunt, verū planè contrarias; neque enim lucta existit ex diuersis concupiscentiis, verū ex contrariis & inter se pugnantibus. Argumentatio itaque est, Contrariæ sunt concupiscentiæ spiritus & carnis. Ergo ne perficite quod concupiscit caro. Ratio enim hæc pertinet ad dissuasionem siue dehor-

tationem ab executione concupiscentiæ carni de qua proximè, vt ipsa conclusio in fine vtus satis indicat.

Hac autem inter se] Conclusio cum repetita assumptionis sententia: quasi dicat, Ea, quam dixi, oppositio & pugna concupiscentiæ spiritu & carnis, eò pertinet, vt non obsequamini concupiscentiæ carnis. Quare argumento hoc: contrariis suadet potissimum ne conuersatio ipsorum sit secundum carnem.

Volueritis] Nempe, secundum carnem: Nam voluntas hîc est carnis concupiscentia.

Eadem faciat] Hoc est, exequamini re ipsa & opere, quo significat Apostolus, non obediendum esse concupiscentiæ & interno motui carnis, quod etiam peccatum est & mortem promeretur, si fieri non possit vt ipsi motus interni, &, vt vocat Rom. 7. 5. affectiones peccatorum, cohibeantur. Eo sensu videtur dicere. Eph. 4. 26. Irascimini & ne peccate: quasi dicat, Si contingat aliquando vt caro erumpat in motum iræ perturbatum, ne exequimini quod suadet ira, hoc est, ne vlciscimini, aut re ipsa iniuriam facite. Quàm autè difficile sit non facere quod nolumus malum, contraque quàm facile sit non facere quod volumus bonum: vide Rom. 7. 15. & deinceps; quo loco videbis etiam quàm difficile sit facere quod volumus bonum: non enim, inquit, facio bonum quod volo; contraque quàm facile sit facere malum quod nolumus.

Quod

Quò sit vt tristi experientia discamus in lucta hac spiritus & carnis ferè superiorem esse carnem, & nos abripere ad executionem voluntatis suæ, adeò vt nisi daret Deus resipiscentiam, & confugeremus per fidem ad Christum, id quod ibidem facit Apostolus post opus carnis perfectum, de nobis actum esset.

18. *Quod si spiritu*] Nunc vicissim suadet conuersationem secundum spiritum: Argumentum est ab eorum conditione qui incedunt secundum spiritum, Non sunt sub lege, hoc est, non sunt sub execratione legis. Nam apud Paulum hæc idem sunt, esse sub lege, esse sub peccato, & esse sub damnatione: vide Rom. 7. & 8. capitibus. Quòd autem regenitis & iustis lex non sit imposita: vide 1. Tim. 1. 9. *Sciens*, inquit, *legem non esse positam iusto*, hoc est, spiritu sancto imbuto, & vltro facienti quæ lex mandat, huiusmodi, inquam, homini non est imposita lex, vt iugum aliquod, & mandatum vrgens ac cogens sub pœna maledictionis: alioqui enim etiam iusto & regenito viuendum est secundum legem: iustus autem vltro & sua sponte viuit secundum legem, non coactè.

19. *Porrò manifesta*] Vicissim dehortatur ab operibus carnis. argumentum est, Qui opera carnis faciunt, regni Dei non sunt futuri hæredes; ergo ne facite opera carnis: probatur antecedens inductione operum carnis. Opera carnis sunt adulterium, scortatio, impuritas, pro-

teruia, &c. at qui talia agunt, regni Dei nō sunt futuri hāeredes: Ergo qui faciunt opera carni regni Dei non sunt futuri hāeredes.

Manifesta] Ante inductionem præfatur opera carnis manifesta esse, idque non tantum ex lege scripta, sed etiam ex lege naturæ.

Quæ sunt] In hac enumeratione quatuor prima vitia impingunt in secundam legis tabulam, & tertiam eius tabulæ legem.

20. *Idololatria, Veneficium*] Duo hæc vitia pugnant aduersus primam legis tabulam.

Inimicitia] Hæc quæ in tertio ordine sunt vitia, excepto vno, quod hæresis est, pugnant aduersus secundam legis tabulam, & legem secundam: numerantur autem octo.

Ebrietates, comessationes] In quarto ordine duo hæc vitia pugnant aduersus tertiam legem secundæ tabulæ.

21. *Quæ prædico*] Hæc assumptio est prosyllogismi: Nam enthymema quod huius loci præcipuum est, non expressè habetur in textu; eius antecedens intelligitur, concludendum ex hac prosyllogismi assumptione, hoc nimirum, Qui faciunt opera carnis non sunt futuri regni Dei hāeredes. Porro resipiscentiæ exceptio hîc intelligenda est: excluduntur enim è regno cælorum non qui his modis peccant simpliciter, sed qui peccant citra resipiscentiam.

22. 23. *At fructus*] Vicissim hortatur ad opera spiritus. Qui opera spiritus faciunt, aduersus

sus eos non est lex, hoc est, ut dicit 1. Tim. 1.9. Lex iis non est posita, quia nimirum sese legi sponte subiiciunt: lex autem posita est iis, qui, ut illic dicitur, subiici nesciunt, & refractariis, quia nimirum lex eos cogit in ordinem denuntiando maledictionem, iuxta illud, *Maledictus omnis qui non manserit, &c.* Hinc sequitur conclusio exhortationis, Ergo opera spiritus facite. Antecedens probatur: hæc sunt opera spiritus, charitas, gaudium, pax, &c. at aduersus eiusmodi non est lex: Ergo qui opera spiritus faciunt aduersus eos non est lex.

Charitas] Fons virtutum, ac officiorum aliorum omnium primo loco numeratur charitas. In primo ordine opera spiritus, quæ hîc sex numerantur, opponuntur operibus carnis in tertio ordine; fides opponitur vitiis in secundo ordine.

Temperantia] Opponitur vitiis in primo & ultimo ordine.

24. *Qui enim*] Ratio assumptionis prosyllogismi: sunt enim Christi: ergo aduersus eos non est lex. Ratio sequelæ, quia qui Christi sunt carnem crucifixerunt, id est, non habent in se materiam legis, quæ est caro cum concupiscentiis & affectibus. Affectiones enim carnis per legem existunt Rom. 7.5.

25. *Si uiuimus*] Hoc aliud argumentum est, quo suadet ad ambulandum secundum spiritum. Est autem à regeneratione: nam uiuere

spiritu hoc loco est regenerari.

26. *Ne simus*] Haftenus in genere partim hortatus est ad incedendum secundum spiritum, partim dehortatus est à vita & conuersatione secundum carnem. Nunc specialiter dehortatur à specialibus vitiis ac carnis operibus. ac primum dehortatur ab ambitione: dissuadet autem ab ambitione à duobus ipsius effectis, primum est in prouocando se vicissim; alterum est in inuidendo sibi inuicem. Ex his effectis primum est manifesta iniuria; secundum verò occulta inuidia.



ANALYSIS CAP. VI.

ARGVMENTVM.

<p>I. Hoc capite Primum pergit in specialibus admonitionibus, Versu & ultimo praecedentis capitis inchoatis, in <i>q³</i> immoratur ad Vers. 11.</p>	<p>II. Deinde praemissa transi- tione est conclusio Epistola ad Versum 18. III. Tertiò, est Valedictio Versu & ultimo.</p>
---	--

CAP. VI.

1 Fratres, etiam si praoccupatus fuerit homo in aliqua offensa, vos spirituales instaurate huiusmodi hominem cum spiritu mansuetudinis: considerans te-
metipsum, ne & tu tenteris.

2 Alij

2 *Alij aliorum onera portate : & ita complete Legem Christi.*

3 *Nam si quis sibi videtur aliquid, quum nihil sit, hunc suus ipsius animus fallit.*

4 *Opus autem suum probet unusquisque : & tunc in semetipso gloriationem habebit, & non in alio.*

5 *Nam unusquisque suum onus portabit.*

6 *Communicet autem qui instituitur in sermone, ei qui se instituit, omnia bona.*

7 *Ne fallimini: Deus non irridetur. quicquid enim seminauerit homo, hoc & metet.*

8 *Nam qui seminat carni suae, ex carne metet interitum: qui verò seminat spiritui, ex spiritu metet vitam aeternam.*

9 *Porro ne benefaciendo segnescamus. tempore enim suo metemus, si non elanguerimus.*

10 *Nempe igitur dum tempus habemus, simus benefici erga omnes, maximè verò erga domesticos fidei.*

Fratres etiam si] Secunda admonitio specialis, ut fratrem praecipuum in aliqua offensa instaurent cum mansuetudine. Fratres compellat benigna compellatione, cum hortatur ad fratrem benignè instaurandum.

Praecipuus] Hoc est, incautus per imprudentiam oppressus fuerit insidiis Satanæ, qui tanquam leo rugiens circuit quarens quem deuore

1. Petr. 5.8. & carnis infirmitate Matth. 26. 41. Vnde & *παράπτωμα* offensa siue delictum hoc loco intelligitur, non quodcunque peccatum, sed peccatum ex infirmitate admissum, non ex malitia aut obstinato Dei contemptu.

Spirituales] Spirituales eos vocat qui spiritu Dei ducuntur Gal. 5. 18. eiusque efficaci potentia sustentantur. Hos Rom. 15. 1. *δυνατοὺς* firmos appellauit, & opposuit *ἀδυνατοῖς*, infirmis.

Cum spiritu] Modus instaurationis, cum spiritu mansuetudinis, hoc est, cum mansuetudine & lenitate. Nota spiritum & omnia eius dona dari nobis non propter nos tantum, sed & propter alios, præsertim autem propter fratres infirmos, vt etiam illi per dona quæ dedit nobis Deus instaurentur: & quò insigniora dona quis à Deo consecutus est, eò magis obligatum esse vt infirmos instauret & ad Christum reducat.

Considerans] Ratio modi huius sumpta ab infirmitate etiam ipsius spiritualis, cui instaurationem alterius præcipit; quasi dicat. Tu quoque infirmus es, & potes tentari à carne & Satana, quemadmodum ille: Ergo, consideratio infirmitatis tuæ debet te excitare ad lapsi fratris instaurationem. Mutat numerum, prius enim vsus est numero plurali; nunc vtitur singulari, vt vnicuique sigillatim, etiam maximè spirituali commendet hanc infirmitatis suæ

suæ considerationem.

2. *Alij aliorum*] Tertium speciale præceptum, quo commendat mutuū leuamen, & charitatis officium quod est in portandis aliorum oneribus, hoc est, in tolerandis fratrum infirmitatibus, & imbecillitatibus iisque corrigendis. Simile est præceptum Rom. 15. vers. 1.

Et ita completa] Ratio præceptionis à fine siue usu officij huius charitatis, nempe, cōpletionē legis Christi, cui implendæ obstringuntur quicumque Christo nomen dederunt. Lex hæc Christi est præceptum charitatis, quod Christus suum vocat Iohan. 15. 12. *Hoc est præceptum meum, ut diligatis alij alios*; & Iohan. 15. 34. *mandatum nouum appellat. Mandatum nouum do vobis, ut alij alios diligatis.* Charitatis autem lex completur ex charitatis officiis, ut docet Iohan. *Filioli mei, ne diligamus verbo, neque lingua solum, sed opere & veritate.* 1. Epist. cap. 3. v. 18.

3. *Nam si quis*] Per occupationem remouet impedimentum quoddam huius officij charitatis: præcipuum impedimentum est φιλαυτία, & nimia æstimatio sui præ aliis: nam φιλαυτὸς apud se statuit, minimè se aliis esse obligatum, & nullam eorum curam sibi suscipiendam, quum se aliis multò præstantiorem & excellentioribus donis præditum existimet: hanc hominis de se opinionem conatur Apostolus

deprimere, quòd qui ita de se existimet animo fallatur.

Cum nihil sit] Ratio cur fallatur à vera ipsius conditione, quia reuera nihil est, & nihil in se habet præ aliis æstimandum: nam reuera nihil sunt omnia dona, etiam alioqui præstantissima sine modestia, qua alium quisque se præstantiorem existimat, Philip. 2. vers. 3.

4. *Opus autem suum*] Huic impedimento *φιλαυσίας* verum affert remedium, nempe probationem operis sui, ut nimirum quisque probet opus suum seorsim apud semetipsum, non attendendo ad opus alterius, aut opus suum ex alterius opere æstimando. Sunt enim qui alioqui per se infirmi facta comparatione cum aliis quos vident se inferiores, materiam aliquam sese efferendi inde arripiant.

Et tunc in] Probationem operis sui, nõ aliam suadet vnìcuique duobus argumētis, primum argumentum est à gloriatione, quam in semetipso habebit, & non in alio, si opus suum probet nulla comparatione habita cum alterius opere. Qui enim se ex aliis æstimat, & opus suum confert cum opere alterius, totam gloriationis materiam extra se habet in alio; simpliciter verò nihil habet in quo iure gloriari possit. Gloriatio autem hæc est bonæ conscientie in iis, quæ officij nostri sunt & vocationis, per gratiam Dei fideliter & sincerè abeūdis, cuius exemplum habemus in Paulo Act. 23. vers. 1. & 2. Cor. 1. 12.

5. *Nam*

5. *Nam unusquisque*] Secundum argumentum à iusta compensatione operis cuiusque, quæ futura est ultimo illo die, ut quisque operatus est, ita mercedem reportabit suorum non alienorum operum: unde sequitur examinanda nobis esse opera nostra, non aliena. *Portare onus* aliter hic accipitur quàm versu 2. etsi utrobique allegoricè sumatur. Nam nihil aliud est hoc loco quàm suorum factorum rationem reddere, & recipere mercedem sui operis pro ipsius operis ratione, gloriam quidem, & honorem & pacem, si opus bonum; oppressionem verò, & angustiam si opus malum fuerit, Rom. 2. 9. 10.

6. *Communicet autem*] Quartum præceptum speciale, de beneficentia erga pastores: quibus tenetur grex communicare res omnes ad hanc vitam sustentandam necessarias. *Sermonis nomine* κατ' ἐξέχλῳ intellige, ut sæpe alias, doctrinam Evangelij, pro qua communicata compensationem postulat bonorum huius vitæ: non quòd aliqua sit inter ista proportio (nam quæ potest esse æqualitas inter victum corporalem, quo naturalis hæc vita sustentatur, & spiritualement quo animæ pascuntur ad vitam æternam, inter bona terrena & cœlestia?) sed ut à maiori ostendat indignum esse si minister res cœlestes gregi communicans corporalibus hisce bonis a grege fraudetur. Sic enim apertissimè argumentatur 1. Cor. 9. 11. *Si nos vobis spiritualia seminavimus, magnum fuerit si nos vestra carnalia mes-*

suerimus. Similis ratio est Rom. 15. 27. Porro de officiis gregis erga pastorem, vide 1. Cor. 9. 6. & deinceps, 1. Thess. 5. 12. 13. 1. Tim. 5. 17. Heb. 13. 17. & alibi passim.

7. *Ne fallimini*] Occupat prætextus quibus excusare possent auaritiam suam, ut sunt ingeniosi admodum homines in quærendis subterfugiis, quibus Euangelij præcones debita bonorum communicatione fraudent. His omnibus prætextibus opponit Deum, qui cum omnia intueatur nullis hominum quantumuis speciosis prætextibus potest irrideri. Ad hanc responsionem accedit, admonendo eos ne fallantur. Sensus igitur est, putatis vos speciosis vestris prætextibus posse excusare auaritiam vestram, sed fallimini. Res enim vobis est cum Deo, cuius legati sunt Euangelij doctores. Verbum *μυκτηρίζεται* irridentis gestum exprimit, quasi nares attrahentis.

Quicquid enim] Probat Deum non irrideri, à iusta compensatione quam rependit operibus hominum, quam exprimit per allegoriam Apostolo satis frequentē, ut 1. Cor. 9. 11. & 2. Cor. 9. 6. ubi sumptus comparat sementi, lucrum autem messi, quam pro sementis ratione Dominus suo tempore redditurus est.

8. *Nam qui seminat*] Proximam allegoriam distributione explicat. Qui seminat carni, metit interitum. Qui verò seminat spiritui, metit vitam æternam. *Seminare carni* hoc loco est, præsentis

sentis huius & perituræ vitæ commoditatibus inferuire, in easque tantum opes suas omnes impendere nullo futuræ vitæ respectu; quod quicumque faciunt metunt interitum, & mortem æternam. *Seminare spiritui* est, sumptus facere in eas res quæ ad pietatem & religionem pertinent, eoque in iis faciendis, ad cœlestem illam & spiritualem vitam inprimis respicere; quod quicumque faciunt, metent gloriam & vitam æternam. Obserua igitur, minimè nobis perire quod in ministros Euangelij impenditur, ut vulgò homines putant, quum inde nobis in cœlis æternæ vitæ thesaurum recondamus.

9. *Porro ne benefaciendo*] Quintum speciale præceptum, quo proximè superius quodammodò extendit, ab hypothese transiens ad thesin. Nam proximè beneficentiam erga ministros Euangelij commendauit; nunc verò eam erga omnes commendat, ut quantum in nobis est, aliorum omnium necessitatibus communicemus, impertiendo ei cui opus fuerit, ut loquitur Eph. 4.28. Verùm Apostolus non simpliciter dicit benefaciendum, sed, non segnescendum in benefaciendo: qua loquendi forma non tantum innuit torporem illum in quem omnes natura propensi sumus (natura enim omnes in benefaciendo segnescimus) sed etiam significat multa esse extra nos in aliis quibuscum nobis res est, quæ nos reddere possunt ad

benefaciendum segnes & tardos, quæ est aliorum ingratitude, cuius solius si ratio à nobis habeatur, necesse est in benefaciendo segnes euadamus. Apostolus tamen monet, non propterea nobis in benefaciendo segnescendum.

Tempore enim] Ratio est à compensatione beneficentiæ, quam etsi iam non videamus, suo tamen tempore recipiemus à Domino ut non sit quod mouere nos debeat, aut à benefaciendo detertere hominum erga quos benefici sumus, ingratitude. Persistit autem in eadem allegoria quæ fuit versibus præcedentibus.

Si non elanguerimus] Ut beneficentiæ nostræ fructum suo tempore metamus, requirit perseverantiæ conditionem: nisi enim perstiterimus in finem, nihil prodest quantacunque antea actæ vitæ beneficentia.

10. *Nempe igitur*] Ex proximo argumento concludit benefaciendum esse, & cōclusionem tum temporis restrictione, tum beneficentiæ obiectis illustrat.

Dum tempus] Significat constitutum esse certum tempus à Deo quo benefaciendum nobis sit; quod si beneficentiæ operibus vacuum sinamus præterire, non amplius benefaciendi locus relinquitur. Superiori versu metendi tempus quoddam proprium assignauit, quod quidem futurum est in altera illa & gloriosa vita. Nunc autem tempus ferendi, hoc est, benefaciendi definit, quod huius vitæ terminis includen-

dendum est; cùm post hanc vitam cessatura sint omnia charitatis officia omnisque benefaciendi facultas auferenda sit. Similem restrictionem vide Heb. 3. 13. *Exhortamini alij alios quotidie, quoad appellatur dies hodiernus.*

Erga omnes] Ostendit quibus sit benefaciendum: benefaciendum est in genere omnibus, etiam inimicis nostris qui nos oderunt, ut præcipit Christus Matth. 6. 44. Sed in primis obligati sumus ad beneficentiam erga fideles & sanctos, quibus arctissimis quibuscunque conjunctionis vinculis uniti sumus. Nam quò maior est conjunctio siue naturalis siue spiritalis, eò maior obligatio est ad benefaciendum. Vocantur autem fideles hoc loco *domestici fidei*, quòd omnes versentur in eadè Dei domo, hoc est, ecclesia quæ Dei domus vocatur, Tim. 3. 15. Heb. 3. 2. In quam nemini patet aditus, nisi per fidem, qua omnia ecclesiæ membra inter se coadunantur.

11 *Videtis quàm longis literis vobis scripserim mea manus.*

12 *Quicumque volunt speciosi apparere in carne, cogunt vos circumcidi, tantùm ne ob crucem Christi persecutionem patiantur.*

13 *Nam ne ipsi quidem qui circumciduntur Legem servant: sed volunt vos circumcidi, ut de vestra carne glorientur.*

14 *A me verò absit gloriari nisi in cruce Domini.*

ni nostri Iesu Christi: per quem mundus mihi crucifixus est, & ego mundo.

15 Nam in Christo Iesu neque circumcisio quicquam valet, neque preputium, sed noua creatio.

16 Et quicumque secundum hanc regulam incedent, pax erit super eos & misericordia, & super Israëllem Dei.

17 De cætero nequis mihi molestias exhibeto: ego enim stigmata Domini Iesu in corpore meo porto

II. **V**idetis quam] Conclusio epistolæ huius, in qua ad detegendum pseudoapostolorum fucum, & Galatarum animos à falsæ ipsorum doctrina auocandos, se cum iis comparat. Ad hanc conclusionem transit per locum attentionis, quo excitat Galatas ad inspicendum laborem suum in scribendo ad ipsos, quem amplificat primum à literarum prolixitate, deinde à scribendi instrumento, quod sua manu scripserit. Sensus igitur est quasi diceret: hæc hæctenus tam prolixè scripta sunt mea manu, quod reliquum est sic habete.

Mea manu] Solebat Paulus ut plurimum in scribendis epistolis suis amanuensis opera uti, & salutationem postremam sua manu exarare, ut verisimile est ex 2. Thessl. 3.17. & Coloss. 4.18. & Rom. 16.22. Tertius apertè dicitur scriptor epistolæ ad Romanos. Hanc tamen epistolam profitetur Apostolus se sua manu scripsisse, ut inde Galatis constaret quàm seriò pro
ipsum

ipforum constantia in veritate Euangelij laborauerit.

12 *Quicumque volunt*] Conclusio ipsa in qua comparatione facta quasi in tabula depingit ante oculos Galatarum, pseudoapostolorum ingenium & suum. In protasi comparationis habes factum pseudoapostolorum & facti finem. Cogebant Galatas circumcidi, & circumcisionem ad salutem necessariam esse docebat in eum tantum finem, ne persecutionem paterentur ob crucem Christi, hoc est, sinceram doctrinam Euangelij de salute per solam Christi crucem obtinenda, non admixtis ceremoniis legis. Nam circumcisionis & rituum Mosaicorum doctrina, coniuncta cum doctrina Euangelij & crucis Christi, tollebat offensionem illam omnem qua offendebantur Iudæi prædicatione crucis Christi. Ideoque Iudæi neminem persequiebantur, nisi eos tantum qui, sublati prorsus legis ceremoniis, solam Christi crucem prædicabant, ut Apostolus suprà docuit, 5.11. Ego autem, inquit fratres, *si circumcisionem etiam prædico, quid adhuc persecutionem patior?* quali diceret, Si circumcisionem vnà cum Christo prædicarem, non paterer persecutionem, cum Iudæi neminem persequantur qui quouis modo legis ceremonias prædicat, siue cum Christo, siue sine Christo.

Obserua igitur hanc falsorum doctorum notam esse, velle Christum docere sine perse-

cutione; ac proinde paratos esse potius quouis modo sinceram Euangelij doctrinam adulterare & veritati quævis mendacia admiscere, quàm vt aliquam persecutionem ferant. Nam docendi finem proponunt sibi, non Christum, sed seipsos & commoda sua, quibus vel reiecto Christo semper volunt frui. Ideoque de iis sic loquitur Apostolus Phil. 2. 21. *Quæ sua ipsorum sunt quarunt, non quæ sunt Christi Iesu* & postea 3. 19. *Quorum Deus est venter.* ὑποπροσωπῆσαι est pulchram speciem ostētare ad hominum gratiam aucupandum, quod quidem fecerunt pseudoapostoli prædicādo externas legis ceremonias, quæ hoc loco *carnis* nomine significantur.

13. *Nam ne ipsi*] Probat pseudoapostolorum hunc tantum finem esse, dum cogunt Galatas circumcidi, vt ne persecutionem patiantur, per remotionem illius finis quem ipsi Galatis prætendebant per occupationem: poterant Galatæ obieciſſe, at volunt nos circumcidi vt seruemus legem (hoc enim pseudoapostoli doctrinæ circumcisionis prætexebant:) Ergo non hic eorum finis est, ne persecutionē patiantur. Respondet Apostolus, tollendo hunc finem ex eo quòd ne ipsi quidem qui circumciduntur legem seruent. Argumentum potest esse in hanc formam, Si cogerent vos circumcidi vt legem seruetis, ipsi qui circumciduntur legem seruarent: at ne ipsi quidem qui circumciduntur legem seruant: Ergo nō eo fine volūt vos circum-

cidi

cidi vt legem seruetis. Fuit quidem circumcissionis finis in se obligatio ad totius legis obseruationem, cuius basis erat circūcisio, id quod docet Apostolus suprà 5.3. *Testor omni homini qui circumciditur eum debitorem esse totius legis seruandæ*, quia vt eo loco ostendimus, circumcisio initiatio quædam fuit ad legem vniuersam, & circumcissus quasi nomen suum dabat Mosi legislatori ad legis Mosaicæ obseruationē sese obligans: Verum pseudoapostoli hunc finem neque in sua, neque in aliorum persona respiciebant, sed id tantum in doctrina circumcissionis ante oculos habuerunt, vt inita cum Iudæis gratia persecutionem vitarent.

Sed volunt vos] Remoto circumcissionis fine quem prætexebant pseudoapostoli, redit ad verum finem, nempe, vt ipsi de carne Galatarum glorientur, hoc est, vt ex mutilata per circumcissionem carne vestra veditent se Iudæis, quasi totidem profelytos ad Iudaismum adduxissent. Porro hic finis nō tam idem est cum eo qui fuit versu superiori, quàm cū eo coniunctus: nā per circumcissionis doctrinā gratiā cū Iudæis ineuntes, non tantū persecutionē effugiebāt, sed etiam gloriationis materiā apud Iudæos captabant ex aucto circūcisorū numero.

14. *A me verò*] Antapodosis dissimilitudinis, in qua Paulus se describit auersando, & remouendo à se illum docendi finem quē sibi proponebant pseudoapostoli, & aliam quam-

cunque similem gloriationis materiam: assumit autem vnam crucem Christi tanquam idoneam materiam in qua gloriatur. Per *crucem Christi* hic intellige Christum crucifixum & mortuum pro nobis, qui vnica est materia gloriationis omnium fidelium, 1. Cor. 1. vers. 31. 2. Cor. 10. 17. Philip. 3. 3. propter quem alia omnia etiam quæ alioqui lucra sunt, ducunt esse damnum & stercora Philip. 3. 8. Quem solum sibi statuunt cognoscendum. 1. Cor. 2. 2. *Num decreueram quicquam scire inter vos, nisi Iesum Christum, cūque crucifixum.* Sensus igitur huius loci est, quasi diceret, illi glorientur de carne vestra recusantes persecutionem pati ob crucem Christi: ego in solo Christo gloriior, ipsiusque cruce, cuius causa omnia ferre sum paratus. Id eo Rom. 5. 3. Profitetur se gloriari etiam in oppressionibus, quæ cum Christi cruce coniunctæ sunt.

Obserua hanc sinceri doctoris notam esse, semper habere sibi Christum ante oculos, in eius cruce gloriari, non quærere quæ sua sunt, sed præ Christo omnes huius vitæ commoditates pro nihilo habere, afflictiones quasunque pro Euangelio patienter perpeti, eiusque veritatem libenter vel sanguine suo obsignare. Philip. 2. 17. *Quinetiam si pro libamento offerar super hostia sacrificiōque fidei vestra, gaudeo, & gratulor omnibus vobis.*

Per quem] Ratio cur in solo Christo crucifixo siue

so siue Christi cruce gloriatur, ab effectis ipsius in se, quod crucis huius virtute mundus ipsi crucifixus sit, & ipse mundo. Mundus hic significat omnia mundana & externa quæ ad veterem hominem pertinet, & efficaciam Spiritus in nobis sanctificadis impediunt, aut nos in Christi apprehensione remorantur, cuiusmodi fuerunt omnes ritus Mosæici, & alia omnia in quibus homines extra Christum gloriantur. Quorum duæ species sequenti versu enumerantur, circumcisio in qua tantopere gloriabantur Iudæi, & præputium quod Gentium erat peculiare.

15. *Nam in Christo*] Ratio qua probat se mundo crucifixum & mundum sibi, virtute Christi crucifixi: In Christo sola prodest noua creatura: Ergo in Christo mundus mihi crucifixus est, & ego mundo. Antecedens ostenditur ex remotione rerum quæ nouæ creaturæ contrariæ sunt, tanquam inutilium in Christo, quales sunt circumcisio & præputium, quibus duabus speciebus intelliguntur omnia externa quæ pugnant cum noua creatura. *Noua creatura* hoc loco sumitur pro imagine Dei quam reparat in nobis spiritus Christi, dum creat in mentibus nostris nouam ac cælestem lucem, in voluntate rectitudinem, & in omnibus affectibus sanctitatem, eodem nomine appellatur etiam 2. Corin. 5. 17. & Eph. 4. 24. vocatur *nouus homo*, qui secundum Deum conditus est ad iustitiam

& sanctimoniam veram.

16. *Et quicumque*] Commendat aliis hanc gloriationem in sola cruce Christi, tanquam canonem & regulam, secundum quam Apostolis ipsis in ministerio exemplo suo incedendum sit. Argumentum commendationis est à beneficiis quæ consecutari sunt à Deo, quicumque hanc regulam tenent, quæ duo hîc nominantur, pax & misericordia. *Pacis* nomine intellige finem omnium Dei in Christo beneficiorum adeoque fœlicitatem ipsam, & summum hominis bonum quò referuntur præcedētia omnia in Christo beneficia: nam ad eam tendit prædestinatio nostra, vocatio nostra, iustificatio nostra. *Iustificati per fidem pacem habemus erga Deū*, Rom. 5.1. Phil. 4.7. dicitur *pax Dei quæ superat omnem intellectum*, quæque præsidio est cordibus nostris & mentibus nostris per Iesum Christum. *Misericordia* autem hîc significat omnes spirituales benedictiones, quæ ex Dei erga nos misericordia in Christo proueniunt: cuiusmodi sunt remissio peccatorum, iustificatio, sanctificatio, vita æterna, estque causa pacis huius de qua diximus: vtraque autem existit ex Christi cruce, Rom. 3.25. Coloss. 1. vers. 20.

Et super] Beneficia hæc incessuris iuxta regulam illā promissa nominatim applicat ad Israëllem Dei, hoc est, totam Christi Ecclesiam, cuius Israël iam olim typus fuit. Israëllem Dei vocat, vt

cat, vt distinguat ab Israël secundum carnem tantum, qui etsi erat ex patre Israël, non tamen fuit verus Israël, Rom. 9. 6. qui solus censetur Israël Dei, cuius laus non est ex hominibus sed ex Deo, vt Apostolus verum Iudæum definiuit Rom. 2. 29.

17. *De cætero ne quis*] Comparationem hanc sui & pseudoapostolorum epiphonematicus concludit, quasi cum authoritate grauitè interdicens ne quis sibi molestias exhibeat. *Molestias* hinc intellige non de corporis afflictionibus, quas libenter omnes obiuit Paulus, & obiturus erat, verum de inuertenda doctrina Euangelij, eaque adulteranda, importunè accersitis ad eam legis ceremoniis.

Ego enim stigmata] Ratio interdicti ab adiunctis stigmatibus quæ gerebat in corpore suo. Stigmatum nomine intellige vulnera, carceres, lapidationes, plagarum vibices, denique omne genus ærumnas & persecutiones quas pro euangelio sustinuit Apostolus, quæ fusè enumerantur 2. Cor. 11. 23. & deinceps. Metaphora est à seruis fugitiuis & maleficis, quibus inurebantur certè aliquæ notæ non sine magna eorum infamia: verum hæc stigmata Christi, vt mundo ignominiosa videantur, adeò tamen sunt pretiosa coram Deo, vt ea non dubitet Apostolus omni pseudoapostolorum gloriæ opponere, eorumque, quali insignium Christi, fiducia authoritatem sibi sumat interdicensi

ipsis ne sibi molestias exhibeant. *Stigmata* hæc vocat *Domini Iesu*, quia propter Dominum Iesum erant inflicta. Non enim quævis stigmata tantam pariunt fiduciam & audaciam; verum multum refert quæ & cuius sint stigmata quæ gerit quis in corpore suo (*Martyrem enim, ut rectè ait Cyprianus, non facit pœna, sed causa*) solæ Iesu Christi stigmata quibus doctor verus & sincerus esse agnoscitur, eam habent vim ut molestias quasunque falsorum doctorum arcerere possint.

18 *Gratia Domini nostri Iesu Christi sit cum spiritu vestro, fratres, Amen.*

Gratia Domini] Valedicens Galatis concludit epistolam, eandem iis gratiam Domini Iesu Christi comprecatus quam in salutatione epistolæ exoptavit. Id enim Apostolo nostro solenne est in omnibus epistolis suis, ut à gratia exorsus in gratiam desinat; ut nobis eius exemplo discendum sit & salutationes nostras omnes & valedictiones positas esse in Christi gratia, à qua & in primis nostris congressibus sermonis initium sumendum est, & in quam dum alij ab aliis digredimur sermonem nostrum oportet delinere, ut Christo perpetuò sit gloria gratiæ suæ.

Cum spiritu] Sedem gratiæ propriam designat, spiritum nimirum siue animum: gratia enim

enim Christi res interna est spiritualis, ideó-
que interiorē & spiritualement hominis par-
tem primū omnium occupat: postquam au-
tem in animo & spiritu hominis sedem sibi
delegit, tum diffundit se per totum hominem,
per corpus, per membra corporis; egreditur
denique foras in ipsas actiones externas. Vt au-
tem sedes, ita sensus gratiæ primū ac præci-
puè est in animo: in anima enim sentitur fides,
in anima sentitur iustificatio & peccatorum
remissio, sentitur pax Dei quæ superat omnem
intellectum, sentitur denique glorificatio
per Iesum Christum, cui cum patre
& Spiritu sancto, sit omnis
honor & gloria in se-
culum. Amen.


FINIS.



Handwritten text in a cursive script, likely a letter or a page from a manuscript. The text is arranged in several lines, with some words appearing to be in a different script or language, possibly indicating a mix of languages or a specific dialect. The ink is dark and the paper shows signs of age and wear.

1712







1
663

r

